

**LIGJI**  
**PËR PROCEDURËN**  
**KONTESTIMORE**

LIGJI Nr. 03/L-006 (Gaz. Zyrtare RK dt. 20.09.2008)



# PËRMBAJTJA

## **PJESA E PARË..... 6**

### **KREU I - DISPOZITAT E PËRGJITHSHME (§§ 1 – 16)..... 6**

#### **KREU II - KOMPETENCA E GJYKATËS (§§ 17 – 27) ..... 10**

##### **1. Dispozitat e përbashkëta ..... 10**

##### **2. Kompetenca e gjykatave në kontestet me element ndërkombëtar..... 13**

##### **3. Kompetenca lëndore ..... 14**

##### **4. Përcaktimi i vlerës së objektit të kontestit ..... 14**

##### **5. Kompetenca territoriale (§§ 37 – 61) ..... 15**

###### **a) Kompetenca e përgjithshme territoriale ( (§§ 37 – 40)..... 15**

###### **b) Kompetenca e veçantë territoriale (§ 41- 54) ..... 16**

###### **b.1. Kompetenca territoriale ekskluzive (§ 41- 43) ..... 16**

###### **Kompetenca në kontestet lidhur me sendet e paluajtshme (§ 41) ..... 16**

###### **Kompetenca në kontestet lidhur me mjetin e fluturimit (§ 42) ..... 17**

###### **Kompetenca për kontestet në procedurën përmbarese dhe të falimentimit (§ 43) ..... 17**

###### **b. 2. Kompetenca territoriale e zgjedhur (§§ 44 – 54) ..... 17**

###### **Kompetenca në kontestet martesore (§ 44) ..... 17**

###### **Kompetenca në kontestet për vërtetimin apo kundërshtimin e atësisë apo amësisë (§ 45) ..... 18**

###### **Kompetenca në kontestet për ushqimin ligjor (§ 46) ..... 18**

###### **Kompetenca në kontestet për shpërblimin e dëmit (§ 47) ..... 18**

###### **Kompetenca në kontestet për mbrojtjen e së drejtës në bazë të garancisë së prodhuesit (§ 48) ..... 19**

###### **Kompetenca në kontestet nga marrëdhënia e punës (§ 49) ... 19**

###### **Kompetenca sipas vendit të pagesës (§ 50) ..... 19**

###### **Kompetenca sipas vendit ku ndodhet njësia e personit juridik (§ 51) ..... 19**

Kompetenca në kontestet për shkak të pengim-posedimit mbi sendin e luajshëm (§ 52) .....	20
Kompetenca në kontestet nga marrëdhëniet kontraktuese (§ 53) .....	20
Kompetenca në kontestet nga raportet trashëgimore-juridike (§ 54) .....	20
c) Kompetenca territoriale ndihmëse (§§ 55 - 61) .....	20
Kompetenca për bashkëndërgjyqësit (§ 55) .....	20
Kompetenca në kontestet martesore (§ 56) .....	21
Kompetenca në raportet pasurore-juridike të bashkëshortëve (§ 57).....	21
Kompetenca në kontestet për vërtetimin apo kundërshtimin e amësisë apo atësisë (§ 58) .....	21
Kompetenca në kontestet për ushqimin ligjor (§ 59).....	21
Kompetenca për personat, për të cilët në Kosovë nuk ekziston gjykatë me kompetencë territoriale (§ 60) .....	22
Kompetenca sipas vendit ku ndodhet përfaqësia e personit të huaj në Kosovë (§ 61) .....	22
6. Kompetenca territoriale për paditë kundër shtetasve të huaj (§ 62).....	22
7. Kompetenca territoriale nga gjykata e lartë (§§ 63 - 65).....	23
8. Marrëveshja mbi kompetencën territoriale (§ 66).....	23
KREU III - PËRJASHTIMI I GJYQTARIT NGA GJYKIMI (§§ 67 – 72).....	24
KREU IV - PALËT DHE PËRFAQËSUESIT E TYRE (§§ 73 – 84) ...	26
KREU V - PËRFAQËSUESIT ME PROKURË (§§ 85 – 95) .....	30
KREU VI - GJUHA NË PROCEDURË (§§ 96 – 98) .....	33
KREU VII - PARASHTRESAT (§§ 99 – 102) .....	34
KREU VIII - DËRGIMI I SHKRESAVE (§§ 103 – 122).....	36
Mënyra e dërgimit (§ 103) .....	36
Ndërrimi i adresës (§ 116).....	39
Përfaqësuesi për pranimin e shkresave (§ 118).....	41
Dërgimi i shkresave nga palët (§ 120).....	42
Fletëdërgesa (§ 121).....	42
Shikimi dhe përshkrimi i shkresave në dosjen e lëndës (§ 122) ..	43

KREU IX - SEANCAT DHE AFATET (§§ 123 – 133).....	43
Seancat (§ 123) .....	43
Afatet (§ 125).....	44
Kthimi në gjendjen e mëparëshme (§ 129).....	46
KREU X – PROCESVERBALET (§§ 134 – 140).....	47
KREU XI - VENDIMET GJYQËSORE (§§ 141 – 169) .....	50
AKTGJYKIMI.....	51
a) Aktgjykimi i pjesshëm (§ 147).....	52
b) aktgjykimi ne baze te pohimit (§ 148) .....	53
c) Aktgjykimi në bazë të heqjes dorë nga kërkesëpadia (§ 149) .....	53
d) Aktgjykimi për shkak të padëgjueshmërisë / mosbindjes (§ 150) .	54
e) Aktgjykimi për shkak të mungesës (§ 151) .....	54
f) Aktgjykimi pa shqyrtim kryesor të çështjes (§ 152) .....	55
Dhënia, hartimi me shkrim dhe dërgimi i aktgjykimit (§ 153) .....	55
Aktgjykimi plotësues (§ 162) .....	58
Korrigjimi i aktgjykimit (§ 165).....	59
Forma e prerë e aktgjykimit (§ 166) .....	59
KREU XII - AKTVENDIMI (§§ 170 – 175).....	60
<b>PROCEDURA SIPAS MJETEVE TË GODITJES .....</b>	<b>62</b>
KREU XIII - MJETET E ZAKONSHME TË GODITJES (§§ 176 – 210) .....	62
Ankesa kundër aktgjykimit (§§ 176 – 205).....	62
E drejta e ankimit (§ 176).....	62
Përmbajtja e ankesës (§§ 178 – 180).....	62
Shkaqet nga të cilat mund të goditet aktgjykimi .....	63
Procedura sipas ankesës .....	66
Kufijtë e ekzaminimit të aktgjykimit të shkallës së parë.....	69
Vendimet e gjykatës së shkallës së dytë mbi ankesën.....	69
Ankesa kundër aktvendimit (§§ 206 -210).....	72
KREU XIV - MJETET E JASHTËZAKONSHME TË GODITJES (§§ 211 – 251) 73	
Revizioni (§§ 211 – 231) .....	73
Revizioni kundër aktvendimit (§§ 228 – 231) .....	77
Përsëritja e procedurës (§§ 232 – 244).....	78

Raporti ndërmjet revizionit dhe propozimit për përsëritjen e procedurës.....	82
Kërkesa për mbrojtjen e ligjshmërisë (§ 245) .....	83

## **PJESA E DYTË .....85**

### **GJYKIMI NË SHKALLË TË PARË .....85**

KREU XV – PADIA (§§ 252 – 263).....	85
Përmbajtja e padisë (§ 253) .....	85
Padi vërtetimi (§ 254) .....	86
Padia me disa kërkesa (§ 255).....	86
Kundërpadia (§ 256).....	87
Ndryshimi i padisë (§ 256) .....	88
Tërheqja e padisë (§ 261).....	89
Gjyqvarësia (Litispendenca) (§§ 262 - 263).....	90
KREU XVI - Bashkëndërgjyqësia (§§ 264 – 270) .....	90
KREU XVII – PJESËMARRJA E PERSONAVE TË TRETË NË PROCEDURË (§§ 271 – 276) .....	92
Emërimi i paraardhësit juridik.....	94
Njoftimi i personit të tretë për procesin gjyqësor .....	94
KREU XVIII – NDERPRERJA DHE PUSHIMI I GJYKIMIT (§§ 277 – 295) .....	95
Ndihma juridike.....	97
Mosrespektimi i gjykatës .....	98
KREU XXI - SIGURIMI I KËRKESËPADISË (§§ 296 – 318) .....	101
KREU XXII - MJETET PROVUESE DHE MARRJA E PROVAVE (§§ 319 – 385) .....	110
Dispozita të përgjithshme .....	110
KËQYRJA NE VEND .....	112
SHKRESAT.....	113
Fuqia provuese e shkresave.....	113
DËSHMITARËT .....	115
EKSPERTËT.....	119
DËGJIMI I PALËVE .....	123
SIGURIMI I PROVËS (PARAPROVA).....	124

KREU XXIII - PËRGATITJA E SHQYRTIMIT KRYESOR.....	126
Dispozita të përgjithshme.....	126
SHQYRTIMI PARAPRAK I PADISË .....	127
Përgjigja në padi (§ 394) .....	129
SEANCA PËRGATITORE.....	130
a) Dispozita të përgjithshme.....	130
b) Ndërmjetësimi dhe pajtimi gjyqësor .....	133
c) Konvokimi i seancës për shqyrtimin kryesor të çështjes .....	135
KREU XXIV - SHQYRTIMI KRYESOR .....	137
1) Zhvillimi i shqyrtimit kryesor.....	137
2) Shtyrja dhe vazhdimi i seancës gjyqësore për shqyrtim kryesor .....	140
3) Mbajtja e seancës kryesore me dyer të hapura .....	142
KREU XXV - SHPENZIMET PROCEDURALE .....	143
1) Përbërja e shpenzimeve procedurale.....	143
2) Shpenzimet në procedurën e sigurimit të provës .....	148
3) Lirimi nga pagimi i shpenzimeve gjyqësore .....	149

## **PJESA E TRETË ..... 151**

<b>PROCEDURAT E POSAÇME KONTESTIMORE .....</b>	<b>151</b>
KREU XXVI - PROCEDURA NË KONTESTET NGA MARRËDHËNIA E PUNËS ( §§ 474 – 477) .....	151
KREU XXVII - PROCEDURA NË KONTESTET PËR SHKAK TË PENGIMIT TË POSEDIMIT ( §§ 478 – 483) .....	152
KREU XXVIII - PROCEDURA NË KONTESTET E VLERËS SË VOGËL ( §§ 484 – 491) .....	153
KREU XXIX - PROCEDURA E DHËNIES SË URDHËRPAGESËS ( §§ 492 – 504) .....	155
KREU XXX - PROCEDURA NË KONTESTET TREGTARE ( §§ 505 – 510) .....	159
KREU XXXI - PROCEDURA E GJYKIMEVE TË ARBITRAZHIT ( §§ 511 – 531) .....	160
KREU XXXII - DISPOZITAT TRANZITORE DHE TË FUNDIT ( §§ 532 – 537) .....	167

# LIGJI

## PËR PROCEDURËN

## KONTESTIMORE

### PJESA E PARË

#### KREU I - DISPOZITAT E PËRGJITHSHME (§§ 1 – 16)

##### Neni 1

Ligji për procedurën kontestimore cakton rregullat procedurale, në bazë të të cilave gjykata i shqyrton dhe i zgjidhë kontestet nga marrëdhëniet juridiko-civile të personave fizikë dhe juridikë, Nëse me ligj të posaçëm nuk është përcaktuar ndryshe.

##### Neni 2

- 2.1 Në procedurë kontestimore gjykata vendos brenda kufijve të kërkesave që janë parashtruar nga palët ndërgjyqëse.
- 2.2 Gjykata i zbaton rregullat e të drejtës materiale sipas çmuarjes së saj dhe nuk është e lidhur me thëniet e palëve që kanë të bëjnë me të drejtën materiale.
- 2.3 Gjykata nuk mund të refuzojë shqyrtimin dhe vendosjen mbi kërkesat që janë në kompetencën e saj.
- 2.4 Pala duhet të ketë interes juridik për padinë dhe për veprimet procedurale tjera që mund të kryhen në procedurë.

##### Neni 3

- 3.1 Palët mund të disponojnë lirisht me kërkesat juridiko-civile që i kanë parashtruar gjatë procedurës.



- 3.2 Palët mund të heqin dorë nga kërkesat e tyre, ta njohin kërkesën e palës kundërshtare si dhe të bëjnë ujdi (pajtim) gjyqësore lidhur me kontestin e tyre.
- 3.3 Gjykata nuk do t'i miratojë disponimet e palëve që janë në kundërshtim me:
- a) rendin juridik;
  - b) dispozitat ligjore;
  - c) rregullat e moralit publik.

#### Neni 4

- 4.1 Gjykata vendos për kërkesëpadinë pas shqyrtimit të çështjes juridike në seancë të drejtpërdrejtë dhe publike.
- 4.2 Ndryshe nga dispozita e paragrafit 1 të këtij neni, gjykata vendos për kërkesëpadinë në bazë të veprimeve procedurale të shkruara dhe provave të administruara në mënyrë jo të drejtpërdrejt, Nëse kjo përcaktohet me ligj.
- 4.3 Gjykata e shqyrton çështjen në seancë jopublike vetëm në rastet e përcaktuara me ligj.

#### Neni 5

- 5.1 Gjykata do t'i jep mundësi secilës palë që të deklarohet rreth kërkesave dhe thënieve të palës kundërshtare.
- 5.2 Vetëm në rastet e përcaktuara me këtë ligj gjykata ka drejtë që të vendos mbi kërkesën, për të cilën palës kundërshtare nuk i është dhënë mundësia që të deklarohet.

#### Neni 6

- 6.1 Procedura kontestimore zhvillohet në gjuhën që është në përdorim zyrtar në gjykatë.
- 6.2 Palët dhe pjesëmarrësit e tjerë në procedurë, të cilët nuk e kuptojnë apo nuk e flasin gjuhën që është në përdorim zyrtar në gjykatë kanë të drejtë që të përdorin gjuhën e vet apo gjuhën që e kuptojnë.

#### Neni 7

- 7.1 Palët kanë për detyrë të paraqesin të gjitha faktet mbi të cilat i mbështesin kërkesat e veta dhe të propozojnë me të cilat konstatohen faktet e tilla.

- 7.2 Gjykata është e detyruar ti vërtetojë edhe faktet të cilat palët nuk i kanë paraqitur, si dhe ti marrë edhe provat, të cilat palët nuk i kanë propozuar, vetëm Nëse nga rezultati i shqyrtimit dhe i të provuarit del përfundimi se palët kanë për qëllim disponimin me kërkesat, me të cilat nuk mund të disponojnë lirisht (të përcaktuar në nenin 3 paragrafi 3 të këtij ligji), nëse me ligj nuk është përcaktuar ndryshe.
- 7.3 Gjykata nuk mund ta bazojë vendimin e vet në faktet dhe provat, lidhur me të cilat palëve nuk u është dhënë mundësia që të deklarohen.

#### Neni 8

- 8.1 Se cilat fakte do t'i konsiderojë të provuara e cilat jo, vendos vetë gjykata në bazë të çmuarjes me ndërgjegje e të kujdesshme të provave, por edhe në bazë të rezultatit të gjithë procedimit.
- 8.2 Gjykata me ndërgjegje dhe me kujdes e çmon çdo provë veç e veç dhe të gjitha provat së bashku.

#### Neni 9

Palët ndërgjyqëse, ndërhyrësit dhe përfaqësuesit e tyre kanë për detyrë që para gjykatës të flasin të vërtetën dhe t'i shfrytëzojnë me ndërgjegje të drejtat që u janë njohur me këtë ligj.

#### Neni 10

- 10.1 Gjykata ka për detyrë të përpiqet që procedura të zhvillohet pa zvarritje dhe me sa më pak shpenzime, si dhe të bëjë të pamundur çdo keqpërdorim të së drejtave procedurale që u takojnë palëve sipas këtij ligji.
- 10.2 Nëse palët, ndërhyrësit, përfaqësuesit ligjorë apo përfaqësuesit me prokurë, i keqpërdorin të drejtat që u janë njohur me këtë ligj me qëllim që t'i dëmtojnë të tjerët, gjë kjo e cila është në kundërshtim me zakonet e mira, mirëbesimin dhe ndërgjegjen, gjykata do të caktojë kundër tyre dënime me të holla ose masa të tjera ligjore.
- 10.3 Nëse palët, ndërhyrësit, përfaqësuesit ligj orë ose përfaqësuesit e autorizuar vazhdimisht i shpërfillin urdhrat e gjykatës, dështojnë të ofrojnë informacion sipas mandatit në këtë ose në ndonjë ligj tjetër në fuqi, ose dështojnë të paraqiten në seancat e caktuara, me qëllim që ta vonojnë procedimin e lëndës, gjykata mund të urdhërojë gjyba në të holla ose të zbatojë masa të tjera të përcaktuara me ligj.

## Neni 11

- 11.1 Palën që nuk është e përfaqësuar nga avokati, gjykata e udhëzon se cilat veprime procedurale mund t'i kryejë, sa herë që konstaton se ajo nga padijenja nuk i shfrytëzon të drejtat procedurale që i takojnë sipas këtij ligji.
- 11.2 Gjykata duhet ta udhëzojë edhe palën që është e përfaqësuar nga avokati për veprimet procedurale, kur konsideron se përfaqësuesi nuk është duke e kryer punën në mënyrë profesionale.

## Neni 12

Procedura e shkallës së parë, si rregull, përbëhet prej dy seancave gjyqësore:

- a) seancës përgatitore;
- b) seancës për shqyrtim kryesor.

## Neni 13

- 13.1 Kur vendimi i gjykatës varet nga zgjidhja paraprake e çështjes për atë se a ekziston ndonjë e drejtë subjektive apo raport juridik, për të cilën një gjykatë tjetër ose ndonjë organ tjetër kompetent nuk ka marrë vendim (çështja paraprake), atëherë gjykata ka tagër që vetë ta zgjidhë çështjen e tillë, nëse me dispozita të veçanta nuk është caktuar ndryshe.
- 13.2 Vendimi i gjykatës mbi çështjen paraprake ka efekt juridik vetëm në kontestin, në të cilin është zgjidhur ajo çështje.

## Neni 14

Në pikëpamje të ekzistimit të veprës penale dhe të përgjegjësisë penale të kryesit, në procedurën kontestimore gjykata është e lidhur me aktgjykimin e formës së prerë të gjykatës penale, me të cilin i pandehuri është shpallur fajtor.

## Neni 15

- 15.1 Në procedurën e shkallës së parë dhe procedurën sipas propozimit për përsëritjen e procedurës, vepron gjyqtari individual (i vetëm).
- 15.2 Në procedurën e shkallës së dytë dhe procedurën sipas revizionit vepron trupi gjykues prej tre gjyqtarëve.
- 15.3 Caktimin e kompetencës territoriale dhe zgjidhjen e konfliktit për kompetencë e bën trupi gjykues prej tre gjyqtarëve.

## Neni 16

Nëse për veprimet procedurale të caktuara nuk është përcaktuar me ligj forma në të cilën kryhen, atëherë palët ndërgjyqëse i kryejnë ato me shkrim jashtë seancës ose gojarisht në seancë.

## KREU II - KOMPETENCA E GJYKATËS (§§ 17 – 27)

### 1. Dispozitat e përbashkëta

#### Neni 17

- 17.1 Menjëherë pas marrjes së padisë, gjykata duhet të vlerësojë sipas detyrës zyrtare se a është kompetente për procedimin e çështjes që i është paraqitur.
- 17.2 Ky vlerësim i kompetencës bëhet në bazë të thënieve në padi dhe në bazë të fakteve që i ka të njohura vetë gjykata.
- 17.3 Nëse gjatë procedimit të çështjes ndryshohen rrethanat mbi të cilat është mbështetur kompetenca e gjykatës, gjykata e cila ka qenë kompetente në momentin e paraqitjes së padisë mbetet edhe më tutje kompetente, përkundrejt faktit se ndryshimet e tilla e bëjnë kompetente gjykatën tjetër të llojit të njëjtë.

#### Neni 18

- 18.1 Gjatë tërë procedurës gjykata kujdeset sipas detyrës zyrtare nëse zgjidhja e kontestit hynë ose jo në kompetencën gjyqësore.
- 18.2 Kur gjatë procedimit të çështjes konstatohet se për zgjidhjen e kontestit nuk është kompetente gjykata, por ndonjë organ tjetër shtetëror, atëherë gjykata shpallet inkompetente, i shpallë të pavlefshme të gjitha veprimet procedurale te kryera dhe e hedhë poshtë padinë e paraqitur.
- 18.3 Kur gjykata gjatë zhvillimit të procedurës konstaton se për zgjidhjen e kontestit nuk është kompetente gjykata e vendit, atëherë ajo shpallet inkompetente, i anulon veprimet procedurale të kryera dhe e hedhë poshtë padinë. Mirëpo, gjykata nuk do të veprojë ashtu nëse kompetenca e gjykatës së vendit tonë varet nga pëlqimi i të paditurit, e i padituri e ka dhënë pëlqimin për kontestin në zhvillim.

## Neni 19

Secila gjykatë gjatë gjithë procedurës së shkallës së parë, sipas detyrës zyrtare kujdeset për kompetencën lëndore.

## Neni 20

- 20.1 Nëse palët për zgjidhjen e kontestit të caktuar e kanë kontraktuar arbitrazhin, gjykata, të cilës i është paraqitur padia për të njëjtin kontest midis palëve të njëjta, sipas prapësimit të palës së paditur do të shpallet inkompetente, do t'i anulojë veprimet e kryera në procedurë dhe do ta hedhë poshtë padinë. Gjykata nuk vepron kështu vetëm nëse konstaton se kontrata mbi arbitrazhin nuk është e vlefshme, se ka pushuar vlefshmëria e saj apo se nuk mund të realizohet.
- 20.2 Prapësimi nga paragrafi 20.1 i padituri mund ta parashtrojë më së voni me anë të përgjigjes ne padi.

## Neni 21

- 21.1 Deri sa të merret vendimi mbi çështjen kryesore, gjykata me anë të aktvendimit do ta përfundojë procedurën kontestimore nëse konstaton se procedura do të duhej të zhvillohej sipas rregullave të procedurës jokontestimore. Pasi që aktvendimi në fjalë të bëhet i formës së prerë, procedura do të vazhdojë të zhvillohet sipas rregullave të procedurës jokontestimore në gjykatën kompetente.
- 21.2 Veprimet procedurale të kryera nga gjykata kontestimore (këqyrja direkt, ekspertiza, dëgjimi i dëshmitareve etj.), si dhe vendimet që i ka marrë kjo gjykatë, nuk janë të pavlefshme, pos nëse janë kryer në procedimin kontestimor dhe nuk do të kryhen rishtas.

## Neni 22

- 22.1 Gjykata mund të shpallet jokompetente në pikëpamje territoriale vetëm sipas prapësimit të palës së paditur të parashtruar me anë të përgjigjes në padi.
- 22.2 Mbi prapësimin nga paragrafi 22.1 gjykata vendos më së voni në seancën përgatitore, përkatësisht në seancën e parë për shqyrtimin kryesor, nëse seanca përgatitore nuk është mbajtur.
- 22.3 Gjykata mund të shpallet jokompetente në pikëpamje territoriale sipas detyrës zyrtare vetëm kur ekziston kompetenca territoriale ekskluzive e

ndonjë gjykatë tjetër, por më së voni deri në momentin e paraqitjes së përgjigjes në padi.

#### Neni 23

- 23.1 Pasi që aktvendimi mbi inkompetencën (nenet 20 dhe 22 të këtij ligji) të bëhet i formës së prerë, gjykata pa vonesë, e më së voni brenda afatit prej tri ditësh, do t'ia dërgojë lëndën gjykatës e cila sipas mendimit të saj është kompetente.
- 23.2 Gjykata, të cilës i është dërguar lënda, do ta procedojë çështjen juridike sikurse procedimin të ishte filluar pranë saj.
- 23.3 Veprimet procedurale të kryera nga gjykata inkompetente (këqyrja në vend, ekspertimi, dëgjimi i dëshmitarëve etj.) nuk janë të pavlefshme vetëm nga shkak se i ka kryer gjykata inkompetente dhe nuk ka nevojë që përsëri të kryhen.

#### Neni 24

- 24.1 Nëse gjykata të cilës i është dërguar lënda konsideron se është kompetente pikërisht gjykata që ia ka dërguar lëndën, ose ndonjë gjykatë tjetër, atëherë ajo, brenda afatit prej tri ditësh do t'ia dërgojë lëndën gjykatës që duhet ta zgjidhë këtë konflikt kompetence. Gjykata, të cilës i është dërguar lënda nuk vepron kështu vetëm kur konstaton se ajo i është dërguar për shkak të gabimit të hapur, kurse është dashur t'i dërgohet ndonjë gjykatë tjetër, në të cilin rast lëndën do t'ia dërgojë gjykatës tjetër dhe për këtë gjë do ta njoftojë gjykatën që ia ka dërguar lëndën.
- 24.2 Nëse sipas ankesës kundër aktvendimit të gjykatës së shkallës së parë, me të cilin ajo është deklaruar e inkompetencës territoriale, vendimin e ka marrë gjykata e shkallës së dytë, atëherë ky vendim, në pikëpamje të kompetencës e obligon edhe gjykatën të cilës i është dërguar lënda, nëse gjykata e shkallës së dytë, që e ka marrë vendimin sipas ankesës, është kompetente për të zgjidhur konfliktin lidhur me kompetencën midis këtyre dy gjykatave.
- 24.3 Vendimi i gjykatës së shkallës së dytë mbi inkompetencën lëndore të gjykatës së shkallës së parë e obligon çdo gjykatë të cilës i dërgohet më vonë lënda e njëjtë, nëse gjykata e shkallës së dytë është kompetente për zgjidhjen e konfliktit lidhur me kompetencën midis këtyre dy gjykatave.

#### Neni 25

- 25.1 Konfliktin lidhur me kompetencën midis gjykatave te llojit të njëjtë e zgjidhë gjykata që është më e lartë dhe e përbashkët për gjykatat në konflikt.
- 25.2 Konfliktin lidhur me kompetencën midis gjykatave të llojit të ndryshëm e zgjidhë Gjykata Supreme e Kosovës.

#### Neni 26

- 26.1 Mbi konfliktin lidhur me kompetencën mund të vendoset edhe kur palët nuk janë deklaruar me përpara lidhur me kompetencën.
- 26.2 Për derisa të mos zgjidhet konflikti lidhur me kompetencën, gjykata të cilës i është dërguar lënda, ka për detyrë t'i kryejë ato veprime procedurale për të cilat ekziston rreziku i shtyrjes.
- 26.3 Kundër aktvendimit me të cilin vendoset mbi konfliktin lidhur me kompetencën nuk lejohet ankimi.

#### Neni 27

Secila gjykatë kryen veprime procedurale brenda territorit të vet, por përjashtimisht, për shkaqe të arsyeshme, gjykata mund të kryejë veprime të caktuara edhe në territorin e gjykatës tjetër. Për këtë gjë njoftohet gjykata në territorin e së cilës do të kryhet veprimi apo është kryer veprimi.

### 2. Kompetenca e gjykatave në kontestet me element ndërkombëtar

#### Neni 28

- 28.1 Në pikëpamje të kompetencës së gjykatave tona për zgjidhjen e kontesteve të shtetasve të huaj, që gëzojnë të drejtën e imunitetit dhe për zgjidhjen e kontesteve të shteteve të huaja dhe të organizatave ndërkombëtare, vlejné rregullat e së drejtës ndërkombëtare.
- 28.2 Gjykata e vendit është kompetente për zgjidhjen e kontestit kur kompetenca e saj në kontestin me element ndërkombëtar është caktuar shprehimisht me anë të ligjit apo me anë të kontratës ndërkombëtare
- 28.3 Nëse në ligjin tonë, apo në kontratën ndërkombëtare nuk ka dispozita vendimtare për kompetencën e gjykatës së vendit për llojin e caktuar te kontesteve, gjykata e vendit është kompetente të gjykojë në llojin e tillë të kontesteve edhe kur kompetenca e saj rezulton nga dispozitat e këtij ligji mbi kompetencën territoriale te gjykatës së vendit.

### 3. Kompetenca lëndore

#### Neni 29

Në procedurë kontestimore gjykatat gjykojnë brenda kufijve të kompetencës së vet lëndore të caktuar me ligj.

### 4. Përcaktimi i vlerës së objektit të kontestit

#### Neni 30

- 30.1 Në paditë lidhur me kontestet pasurore-juridike paditësi është i detyruar ta përcaktojë vlerën e kontestit. Si vlerë e kontestit merret parasysh vetëm vlera e kërkesës kryesore.
- 30.2 Kamatat, shpenzimet procedurale, ndëshkimet e kontraktuara dhe kërkesat tjera ankesore, nuk merren parasysh nëse nuk përbejnë kërkesë kryesore.

#### Neni 31

Nëse kërkesa ka të bëjë me dhëniet e ardhshme që përsëriten, vlera e objektit të kontestit llogaritet sipas shumës totale të tyre, por jo më tepër se deri në shumën që i përgjigjet shumës totale të dhënieve për një kohë më së shumti prej pesë vjetësh.

#### Neni 32

- 32.1 Nëse në padinë e ngritur kundër një të padituri përfshihen disa kërkesa që mbështeten në të njëjtën bazë faktike dhe juridike, atëherë vlera e objektit të kontestit caktohet sipas shumës së përgjithshme të vlerës së të gjitha kërkesave.
- 32.1 Nëse kërkesat në padi rezultojnë nga baza të ndryshme, apo nëse janë ngritur kundër disa të paditurve, vlera e objektit të kontestit caktohet sipas vlerës së secilës kërkesë veç e veç.

#### Neni 33

Kur kontesti ka të bëjë me ekzistimin e raportit të mëditjes apo të qirasë, ose me raportin e shfrytëzimit të banesës apo të lokaleve të punës, vlera e kontestit llogaritet sipas shumës njëvjeçare të mëditjes, respektivisht të qirasë, përveç nëse është fjala për raportin e mëditjes apo të qirasë që vlen për kohë më të shkurtër të kontraktuar.



#### Neni 34

Nëse me padi kërkohet vetëm dhënia e sigurisë për ndonjë kërkesë apo për vendosjen e së drejtës së pengut, vlera e objektit të kontestit caktohet sipas shumës së kërkesës që duhet siguruar. Nëse objekti i pengut ka vlerë më të vogël se kërkesa që duhet siguruar, si vlerë e objektit të kontestit do të merret vlera e objektit të pengut.

#### Neni 35

35.1 Nëse kërkesëpadia nuk ka të bëjë me të holla, por paditësi në padinë e tij thekson se pranon që në vend të përmbushjes së kërkesëpadisë të marrë shumën e caktuar të të hollave, atëherë si vlerë e objektit të kontestit do të merret kjo shumë.

35.2 Në raste të tjera, kur kërkesëpadia nuk ka të bëjë me të holla, vendimtare do të jetë vlera e objektit të kontestit të cilën e ka treguar paditësi në padinë e tij.

#### Neni 36

Nëse paditësi nuk e ka përmendur fare vlerën e objektit të kontestit në padinë e paraqitur në gjykatë, apo nëse ai vlerën e tillë e ka caktuar tepër të lartë apo shumë më të vogël se që është ajo realisht, atëherë gjykata sipas detyrës zyrtare, apo sipas prapësimit të palës së paditur, më së voni në seancën përgatitore, e nëse kjo nuk është mbajtur, atëherë në seancën për shqyrtimin kryesor të çështjes juridike, por para se të fillojë shqyrtimi i çështjes kryesore, shpejtë dhe në mënyrë të përshtatshme do ta caktojë, përkatësisht do ta verifikojë saktësinë e vlerës së treguar në padi nga paditësi. Në rast të këtillë gjykata vendos me aktvendim kundër të cilit nuk lejohet ankimi.

### 5. Kompetenca territoriale (§§ 37 – 61)

#### a) Kompetenca e përgjithshme territoriale ( (§§ 37 – 40)

#### Neni 37

37.1 Nëse me ligj nuk është caktuar kompetenca ekskluzive territoriale e ndonjë gjykate tjetër, për procedimin e çështjes është kompetente gjykata e kompetencës së përgjithshme për palën e paditur.

37.2 Në rastet e përcaktuara me këtë ligj, për procedimin e çështjes është kompetente, përpos gjykatës së kompetencës së përgjithshme territoriale edhe gjykata tjetër e caktuar.

#### Neni 38

38.1 Për procedimin e çështjes juridike kompetencë të përgjithshme territoriale ka gjykata në territorin e të cilës i padituri e ka vendbanimin.

38.2 Nëse i padituri nuk ka vendbanim, e kompetencës së përgjithshme territoriale është gjykata në territorin e të cilës i padituri e ka vendqëndrimin.

38.3 Nëse i padituri, përpos vendbanimit e ka edhe vendqëndrimin në ndonjë vend tjetër, kurse sipas rrethanave të rastit konkret mund të supozohet se këtu do të qëndrojë për një kohë të gjatë, atëherë kompetencë të përgjithshme territoriale ka edhe gjykata e vendqëndrimit të palës së paditur.

#### Neni 39

39.1 Për gjykimin në kontestet kundër Kosovës, njësisë së vetëqeverisjes lokale, si dhe formave tjera të organizimit territorial, kompetencë të përgjithshme territoriale ka gjykata në territorin e të cilës ndodhet selia e kuvendit të saj.

39.2 Për gjykimin në kontestet kundër personave juridik të tjerë e kompetencës së përgjithshme territoriale është gjykata në territorin e të cilës ndodhet selia e tyre e regjistruar.

#### Neni 40

Për gjykimin në kontestet kundër qytetarit të Kosovës që banon vazhdimisht në botën e jashtme, kompetencë të përgjithshme territoriale ka gjykata e vendbanimit të tij të fundit në Kosovë.

b) Kompetenca e veçantë territoriale (§ 41- 54)

b.1. Kompetenca territoriale ekskluzive (§ 41- 43)

Kompetenca në kontestet lidhur me sendet e paluajtshme (§ 41)

#### Neni 41

41.1 Për gjykim në kontestet lidhur me pronësinë dhe të drejtat sendore të tjera mbi sendet e paluajtshme, në kontestet për shkak të pengim posedimit mbi sendin e paluajtshëm, si dhe në kontestet nga raportet e qiradhënies së

paluajtshmërisë, ose nga kontratat për shfrytëzimin e banesave apo të lokaleve të punës, kompetencë ekskluzive ka gjykata, në territorin e të cilës ndodhet paluajtshmëria.

- 41.2 Nëse paluajtshmëria shtrihet në territorin e disa gjykatave, për procedim të çështjes është kompetente çdonjëra prej tyre.

#### Kompetenca në kontestet lidhur me mjetin e fluturimit (§ 42)

##### Neni 42

- 42.1 Nëse për procedimin e çështjes në kontestin lidhur me të drejtën e pronësisë apo të drejtave sendore të tjera mbi mjetin e fluturimit si dhe në kontestet nga raporti i qiradhënies së mjetit të fluturimit është kompetente gjykata e Kosovës, ekskluzivisht është kompetente në pikëpamje territoriale gjykata në territorin e së cilës mbahet regjistri në të cilin është regjistruar mjeti i fluturimit.
- 42.2 Nëse për kontestin për shkak të pengim posedimit në mjetin e fluturimit nga paragrafi I i këtij neni është kompetente gjykata në Kosovë, e kompetencës territoriale, përveç gjykatës në territorin e të cilës mbahet regjistri në të cilin është regjistruar mjeti i fluturimit, është edhe gjykata në territorin e së cilës është bërë pengimi.

#### Kompetenca për kontestet në procedurën përbaruese dhe të falimentimit (§ 43)

##### Neni 43

Për procedimin e kontesteve që lindin gjatë dhe lidhur me procedurën e përbarimit gjyqësor apo administrativ, gjegjësisht gjatë dhe lidhur me procedurën e falimentimit, në pikëpamje territoriale është ekskluzivisht kompetente vetëm gjykata në territorin e së cilës ndodhet gjykata, e cila është duke zhvilluar procedurën përbaruese apo të falimentimit, gjegjësisht gjykata në territorin e së cilës është duke u kryer përbarimi administrativ.

#### b. 2. Kompetenca territoriale e zgjedhur (§§ 44 – 54)

#### Kompetenca në kontestet martesore (§ 44)

##### Neni 44

Për gjykim në kontestet për konstatimin e ekzistimit apo të mosekzistimit të martesës, për anulimin e martesës apo zgjidhjen e saj, përpos gjykatës me

kompetencë të përgjithshme territoriale kompetente është edhe gjykata në territorin e së cilës bashkëshortët kanë pasur vendbanimin e fundit të përbashkët.

Kompetenca në kontestet për vërtetimin apo kundërshtimin e atësisë apo amësisë (§ 45)

#### Neni 45

Në kontestet për vërtetimin ose kundërshtimin e atësisë apo amësisë fëmija mund të ngrëjë padi qoftë në gjykatën me kompetencë të përgjithshme territoriale qoftë në gjykatën në territorin e së cilës e ka vendbanimin apo vendqëndrimin.

Kompetenca në kontestet për ushqimin ligjor (§ 46)

#### Neni 46

Për zgjidhjen e kontesteve lidhur me alimentacionin, nëse paditës është personi që kërkon alimentacion, përpos gjykatës me kompetencë të përgjithshme territoriale, kompetente është edhe gjykata në territorin e së cilës paditësi e ka vendbanimin, gjegjësisht vendqëndrimin.

Kompetenca në kontestet për shpërblimin e dëmit (§ 47)

#### Neni 47

- 47.1 Për gjykim në kontestet lidhur me përgjegjësinë jokontraktuese për dëmin, përveç gjykatës me kompetencë të përgjithshme territoriale, kompetente është edhe gjykata në territorin e së cilës është kryer veprimi dëmtues apo gjykata në territorin e së cilës ka lindur pasoja e dëmtimit.
- 47.2 Nëse dëmi është shkaktuar për shkak të vdekjes apo të lëndimit të rëndë trupor, kompetente është, përpos gjykatës nga paragrafi 1 i këtij neni, edhe gjykata në territorin e së cilës paditësi e ka vendbanimin, respektivisht vendqëndrimin e vet.
- 47.3 Dispozitat e paragrafëve 1 dhe 2 të këtij neni do të aplikohen edhe në kontestet sipas padive civile kundër shoqërive të sigurimit për shpërblimin e dëmit personave të tretë në bazë të dispozitave mbi përgjegjësinë direkte të tyre, kurse dispozita e paragrafit 1 të këtij neni edhe në kontestet lidhur me kërkesat e regresit në bazë të shpërblimit të dëmit kundër debitorëve të regresit.

Kompetenca në kontestet për mbrojtjen e së drejtës në bazë të garancisë së prodhuesit (§ 48)

Neni 48

Për gjykim në kontestet për mbrojtjen e së drejtës në bazë të garancisë shkresore kundër prodhuesit që e ka dhënë garancinë, përpos gjykatës me kompetencë të përgjithshme territoriale për të paditurin, kompetente është edhe gjykata me kompetencë të përgjithshme territoriale për shitësin, i cili gjatë shitjes së sendit ia ka dorëzuar blerësit garancinë shkresore të prodhuesit.

Kompetenca në kontestet nga marrëdhënia e punës (§ 49)

Neni 49

Nëse në kontestin nga marrëdhënia e punës paditës është punëtori, për gjykim, përpos gjykatës së kompetencës së përgjithshme territoriale për të paditurin, kompetente është edhe gjykata në territorin e së cilës kryhet puna ose është kryer, respektivisht gjykata në territorin e së cilës puna është dashur të kryhet, si dhe gjykata në territorin e së cilës është themeluar marrëdhënia e punës.

Kompetenca sipas vendit të pagesës (§ 50)

Neni 50

Për gjykim në kontestet e poseduesit të kambialit apo të çekut kundër nënshkruesit, përpos gjykatës me kompetencë të përgjithshme territoriale, kompetente është edhe gjykata e vendit të pagesës.

Kompetenca sipas vendit ku ndodhet njësia e personit juridik (§ 51)

Neni 51

Për gjykimin e çështjes në kontestet kundër personit juridik, njësia e të cilit ndodhet jashtë selisë së tij, nëse kontesti rezulton nga marrëdhënia juridike e kësaj njësie të personit juridik, përpos gjykatës me kompetencë të përgjithshme territoriale kompetente është edhe gjykata në territorin e së cilës ndodhet ajo njësi e personit juridik.

Kompetenca në kontestet për shkak të pengim-posedimit mbi sendin e luajtshëm (§ 52)

#### Neni 52

Për zgjidhjen e kontesteve për shkak të pengim-posedimit mbi sendet e luajtshme, përpos gjykatës me kompetencë të përgjithshme territoriale, kompetente është edhe gjykata në territorin e së cilës është bërë pengimi.

Kompetenca në kontestet nga marrëdhëniet kontraktuese (§ 53)

#### Neni 53

Në kontestet për vërtetimin e ekzistimit apo mosekzistimit të kontratës, për përmbushjen apo zgjidhjen e kontratës, si dhe në kontestet për zhdëmtime të shkaktuara nga mospërmbushja e kontratës, përpos gjykatës me kompetencë të përgjithshme territoriale, kompetencë territoriale ka edhe gjykata e vendit ku sipas marrëveshjes së palëve kontraktuese i padituri ka detyrë ta përmbushë kontratën.

Kompetenca në kontestet nga raportet trashëgimore-juridike (§ 54)

#### Neni 54

Gjersa procedura trashëgimore të mos përfundojë me vendim të formës së prerë, për gjykim në kontestet nga marrëdhëniet trashëgimore-juridike, si dhe në kontestet lidhur me kërkesat e kreditorëve ndaj trashëgimlënësit, përpos gjykatës me kompetencë të përgjithshme territoriale, kompetencë territoriale ka edhe gjykata, në territorin e së cilës zbatohet procedura trashëgimore.

c) Kompetenca territoriale ndihmëse (§§ 55 - 61)

Kompetenca për bashkëndërgjyqësit (§ 55)

#### Neni 55

Nëse me një padi janë paditur disa persona (neni 265 paragrafi 1 i këtij ligji), kurse për ta nuk ekziston kompetenca territoriale e gjykatës së njëjtë, kompetente është gjykata me kompetencë territoriale për njërin nga të paditurit, e nëse midis tyre ka obligues kryesorë dhe aksesorë, gjykata që ka kompetencë territoriale për ndonjërin nga obliguesit kryesorë.

## Kompetenca në kontestet martesore (§ 56)

### Neni 56

Nëse në kontestet martesore gjykata e vendit tonë është kompetente nga shkaku se bashkëshortët e kanë pasur vendbanimin e fundit të përbashkët në Kosovë, gjegjësisht nga shkaku se paditësi e ka vendbanimin në Kosovë, kompetente në pikëpamje territoriale është gjykata në territorin e së cilës bashkëshortët e kanë pasur vendbanimin e fundit të përbashkët, përkatësisht gjykata në territorin e së cilës paditësi e ka vendbanimin.

## Kompetenca në raportet pasurore-juridike të bashkëshortëve (§ 57)

### Neni 57

Nëse në kontestet lidhur me raportet pasurore-juridike të bashkëshortëve kompetente është gjykata e vendit tonë nga shkaku se pasuria e bashkëshortëve ndodhet në Kosovë, ose nga shkaku se paditësi në kohën e paraqitjes së padisë e ka vendbanimin apo vendqëndrimin në Kosovë, kompetencë territoriale ka gjykata, në territorin e të cilës paditësi e ka vendbanimin apo vendqëndrimin në kohën e paraqitjes së padisë.

## Kompetenca në kontestet për vërtetimin apo kundërshtimin e amësisë apo atësisë (§ 58)

### Neni 58

Nëse në kontestet për vërtetimin e amësisë apo atësisë është kompetente gjykata e vendit tonë nga shkaku se paditësi e ka vendbanimin në Kosovë, kompetencë territoriale ka gjykata në territorin e të cilës paditësi e ka vendbanimin.

## Kompetenca në kontestet për ushqimin ligjor (§ 59)

### Neni 59

- 59.1 Nëse në kontestet me element ndërkombëtar për ushqimin ligjor gjykata e vendit tonë është kompetente nga shkaku se paditësi e ka vendbanimin në Kosovë, kompetencë territoriale ka gjykata, në territorin e së cilës paditësi e ka vendbanimin.
- 59.2 Nëse kompetenca e gjykatës së vendit tonë ekziston nga shkaku se i padituri e ka pasurinë, nga e cila mund të realizohet ushqimi ligjor në Kosovë,

atëherë kompetencë territoriale ka gjykata, në territorin e së cilës ndodhet pasuria e të paditurit.

Kompetenca për personat, për të cilët në Kosovë nuk ekziston gjykatë me kompetencë territoriale (§ 60)

#### Neni 60

- 60.1 Padia me kërkesa pasurore-juridike kundër personit, për të cilin në vendin tonë nuk ka gjykatë me kompetencë territoriale. mund t'i paraqitet secilës gjykatë në territorin, e së cilës ndodhet çfarëdo pasurie e tij apo sendi që kërkohet me padi.
- 60.2 Nëse gjykata e vendit tonë është kompetente sepse detyrimi është krijuar gjatë kohës së qëndrimit të të paditurit në Kosovë, atëherë kompetencë territoriale ka gjykata, në territorin e së cilës është krijuar detyrimi, lidhur me të cilin ka lindur kontesti.
- 60.3 Në kontestet kundër personit, për të cilin në Kosovë nuk ekziston gjykatë me kompetencë territoriale, për detyrimet që duhet përmbushur në vendin tonë, padia mund t'i paraqitet gjykatës, në territorin e së cilës duhet përmbushur detyrimi i tillë.

Kompetenca sipas vendit ku ndodhet përfaqësia e personit të huaj në Kosovë (§ 61)

#### Neni 61

Për kontestet kundër personit fizik apo juridik që e ka vendbanimin, respektivisht selinë jashtë vendit tonë, në pikëpamje të detyrimeve që janë krijuar në Kosovë, apo që duhet të përmbushen në Kosovë, padia mund t'i paraqitet gjykatës, në territorin e së cilës ndodhët përfaqësia e përhershme e tij për Kosovën, apo qendra e organit të cilit i është besuar kryerja e punëve të tija.

6. Kompetenca territoriale për paditë kundër shtetasve të huaj (§ 62)

#### Neni 62

Nëse në shtetin e huaj shtetasi ynë mund të paditet në gjykatën, e cila sipas dispozitave të këtij ligji nuk do të kishte kompetencë territoriale, atëherë për të njëjtën çështje juridiko-civile e njëjta kompetencë do të vlejë edhe për shtetasin e shtetit të tillë në gjykatën tonë.



## 7. Kompetenca territoriale nga gjykata e lartë (§§ 63 - 65)

### Neni 63

Nëse gjykata kompetente, nga shkak i përjashtimit të gjyqtarëve apo nga ndonjë shkak tjetër nuk mund të procedojë, atëherë ajo do ta njoftojë për këtë gjykatën e shkallës më të lartë me qëllim që ta caktojë një gjykatë tjetër nga territori i vet, por që ka kompetencë lëndore për çështjen konkrete.

### Neni 64

Sipas propozimit të palës apo ta gjykatës kompetente, gjykata supreme mund të caktojë një gjykatë tjetër, por me kompetencës lëndore që të veprojë në lëndën konkrete, nëse është e qartë se kështu me lehtë do të kryhet procedura apo kur për një gjë të këtillë ekzistojnë shkaqe tjera të rëndësishme.

### Neni 65

Nëse për zgjidhjen e çështjes është kompetente gjykata e vendit tonë, por sipas dispozitave të këtij ligji nuk mund të konstatohet se cila gjykatë ka kompetencë territoriale, atëherë Gjykata Supreme, sipas propozimit të palës e cila e ngritë padinë, do ta caktojë gjykatën me kompetencë territoriale.

## 8. Marrëveshja mbi kompetencën territoriale (§ 66)

### Neni 66

- 66.1 Nëse me ligj nuk është përcaktuar kompetenca territoriale ekskluzive e gjykatës për çështjen konkrete, palët mund të merren vesh që në shkallë të parë të gjykojë gjykata që nuk ka kompetencë territoriale, me kusht që kjo gjykatë të jetë me kompetencë lëndore.
- 66.2 Nëse me ligj është përcaktuar se për zgjidhjen e çështjes konkrete kompetencë territoriale kanë dy ose më tepër gjykata të vendit tonë, palët mund të merren vesh që në shkallë të parë të gjykojë njëra prej tyre ose ndonjë gjykatë tjetër që ka kompetencë lëndore.
- 66.3 Marrëveshja nga paragrafi 2 i këtij neni, vlen vetëm nëse është hartuar me shkrim dhe firmosur nga të dy palët, si dhe nëse ka të bëjë me kontestin konkret ose me disa konteste, por që rezultojnë nga një raport i caktuar materialo-juridik.
- 66.4 Dokumentin mbi marrëveshjen, paditësi duhet t'ia bashkangjes padisë.

- 66.5 Nëse padia nuk i është paraqitur gjykatës së caktuar me anë të marrëveshjes i padituri mund të kërkojë që padia t'i dërgohet gjykatës se kontraktuar.
- 66.6 Kërkesën nga paragrafi 5 i këtij neni, i padituri mund ta parashtrijë si përgjigje në padi dhe duke ia bashkëngjitur asaj dokumentin që e përmban marrëveshjen mbi kompetencën territoriale.

### KREU III - PËRJASHTIMI I GJYQTARIT NGA GJYKIMI (§§ 67 – 72)

#### Neni 67

Gjyqtari nuk mund ta procedojë çështjen juridike:

- a) nëse është vetë palë, përfaqësues ligjor apo me prokurë i palës, apo nëse me palën është bashkëkreditor apo bashkëdebetitor ose i obliguar për regresim, apo nëse në të njëjtën çështje është dëgjuar si dëshmitar ose si ekspert;
- b) nëse pala ose përfaqësuesi ligjor apo me prokurë i saj është kushëri gjaku në vijën vertikale deri në cilëndo shkallë, kurse në vijën horizontale deri në shkallë të katërt, apo nëse është bashkëshort, apo gjini e krushqisë deri në shkallë të dytë, pavarësisht nëse martesë ka pushuar ose jo;
- c) nëse është kujdestar, adoptues ose i adoptuar i palës, i përfaqësuesit të saj ligjor ose me prokurë;
- d) nëse në të njëjtën çështje ka marrë pjesë në dhënien e vendimit të gjykatës më të ulët, ose të organit tjetër, ose në procedurën e ndërmjetësimit;
- e) në qoftë se ka vepruar në çështjen në të cilën është bërë ujdia gjyqësore, e me padinë e ngritur kërkohet anulimi i ujdisë së këtillë;
- f) nëse është aksionar apo anëtar i shoqërisë tregtare që është palë në procedurën e iniciuar me padi;
- g) nëse ekzistojnë rrethana të tjera që e vejnë në dyshim paanësinë e tij.

#### Neni 68

- 68.1 Pala e paraqet kërkesën për përjashtimin e gjyqtarit posa të ketë mësuar se ekziston ndonjëri nga shkaqet e përjashtimit, por më së voni deri në përfundim të shqyrtimit të çështjes, e nëse nuk ka pasur shqyrtim të saj, atëherë deri në momentin e marrjes së vendimit meritot.
- 68.2 Në mjetin e goditjes së vendimit përfundimtar apo në përgjigjen në mjetin e goditjes pala mund ta emërtojë gjyqtarin që nuk do të mund të marrë pjesë

në dhënien e vendimit për shkak te ekzistimit të rrethanave nga neni 67 i këtij ligji.

- 68.3 Pala mund ta kërkojë përjashtimin e gjyqtarit të caktuar me emër dhe mbiemër që vepron në çështjen konkrete, përkatësisht të kryetarit të gjykatës i cili duhet të vendos mbi kërkesën për përjashtimin e gjyqtarit.
- 68.4 Pala ka për detyrë që në kërkesën për përjashtim t'i cekë rrethanat nga të cilat përfundon se ekziston ndonjë bazë ligjore për përjashtimin e gjyqtarit.

#### Neni 69

- 69.1 Nuk është e lejuar kërkesa për përjashtimin e gjyqtarit:
- a) me të cilën kërkohet përjashtimi i të gjithë gjyqtarëve të gjykatës që do të mund të gjykonin në një kontest të caktuar;
  - b) për kërkesën për të cilën është vendosur njëherë;
  - c) në të cilën nuk është arsyetuar shkakun në bazë të të cilit kërkohet përjashtimi.
- 69.2 Kërkesën nga paragrafi 1 i këtij neni e hedhë poshtë gjyqtari që është duke proceduar çështjen.
- 69.3 Kundër aktvendimit nga paragrafi 2 i këtij neni nuk lejohet ankesë e posaçme.

#### Neni 70

- 70.1 Mbi kërkesën e palës për përjashtimin e gjyqtarit vendos kryetari i gjykatës.
- 70.2 Nëse pala e kërkon përjashtimin e kryetarit të gjykatës nga vendosja mbi kërkesën e saj, vendimin për përjashtimin e merr kryetari i gjykatës për një shkallë më të lartë se ajo e çështjes.
- 70.3 Mbi kërkesën e palës për përjashtimin e kryetarit të Gjykatës Supreme të Kosovës vendos seanca e përgjithshme e gjyqtarëve të saj.
- 70.4 Para nxjerrjes së aktvendimit mbi kërkesën për përjashtimin do të merret deklarata e gjyqtarit, përjashtimi i të cilit kërkohet, e sipas nevojë, do të bëhen edhe ekzaminime tjera.
- 70.5 Kundër aktvendimit me të cilin aprovohet kërkesa për përjashtimin e gjyqtarit nuk lejohet ankimi, kurse kundër aktvendimit me të cilin refuzohet kërkesa e tillë nuk lejohet ankim i veçantë.

#### Neni 71

- 71.1 Posa ta kuptojë së është shtruar kërkesa për përjashtimin e tij ose ekzistojnë shkaqet për përjashtimin e tij sipas nenit 67 të këtij ligji, gjyqtari është i detyruar ta ndërpresë procedimin dhe ta njoftojë kryetarin e gjykatës.
- 71.2 Përjashtimisht nga paragrafi 1 i këtij neni, kur kërkesa për përjashtim është bazuar në nenin 67 pika g), gjyqtari e njofton kryetarin e gjykatës dhe mund ta vazhdojë procedimin derisa të vendoset lidhur me kërkesën për përjashtim, vetëm të atyre veprimeve që rrezikohen nga shtyrja.
- 71.3 Kur kërkohet përjashtimi i kryetarit të gjykatës, ai e cakton zëvendësin nga radhët e gjyqtarëve të gjykatës së çështjes, e nëse një gjë e tillë nuk është e mundur, vepron sipas nenit 63 të këtij ligji.

#### Neni 72

- 72.1 Dispozitat e këtij ligji për përjashtimin e gjyqtarëve do të zbatohen në mënyrë të përshtatshme edhe ndaj procesmbajtësve.
- 72.2 Për përjashtimin e procesmbajtësit vendos gjyqtari i çështjes.

### KREU IV - PALËT DHE PËRFAQËSUESIT E TYRE (§§ 73 – 84)

#### Neni 73

- 73.1 Palë në procedurë mund të jetë çdo person fizik dhe juridik.
- 73.2 Me dispozita të veçanta caktohet se kush mund të jetë palë në procedurë përpos personave fizik dhe juridik.
- 73.3 Me efekt juridik në çështjen konkrete, gjykata e çështjes mund përjashtimisht t'ua njohë cilësinë e palës edhe atyre formave të bashkimit që nuk kanë zotësi të palës sipas dispozitave të paragrafit 1 dhe 2 të këtij neni, nëse vërtetohet se, duke marrë parasysh objektin e kontestit, në esencë i përmbushin kushtet esenciale për fitimin e zotësisë së palës, e sidomos nëse disponojnë me pasurinë në të cilën mund të kryhet procedura e ekzekutimit.
- 73.4 Kundër aktvendimit nga paragrafi 3 i këtij neni, me të cilin njihet cilësia e palës në çështjen konkrete nuk lejohet ankimi i veçantë.

#### Neni 74

- 74.1 Pala që ka zotësinë e plotë për të vepruar mund të kryejë personalisht veprime në procedurë (zotësia procedurale).

- 74.2 Personi madhor, të cilit i është kufizuar pjesërisht zotësia për të vepruar, ka zotësi procedurale brenda kufijve të zotësisë së vet për të vepruar.
- 74.3 I mituri që nuk e ka fituar plotësisht zotësinë për të vepruar, ka zotësi procedurale brenda kufijve në të cilët i njihet zotësia për të vepruar.

#### Neni 75

- 75.1 Palën e cila nuk e ka zotësinë procedurale e përfaqëson në procedurë përfaqësuesi i saj ligjor.
- 75.2 Përfaqësuesi ligjor caktohet me ligj ose me aktin e organit kompetent shtetëror, të dhënë në bazë të ligjit.
- 75.3 Përfaqësuesi i personit juridik caktohet me ligj apo me aktin e përgjithshëm të personit juridik.

#### Neni 76

Gjatë tërë procedurës gjykata duhet të kujdeset sipas detyrës zyrtare, nëse personi që paraqitet si palë mund të jetë palë në procedurë dhe nëse ka zotësi procedurale, nëse palën me pazotësi procedurale e përfaqëson përfaqësuesi i saj ligjor, dhe nëse përfaqësuesi ligjor ka autorizimin e veçantë, kur ai është i nevojshëm.

#### Neni 77

- 77.1 Përfaqësuesi ligjor mund t'i kryejë në emër të palës të gjitha veprimet në procedurë, por nëse për paraqitjen ose për tërheqjen e padisë, për pohimin, përkatësisht për heqjen dorë nga kërkesëpadia, për përfundimin e ujdisë gjyqësore apo për kryerjen e veprimeve të tjera në procedurë, në dispozita të veçanta është përcaktuar që përfaqësuesi duhet të ketë autorizim të veçantë, ai mund t'i kryejë këto veprime vetëm nëse ka autorizim të tillë.
- 77.2 Personi që paraqitet si përfaqësues ligjor ka për detyrë që, me kërkesën e gjykatës, të provojë se është përfaqësues ligjor i palës. Kur për kryerjen e veprimeve të caktuara procedurale nevojitet autorizimi i veçantë, përfaqësuesi ligjor ka për detyrë të provojë se ka autorizim të tillë.
- 77.3 Kur gjykata konstaton se përfaqësuesi ligjor i personit nën kujdestari nuk tregon kujdes të duhur në përfaqësim, do ta njoftojë për këtë gjë organin e kujdestarisë. Nëse për shkak të pakujdesisë së përfaqësuesit do të mund të shkaktohej dëmi për personin nën kujdestari, gjykata do të ndal procedimin dhe do të propozojë që të caktohet përfaqësuesi tjetër ligjor.

## Neni 78

- 78.1 Kur gjykata konstaton se personi që paraqitet si palë në procedurë duke mos e poseduar këtë cilësi dhe se kjo mungesë mund të evitohet, atëherë do ta ftojë paditësin që të bëjë ndreqje të nevojshme në padi ose do të ndërmarrë masa të tjera me qëllim që procedura të mund të vazhdohet me personin që mund të jetë palë në procedurë.
- 78.2 Kur gjykata konstaton se pala nuk ka përfaqësues ligjor apo se përfaqësuesi ligjor nuk e ka autorizimin e veçantë, kur ky nevojitet, atëherë do të kërkojë që organi kompetent i kujdestarisë t'ia caktojë kujdestarin personit me pazo tësi procedurale, respektivisht do të ftojë përfaqësuesin ligjor që të pajiset me autorizim të veçantë ose do të ndërmarrë masa të tjera që nevojiten që pala me pazo tësi procedurale të përfaqësohet në mënyrë të drejtë.
- 78.3 Gjykata mund t'ia caktojë palës afatin për evitimin e të metave nga paragrafi 1 dhe 2 të këtij neni. Derisa të mos evitohen këto të meta në procedurë mund të kryhen vetëm ato veprime procedurale, për shkak të shtyrjes të të cilave do të mund të lindnin pasoja të dëmshme për palën.
- 78.4 Nëse të metat e treguara nuk mund të mënjanohen, apo nëse afati i caktuar nga gjykata kalon pa sukses, gjykata me aktvendim i abrogon veprimet e kryera nëse janë përfshirë me të metat në fjalë dhe do ta hedhë poshtë padinë, nëse të metat kanë natyrë të tillë që pengojnë procedimin e mëtutjeshëm të çështjes.
- 78.5 Kundër aktvendimit me të cilin urdhërohen masat për mënjanimin e të metave nuk lejohet ankimi.

## Neni 79

- 79.1 Nëse gjatë zhvillimit të procedurës në gjykatën e shkallës së parë tregohet se procedura e zakonshme rreth caktimit të përfaqësuesit ligjor për të paditurin do të zgjaste shumë, kështu që për këtë arsye do të mund të lindnin pasoja të dëmshme për njërin apo për të dy palët, gjykata do t'ia caktojë të paditurit përfaqësuesin e përkohshëm.
- 79.2 Nën kushtet nga paragrafi 79.1, gjykata do t'ia caktojë të paditurit përfaqësuesin e përkohshëm sidomos në këto raste:
- a) nëse i padituri nuk e ka zotësinë procedurale, ndërsa nuk ka përfaqësuesin ligjor;

- b) nëse ekzistojnë interesat e kundërta të të paditurit dhe të përfaqësuesit ligjor të tij;
  - c) nëse të dy palët ndërgjyqëse kanë të njëjtin përfaqësues ligjor.
- 79.3 Gjykata do t'i caktojë palës së paditur përfaqësuesin e përkohshëm edhe në këto raste :
- a) nëse vendqëndrimi i të paditurit është i panjohur, kurse i padituri nuk ka përfaqësues me prokurë;
  - b) nëse i padituri ose përfaqësuesi ligjor i tij, nuk kanë përfaqësues me prokurë, ndodhën jashtë shtetit, kurse dërgimi i shkresave nuk ka mundur tu bëhet.
- 79.4 Për caktimin e përfaqësuesit të përkohshëm gjykata do ta njoftojë pa shtyrje organin e kujdestarisë, si dhe palën kur kjo është e mundshme.

#### Neni 80

Gjykata ia cakton përfaqësuesin e përkohshëm edhe personit juridik duke i zbatuar në mënyrë adekuate dispozitat e nenit 79 të këtij ligji.

#### Neni 81

- 81.1 Gjykata e cakton përfaqësuesin e përkohshëm nga radha e avokatëve.
- 81.2 Në rastet nga paragrafi 2 i nenit 79 të këtij ligji i padituri ka për detyrë të deponojë shumën e të hollave për pagimin e shpenzimeve të përfaqësuesit të përkohshëm, kurse në rastet nga paragrafi 3 i të njëjtit nen shpenzimet i deponon paditësi.

#### Neni 82

- 82.1 Përfaqësuesi i përkohshëm i ka të gjitha të drejtat dhe detyrat e përfaqësuesit ligjor në procedurë, për të cilën është caktuar.
- 82.2 Përfaqësuesi i përkohshëm i ushtron të drejtat dhe detyrat e përmendura derisa të paraqiten në gjykatë i padituri apo përfaqësuesi me prokurë i tij, gjegjësisht derisa organi i kujdestarisë ta njoftojë gjykatën se e ka caktuar kujdestarin.

#### Neni 83

Ne qoftë se përfaqësuesi i përkohshëm i është caktuar të paditurit për shkaqe të treguara në nenin 79 paragrafi 3 pika a) dhe b) të këtij ligji, gjykata brenda afatit prej

shtatë ditësh do të japë shpallje e cila do të botohet në gazetën zyrtare dhe afishohet në tabelën e gjykatës së çështjes, sipas nevojës edhe në ndonjë mënyrë tjetër të përshtatshme.

#### Neni 84

Zotësia procedurale e palëve ndërgjyqëse në gjykatat tona vlerësohet sipas dispozitave ligjore të vendit tonë.

### KREU V - PËRFAQËSUESIT ME PROKURË (§§ 85 – 95)

#### Neni 85

- 85.1 Palët mund të kryejnë veprime në procedurë personalisht ose me anë të përfaqësuesit me prokurë (autorizim), por gjykata mund ta ftojë palën që ka përfaqësues që të deklarohet personalisht në gjykatë për faktet që duhet vërtetuar në procedurën konkrete.
- 85.2 Pala e përfaqësuar mund të vijë në gjykatë kurdoherë dhe të japë deklarata krahas përfaqësuesit të vet, por palën kundërshtare, dëshmitarët dhe ekspertët mund t'i marrë në pyetje vetëm nëpërmjet përfaqësuesit, nëse ky është i pranishëm në seancën gjyqësorë.

#### Neni 86

- 86.1 Përfaqësues me prokurë i palës mund të jetë çdo person që ka zotësi të plotë për të vepruar.
- 86.2 Veprimet procedurale që i kryen përfaqësuesi i palës brenda kufijve të autorizimit kanë efekte juridike sikur t'i ketë kryer vetë pala.

#### Neni 87

- 87.1 Pala mund ta ndryshojë ose ta revokojë deklaratën e përfaqësuesit në seancën në të cilën është dhënë deklarata e tillë.
- 87.2 Nëse përfaqësuesi i palës e ka pohuar ndonjë fakt në seancë në të cilën nuk ka qenë e pranishme pala, apo nëse ai e ka pohuar ndonjë fakt me anë të parashtrësës, kurse pala me vonë e ndryshon apo revokon pohimin e tillë, gjykata i vlerëson të dy deklaratat në pajtim me këtë ligj.



## Neni 88

- 88.1 Nëse gjykata konstaton se përfaqësuesi i palës, që nuk është avokat, nuk është i zoti ta kryejë këtë detyrë, atëherë ajo duhet ta njoftojë palën me pasojat e dëmshme që mund të lindin për shkak të përfaqësimit të këtillë.
- 88.2 Nëse gjykata konstaton se përfaqësuesi që është avokat nuk e kryen detyrën në pajtim me Ligjin mbi Avokaturën, gjykata për një gjë të tillë e njofton Odën kompetente të Avokatëve.

## Neni 89

Pala mund ta autorizojë përfaqësuesin e saj që t'i kryejë vetëm disa veprime të caktuara apo të gjitha veprimet në një procedurë.

## Neni 90

- 90.1 Vëllimin e autorizimeve të përfaqësuesit me prokurë e cakton vetë pala.
- 90.2 Nëse pala ia ka dhënë avokatit prokurën për ndjekjen e çështjes në gjyq, por në të nuk i ka përcaktuar hollësisht autorizimet e tij, avokati në bazë të prokurës së këtillë është i autorizuar që:
- a) t'i kryejë të gjitha veprimet në procedurë, e sidomos të paraqes padinë, ta tërheqë atë, ta parashtojë përgjigjen në padi, ta pohojë kërkesëpadinë ose të heqë dorë nga kërkesëpadia, të lidhë pajtimin gjyqësor, të parashtojë mjetin e goditjes së vendimit si dhe të heqë dorë nga kjo e drejtë apo ta tërheqë mjetin e tillë të parashtruar, por edhe të propozojë caktimin e masave të përkohshme të sigurimit të kërkesave;
  - b) të parashtojë kërkesë për ekzekutimin ose sigurimin dhe të kryejë veprime të nevojshme lidhur me kërkesën e tillë;
  - c) të pranojë prej palës kundërshtare shpenzimet procedurale të caktuara nga gjykata;
  - d) ta autorizojë avokatin tjetër me shkrim që të kryejë disa veprime të caktuara procedurale, por jo edhe që të veprojë në seancën për shqyrtimin kryesor të çështjes.
- 90.3 Për paraqitjen e propozimit për përsëritjen e procedurës avokatit i nevojitet prokurë e veçantë, nëse nga koha kur vendimi është bërë i formës së prerë kanë kaluar më tepër se gjashtë muaj.
- 90.4 Avokatin mund ta zëvendësojë praktikanti që është duke punuar tek ai, por vetëm para gjykatës së shkallës së parë.

## Neni 91

- 91.1 Nëse në prokurë pala nuk ia ka caktuar me hollësisht autorizimet përfaqësuesit, përfaqësuesi që nuk është avokat mund në bazë të prokurës së tillë, t'i kryejë të gjitha veprimet procedurale, por gjithmonë i nevojitet autorizim shprehimor për tërheqjen e padisë, për pohimin e kërkesëpadisë apo për heqjen dorë nga ajo, për lidhjen e pajtimit gjyqësor, për heqjen dorë nga e drejta e paraqitjes së mjetit të goditjes së vendimit, apo për tërheqjen e tij dhe për kalimin e prokurës një personi tjetër, si dhe për paraqitjen e mjeteve të jashtëzakonshme të goditjes së vendimeve.
- 91.2 Përfaqësuesi me prokurë i palës që është person juridik edhe kur nuk është avokat, mund t'i kryejë të gjitha veprimet nga paragrafi 1 i këtij neni pa pasur nevojë për autorizim shprehimor të saj.

## Neni 92

- 92.1 Pala e jep autorizimin për përfaqësim në formë të shkruar ose gojarisht në procesverbal tek gjykata.
- 92.2 Pala që nuk di shkrim/lexim ose që nuk është në gjendje të nënshkruhet do të vejë në prokurën e shkruar, shenjën e gishtit tregues. Nëse në këtë rast prokura i jepet personit që nuk është avokat, nevojitet prania e dy dëshmitarëve, të cilët do të nënshkruhen në prokurë.
- 92.3 Nëse dyshohet në vërtetësinë e prokurës, gjykata mund të vendos me aktvendim që të paraqitet prokura e verifikuar. Kundër këtij aktvendimi nuk lejohet ankimi.

## Neni 93

- 93.1 I autorizuari për përfaqësim ka për detyrë që me rastin e kryerjes së veprimit të parë në procedurë ta paraqes prokurën.
- 93.2 Gjukata mund të lejojë që veprimet në procedurë për palën përkohësisht t'i kryejë personi që nuk e ka paraqitur prokurën, por njëkohësisht do ta urdhërojë atë që brenda afatit të caktuar ta paraqesë prokurën ose aprovimin e palës për veprimet procedurale të kryera.
- 93.3 Për derisa të mos kalojë afati për paraqitjen e prokurës, gjykata do ta shtyjë marrjen e vendimit përfundimtar. Nëse ky afat kalon pa sukses, gjykata do t'i anulojë veprimet procedurale të kryera nga personi pa prokurë, dhe do të vazhdojë ta procedojë çështjen pa i marrë në konsideratë veprimet e kryera nga ai.

- 93.4 Gjykata ka për detyrë që gjatë gjithë procedurës të kujdeset nëse personi që prezantohet si përfaqësues është i autorizuar për përfaqësim. Nëse gjykata konstaton se personi që prezantohet si përfaqësues nuk është i autorizuar nga pala për një gjë të tillë, do t'i anulojë veprimet procedurale të kryera nga personi i tillë, nëse veprimet e tija pala nuk i ka pranuar më vonë.

#### Neni 94

- 94.1 Pala mund ta revokojë në çdo kohë prokurën, kurse përfaqësuesi mund ta denoncojë atë gjithashtu në çdo kohë.
- 94.2 Revokimi, respektivisht denoncimi i prokurës duhet t'i komunikohet gjykatës në të cilën zhvillohet procedura, me shkrim ose gojarisht në procesverbal.
- 94.3 Revokimi, respektivisht denoncimi i prokurës vlen për palën kundërshtare që nga momenti kur t'i jetë komunikuar.
- 94.4 Pas denoncimit të prokurës përfaqësuesi ka për detyrë që edhe 15 ditë të kryejë veprime procedurale për palën që ia ka dhënë atë, nëse është nevoja që të evitohet ndonjë dëm që mund t'i shkaktohet brenda kësaj kohe.

#### Neni 95

- 95.1 Me vdekjen e personit fizik, gjegjësisht me shuarjen e personit juridik shuhet edhe prokura të cilën ai e ka dhënë.
- 95.2 Në rast të falimentimit prokura e dhënë nga debitori në falimentim shuhet në momentin në të cilin sipas dispozitave në fuqi shkaktohen pasojat juridike të hapjes së procedurës për falimentimin.

### KREU VI - GJUHA NË PROCEDURË (§§ 96 – 98)

- 96.1 Palët dhe pjesëmarrësit e tjerë në procedurë kanë të drejtë që para gjykatës të përdorin gjuhën e tyre apo gjuhën të cilën e kuptojnë.
- 96.2 Nëse procedura nuk zhvillohet në gjuhën e palës, gjegjësisht të pjesëmarrësve të tjerë në procedurë, me kërkesën e tyre gjykata do të sigurojë përkthimin në gjuhën e tyre amtare apo në gjuhën që e kuptojnë për të gjitha parashtrirat dhe provat shpresore, si dhe i asaj që parashtrihet në seancë gjyqësore.
- 96.3 Palët dhe pjesëmarrësit e tjerë në procedurë do të njoftohen me të drejtën që procedurën verbale ta ndjekin në gjuhën e tyre me anë të përkthyesit. Ato

mund të heqin dorë nga e drejta e përkthimit nëse deklarojnë se e njohin gjuhën në të cilën zhvillohet procedura. Në procesverbal do të shënohet se u është dhënë udhëzimi për të drejtën e përdorimit të gjuhës së tyre, si dhe deklaratat e palëve dhe të pjesëmarrësve të tjerë lidhur me udhëzimin e dhënë nga gjykata.

96.4 Përkthimin e bëjnë përkthyesit.

96.5 Me shpenzimet e përkthimit ngarkohet buxheti i gjykatës.

#### Neni 97

Letërthirrjet, vendimet dhe shkresat tjera gjyqësore u dërgohen palëve dhe pjesëmarrësve të tjerë në procedurë në gjuhën që është në përdorimin zyrtar në gjykatë.

#### Neni 98

Palët dhe pjesëmarrësit e tjerë në procedurë i dërgojnë gjykatës paditë, ankesat dhe parashtrësit e tjera të tyre në gjuhën që është në përdorim zyrtar në gjykatë.

### KREU VII - PARASHTRËSAT (§§ 99 – 102)

#### Neni 99

99.1 Padia, përgjigjja në padi, mjetet e goditjes së vendimit dhe deklaratat e tjera, propozimet dhe njoftimet, që bëhen jashtë seancave gjyqësore paraqiten me shkrim (parashtrës). Kushtin e formës së shkruar e përmbushin edhe parashtrësit e dërguara me anë të telegrafit, telefaksit apo postës elektronike. Parashtrësit e këtilla quhen të firmosura nëse në to është treguar dërguesi.

99.2 Parashtrësat duhet të jenë të kuptueshme dhe të përmbajnë çdo gjë që nevojitet për të vepruar sipas tyre. Ato duhet të përmbajnë sidomos: emrin e gjykatës, emrin dhe mbiemrin (emërtimin e personit juridik), vendbanimin apo vendqëndrimin (selinë e personit juridik) e palëve, të përfaqësuesve të tyre ligjor apo me prokurë, nëse i kanë, objektin e kontestit, përmbajtjen e deklaratës dhe firmën e parashtrës.

99.3 Nëse deklarata përmban ndonjë kërkesë, pala duhet t'i tregojë në parashtrës faktet mbi të cilat e bazon kërkesën, si dhe provat kur është nevoja për një gjë të tillë.

99.4 Parashtrësat që dërgohen me anë të postës elektronike duhet të verifikohen me anë të firmës së kualifikuar elektronike.

## Neni 100

Parashtresat, dhe shtojcat bashkëngjitura, të cilat duhet t'i dërgohen palës kundërshtare dorëzohen në numër të mjaftueshëm ekzemplarësh për gjykatën dhe palën kundërshtare.

## Neni 101

- 101.1 Dokumentet që i bashkëngjiten parashtresës dorëzohen në origjinal, të përshkruara apo të fotokopjuara.
- 101.2 Nëse pala parashtresës ia bashkëngjet origjinalin e dokumentit, gjykata do ta mbajë këtë në dosjen e lëndës, kurse palës kundërshtare do t'i lejojë këqyrjen e tij. Pasi të pushojë nevoja që dokumenti në origjinal të mbahet në gjykatë, ai i kthehet paraqitësit, me kërkesën e tij, por gjykata mund të kërkojë nga paraqitësi që përshkrimi apo kopja e tij t'i bashkëngjitet dosjes së lëndës.
- 101.3 Nëse parashtresës i është bashkëngjitur kopja apo përshkrimi i dokumentit, gjykata, me kërkesën e palës kundërshtare, do ta ftojë parashtruesin që t'ia paraqet gjykatës dokumentin në origjinal, kurse palës kundërshtare do t'i lejojë këqyrjen. Kur nevojitet një gjë e tillë, gjykata do të caktojë afatin, në të cilin duhet të dorëzohet dokumenti, respektivisht të këqyret ai.
- 101.4 Kundër aktvendimeve të nxjerra në bazë të paragrafëve të mësipërme të këtij neni nuk lejohet ankimi.

## Neni 102

- 102.1 Kur një parashtresë nuk është e kuptueshme dhe e plotë, siç kërkohet në paragrafin 2 të nenit 99, gjykata do ta kërkojë nga dërguesi që ta korrigjojë ose ta plotësojë. Në një rrethanë të tillë, gjykata e udhëzon palën për kryerjen e korrigjimeve dhe plotësimeve duke i caktuar një afat prej tre (tre) ditësh për korrigjimin dhe për plotësimin e parashtresës.
- 102.2 Nëse parashtresa e lidhur me afat korrigjohet, gjegjësisht plotësohet dhe i dorëzohet gjykatës brenda afatit të caktuar sipas par. 1 të këtij neni, do të konsiderohet se i është parashtruar gjykatës në ditën kur është paraqitur për të parën herë.
- 102.3 Parashtresa do të konsiderohet e tërhequr nëse nuk i kthehet gjykatës brenda afatit të caktuar në par. 1 të këtij neni, e nëse i kthehet pa u korrigjuar, gjegjësisht pa u plotësuar, e njëjta do të hidhet poshtë.

- 102.4 Nëse parashtruesat apo dokumentet e bashkëngjitura nuk dorëzohen në numër të mjaftueshëm ekzemplarësh, gjykata do ta urdhërojë parashtruesin që brenda afatit të caktuar ta bëjë këtë. Nëse parashtruesi nuk vepron sipas këtij urdhri, gjykata do ta hedhë poshtë parashtruesën e tij.

## KREU VIII - DËRGIMI I SHKRESAVE (§§ 103 – 122)

### Mënyra e dërgimit (§ 103)

#### Neni 103

- 103.1 Shkresat dërgohen zakonisht nëpërmjet postës, por ato mund të dërgohen edhe nëpërmjet punëtorit të autorizuar të gjykatës, të personit juridik të regjistruar dhe autorizuar për kryerjen e punëve të komunikimit. Shkresat mund t'i dorëzohen adresatit në gjykatë drejtpërsëdrejti apo në ndonjë mënyrë tjetër të përcaktuar me ligj.
- 103.2 Dërgimi mund të bëhet edhe nëpërmjet postës elektronike. Në rast të tillë konsiderohet se është kryer dorëzimi i shkresës në momentin kur është dërguar nëpërmjet postës elektronike.

#### Neni 104

- 104.1 Dërgimi organeve shtetërore dhe personave juridik u bëhet duke iu dorëzuar shkresat personit të autorizuar për pranimin e tyre apo të punësuarit që gjendet në zyrën, gjegjësisht në lokalitë e punës.
- 104.2 Dërgimi personit juridik mund t'i bëhet edhe nëpërmjet njësisë së tij nëse kontesti ka lindur nga raporti juridiko-civil i saj.
- 104.3 Dërgimi i shkresave sipas dispozitave të paragrafit 1 dhe 2 të këtij neni bëhet edhe kur palët e përmendura në këta paragrafë e kanë caktuar për përfaqësues të vetë personin e punësuar që është punëtor i tyre.
- 104.4 Personave ushtarak, punëtorëve të policisë dhe punëtorëve të komunikacionit tokësor dhe ajror dorëzimi i letërthirrjes mund t'u bëhet edhe nëpërmjet komandës, përkatësisht eprorit të tyre direkt, e sipas nevojës në këtë mënyrë mund t'u dërgohen edhe shkresat tjera.

#### Neni 105

- 105.1 Kur dorëzimi i shkresave duhet t'u bëhet personave ose institucioneve në botën e jashtme shtetase të huajve që gëzojnë të drejtën e imunitetit,

dërgimi i tyre do të bëhet në rrugë diplomatike, nëse në marrëveshjen ndërkombëtare, apo në këtë ligj nuk është përcaktuar mënyrë tjetër e komunikimit.

- 105.2 Dërgimi personit juridik që e ka selinë në botën e jashtme mund t'i bëhet edhe nëpërmjet përfaqësisë së tij në Kosovë.

#### Neni 106

Personave të privuar nga liria dërgimi u bëhet përmes drejtorisë së burgut, përkatësisht drejtorisë së institucioneve për ekzekutimin e sanksioneve penale dhe për kundërvajtje.

#### Neni 107

- 107.1 Kur palën e përfaqëson përfaqësuesi i saj ligjor apo me prokurë, shkresa i dorëzohet përfaqësuesit ligjor, përkatësisht përfaqësuesit me prokurë.
- 107.2 Nëse pala ka më tepër përfaqësues ligjor apo me prokurë, mjafton që shkresa t'i dorëzohet njërit prej tyre.

#### Neni 108

- 108.1 Avokatit, si përfaqësues i autorizuar i palës, dërgimi i bëhet duke iu dorëzuar shkresa personit që është i punësuar në zyrën e tij.
- 108.2 Nëse avokati e ushtron profesionin në banesën e vet, në mënyrë adekuate zbatohen dispozitat e nenit 111 të këtij ligji.

#### Neni 109

- 109.1 Shkresat dërgohen çdo ditë prej orës 7.00 gjer në orën 20.00 në adresën e vendbanimit apo në vendin e punës së personit, të cilit ato duhet t'i dorëzohen, apo, një gjë e tillë bëhet edhe në gjykatë kur pranuesi ndodhet aty.
- 109.2 Nëse dorëzimi i shkresës nuk mund të bëhet në adresën dhe kohën e përmendur në paragrafin e mësipërm, atëherë mund të bëhet në çdo kohë dhe vend tjetër.

#### Neni 110

- 110.1 Padia, përgjigjja në padi, letërthirrja për në seancë, urdhërpagesa, aktgjykimi dhe aktvendimi, kundër të cilit lejohet ankimi i veçantë, mjete të goditjes së vendimit, i dorëzohen personalisht palës ose përfaqësuesit ligjor ose

përfaqësuesit me prokurë. Shkresat tjera do t'i dorëzohen personalisht pranuesit kur një gjë e tillë parashihet shprehimisht me këtë ligj apo kur gjykata konkludon se nevojitet kujdes i shtuar për shkak të dokumenteve origjinale që i janë bashkangjitur shkresës që duhet dorëzuar, ose nga ndonjë shkak tjetër.

- 110.2 Nëse personi, të cilit duhet dorëzuar personalisht shkresa nuk gjendet në adresën ku duhet bërë dorëzimi, atëherë dorëzuesi do të kërkojë informatë se kur dhe ku do të mund ta gjejë këtë person dhe, me atë rast do t'ia lejë ndonjërit prej personave të cekur në nenin 111 par. 1 dhe 2 të këtij ligji njoftimin me shkrim që pranuesi për marrjen e shkresës të jetë në ditën dhe në orën e caktuar në shtëpi, përkatësisht në vendin e punës.
- 110.3 Nëse edhe pas kësaj dorëzuesi i shkresës nuk e gjen personin të cilit duhet dorëzuar shkresa, atëherë ai do të veprojë sipas dispozitave të nenit 111 të këtij ligji, dhe kështu dorëzimi do të konsiderohet i kryer.

#### Neni 111

- 111.1 Nëse personi të cilit duhet bërë dorëzimi i shkresës nuk gjendet në banesën e vet, dorëzimi bëhet duke iu dhënë shkresa ndonjë anëtar i rritur të familjes së tij, i cili ka për detyrë ta marrë shkresën në dorëzim, e nëse as këta nuk gjenden në banesë, shkresa do t'i jepet fqinjit, Nëse pajtohet me një gjë të këtillë. Dorëzimi i kryer në këtë mënyrë konsiderohet i vlefshëm.
- 111.2 Nëse dërgimi bëhet në vendin e punës së personit të cilit duhet t'i jepet shkresa, kurse ky person nuk gjendet aty, shkresa mund t'i dorëzohet personit që punon në të njëjtin vend, nëse ai pajtohet që ta marrë shkresën.
- 111.3 Nuk lejohet dorëzimi i shkresës personit i cili merr pjesë në procedurë si kundërshtar i personit të cilit duhet dorëzuar shkresa.
- 111.4 Personat të cilëve u është bërë dorëzimi i shkresave sipas dispozitave të sipërme të këtij neni, në vend adresatit, kanë për detyrë që shkresën t'ia dorëzojnë këtij te fundit.

#### Neni 112

Kur personi, të cilit i është dërguar shkresa, përkatësisht anëtar i rritur i familjes së tij, apo personi i autorizuar ose i punësuar në organin shtetëror apo te personi juridik, pa ndonjë arsye të ligjshme refuzon ta marrë në dorëzim shkresën, dorëzuesi do t'ia lejë në banesë ose në lokalet në të cilat punon personi i tillë apo do t'ia bashkëngjis shkresën në derën e banesës apo lokalit të punës. Në fletë-dërgesë do të



shënohet dita, ora dhe shkaku i refuzimit të marrjes si dhe vendi ku është lënë shkresa. Komunikimi i kryer në këtë mënyrë quhet i ligjshëm.

#### Neni 113

Nëse konstatohet se personi të cilit duhet bërë dorëzimi i shkresës mungon dhe se personat e përmendur në nenin 111 paragrafët 1 dhe 2 të këtij ligji nuk do të kenë mundësi t'ia dorëzojnë shkresën me kohë, atëherë shkresa kthehet në gjykatë me një shënim në fletë dorëzimin se ku ndodhet adresati.

#### Neni 114

Nëse dorëzimi i shkresës subjektit të regjistruar në regjistrin publik nuk mund t'i bëhet në adresën e treguar në regjistër, komunikimi bëhet duke u ngjitur shkresa në tabelën e shpalljeve të gjykatës, dorëzimi konsiderohet i kryer pas skadimit të afatit prej shtatë ditësh nga dita e afishimit në tabelën e shpalljeve të gjykatës.

#### Neni 115

- 115.1 Nëse dorëzimi i shkresës personit fizik sipas dispozitave të nenit 110 dhe 113 të këtij ligji nuk është i mundshëm, komunikuesi do ta kthejë shkresën në gjykatën që ka urdhëruar dërgimin. Nëse kemi të bëjmë me komunikimin nëpërmjet postës, shkresa i kthehet postës së vendbanimit të adresatit. Në derën, përkatësisht në kutinë postare të adresës së vendbanimit lehet njoftimi në të cilin tregohet vendi ku ndodhet shkresa, afati prej pesëmbëdhjetë (15) ditësh brenda të cilit adresati duhet ta marrë shkresën, dita në të cilën lajmërimi i është dorëzuar personit që e ka pranuar dhe nënshkrimi i dorëzuesit. Në shkresën e kthyer tregohet emri i komunikuesit, shkaku për veprimin në këtë mënyrë dhe dita në të cilën lajmërimi i është lënë marrësit.
- 115.2 Nëse adresati nuk e merr shkresën brenda afatit prej pesëmbëdhjetë (15) ditësh supozohet se është kryer komunikimi në ditën kur në derën, përkatësisht në kutinë postare është lënë njoftimi.
- 115.3 Për dërgimin e kryer në mënyrën e përcaktuar në këtë nën duhet njoftuar gjykatën që e ka urdhëruar dërgimin e shkresës.

#### Ndërrimi i adresës (§ 116)

#### Neni 116

- 116.1 Nëse pala ose përfaqësuesi i saj, gjatë zhvillimit të procedurës ose para se të kalojë afati prej gjashtë muajsh pas përfundimit të procedurës me vendim të

formës së prerë, e ndërrojnë adresën në të cilën bëhet dorëzimi i shkresave kanë për detyrë që për këtë gjë ta njoftojnë menjëherë gjykatën.

- 116.2 Nëse kundër vendimit të formës së prerë brenda afatit nga paragrafi 1 i këtij neni paraqitet revizioni, afati i tillë zgjatet deri sa të kalojnë gjashtë muaj nga dorëzimi i vendimit i dhënë sipas revizionit, me të cilin revizioni hidhet poshtë, refuzohet apo vendimi i goditur me revizion ndryshohet.
- 116.3 Nëse kundër vendimit të formës së prerë para se të skadojë afati nga paragrafi 1 i këtij neni, paraqitet propozimi për përsëritjen e procedurës, afati i tillë zgjatet deri sa të kalojë afati gjashtëmuajor pas marrjes së formës së prerë të vendimit të dhënë në procedurën e përsëritur, kundër të cilit nuk është paraqitur ankesa, përkatësisht nga skadimi i afatit gjashtëmuajor nga dita në të cilën palës i është dorëzuar vendimi i shkallës së dytë.
- 116.4 Nëse në procedurën sipas mjetit të goditjes së jashtëzakonshme prishet vendimi i formës së prerë dhe çështja kthehet në rigjykim, do të konsiderohet se afati nga paragrafi 1 i këtij neni as që ka filluar të ecë.
- 116.5 Nëse pala apo përfaqësuesi i saj nuk e njoftojnë menjëherë gjykatën për ndryshimin e adresës, gjykata do të urdhërojë që dërgimet e mëtutjeshme të shkresave të bëhen me anë të afishimit të tyre në tabelën e shpalljeve në gjykatë. Kjo mënyrë e komunikimit bëhet deri sa pala apo përfaqësuesi i saj ta njoftojë gjykatën për adresën e re të saj.
- 116.6 Komunikimi nga paragrafi 5 i këtij neni konsiderohet i kryer pas kalimit të shtatë ditëve nga dita e afishimit të shkresës në tabelën e shpalljeve të gjykatës.
- 116.7 Nëse përfaqësuesi për pranimin e shkresave e ndërron adresën deri në skadimin e afateve nga paragrafët 1-3 të këtij neni dhe për këtë nuk e njofton gjykatën, atëherë gjykata, me shpenzimet e palës, ia cakton palës përfaqësuesin për pranimin e shkresave nëpërmjet të cilit do t'i dorëzohen shkresat, derisa mos të njoftohet nga pala se ka caktuar përfaqësues të ri me prokurë.

#### Neni 117

Organi kompetent ka për detyrë që palës, e cila ka interes juridik t'ia komunikojë adresën e personit të cilit duhet bërë dorëzimi i shkresave. Interesi juridik provohet me certifikatën e gjykatës së çështjes për padinë e ngritur apo për ekzistimin e gjyqvarësisë.

## Përfaqësuesi për pranimin e shkresave (§ 118)

### Neni 118

- 118.1 Kur paditësi apo përfaqësuesi i tij ndodhet në botën e jashtme, e nuk kanë përfaqësues në Kosovë, kanë për detyrë që me rastin e paraqitjes së padisë në gjykatë të emërojnë përfaqësuesin për pranimin e shkresave. Nëse nuk veprojnë kështu, gjykata me shpenzimet e paditësit ia emëron këtij përfaqësuesin për marrjen e shkresave dhe nëpërmjet tij thërret paditësi apo përfaqësuesi i tij, që brenda afatit të caktuar ta emërojnë përfaqësuesin për marrjen e shkresave. Nëse pala apo përfaqësuesi i saj nuk e cakton përfaqësuesin për marrjen e shkresave brenda afatit të caktuar, gjykata e hedhë poshtë padinë me anë të aktvendimit të cilin ia dërgon paditësit, apo përfaqësuesit të tij, nëpërmjet përfaqësuesit për marrjen e shkresave të emëruar nga ajo.
- 118.2 Paditësin apo përfaqësuesin e tij ligjor që ndodhet në botën e jashtme, që nuk kanë përfaqësues në Kosovë, gjykata, qysh me rastin e dërgimit të shkresës së parë, i thërret që brenda afatit të caktuar të emërojnë përfaqësuesin për marrjen e shkresave në Kosovë, me kërcënim se në të kundërtën gjykata paditësit, me shpenzime të tij, do t'ia emërojë edhe përfaqësuesin për marrjen e shkresave nëpërmjet të cilit do të lajmërohet paditësi, gjegjësisht përfaqësuesi i tij, për emërimin e bërë në këtë mënyrë.
- 118.3 Palës që e revokon përfaqësuesin për pranimin e shkresave, pa e caktuar një përfaqësues tjetër për një gjë të tillë, gjykata ia komunikon shkresat duke i afishuar në tabelën e shpalljeve në gjykatë, derisa pala e tillë ta caktojë përfaqësuesin tjetër për pranimin e shkresave.
- 118.4 Nëse përfaqësuesi për pranimin e shkresave heqë dorë nga autorizimi, e pala nuk emëron përfaqësues tjetër brenda afatit prej tridhjetë (30) ditësh nga dita kur gjykata është njoftuar për heqjen dorë nga autorizimi, gjykata palës, me shpenzimet e kësaj të dytës, ia emëron përfaqësuesin për pranimin e shkresave dhe nëpërmjet këtij ia dërgon të gjitha shkresat derisa mos të marrë njoftim nga pala për emërimin e përfaqësuesit të ri.
- 118.5 Shpenzimet për përfaqësuesin e emëruar të paditësit, apo të të paditurit, për pranimin e shkresave, ka për detyrë t'i deponojë paditësi. Nëse paditësi nuk e bënë deponimin e duhur, padia do të hedhet poshtë.
- 118.6 Dispozitat për emërimin e përfaqësuesit për pranimin e shkresave për palën e paditur përshtatshmërisht do të aplikohen edhe për njoftimin e personit të tretë për procedurën e iniciuar, si dhe për emërimin e para ardhësit juridik.

## Neni 119

- 119.1 Nëse më tepër persona bashkërisht padisin, e nuk kanë përfaqësues ligjor të njëjtë, e as përfaqësues të përbashkët me prokurorë, gjykata mund t'i thërras që brenda afatit të caktuar ta emërojnë përfaqësuesin e përbashkët për pranimin e shkresave. Njëkohësisht, gjykata do t'i njoftojë paditësit se cilin prej tyre gjykata do ta konsiderojë përfaqësues të përbashkët për pranimin e shkresave, nëse ata vetë nuk e emërojnë përfaqësuesin e tillë.
- 119.2 Dispozitat e paragrafit 1 të këtij neni do të zbatohen edhe kur janë paditur disa persona si bashkëndërgjyqës unik.

## Dërgimi i shkresave nga palët (§ 120)

### Neni 120

- 120.1 Dërgimi i shkresave palës kundërshtare, përveç shkresave që duhet dorëzuar personalisht, mund të bëhet me pëlqimin e gjykatës, edhe nga vet pala.
- 120.2 Në rastin nga paragrafi 1 i këtij neni, pala një ekzemplar do t'ia dërgojë palës kundërshtare në pajtim me dispozitat e këtij ligji mbi komunikimin, kurse ekzemplarën tjetër gjykatës, me njoftim se palës tjetër i është bërë dërgimi që më parë.
- 120.3 Dërgimi i bërë në mënyrën e përcaktuar me paragrafin 2 të këtij neni konsiderohet se është mënyrë e rregullt e komunikimit.

## Fletëdërgesa (§ 121)

### Neni 121

- 121.1 Vërtetimin mbi dorëzimin e bërë të shkresës (dëftesën e komunikimit) e nënshkruajnë marrësi dhe dorëzuesi. Marrësi do ta shkruajë vetë me shkronja në dëftesën e komunikimit datën e marrjes së shkresës.
- 121.2 Nëse marrësi nuk di shkrim-lexim, apo nuk është në gjendje të nënshkruhet, dorëzuesi do të shkruajë emrin dhe mbiemrin e tij, e me shkronja ditën e marrjes së shkresës dhe do të vejë shënim për ç'arsye marrësi nuk e ka firmosur vetë dëftesën e komunikimit.
- 121.3 Nëse marrësi refuzon ta firmosë dëftesën e komunikimit, komunikuesi do ta konstatojë një gjë të tillë në dëftesën e komunikimit dhe do ta shkruajë me shkronja datën e dorëzimit dhe kështu konsiderohet se është kryer dorëzimi i rregullt.

- 121.4 Nëse komunikimi është kryer sipas dispozitës së paragrafit 2 të nenit 110 të këtij ligji, në dëftesën e komunikimit, përpos vërtetimit mbi marrjen e shkresës, do të shënohet se me parë është bërë njoftimi me shkrim.
- 121.5 Në rast se sipas dispozitave të këtij ligji shkresa i është dorëzuar personit tjetër, e jo atij që është dashur t'i dorëzohet, në dëftesën e komunikimit komunikuesi do të shënojë se në çfarë marrëdhënie ndodhen këta dy persona.
- 121.6 Nëse në dëftesën e komunikimit është shënuar gabimisht data e dorëzimit, do të konsiderohet se dorëzimi është bërë atë ditë kur është dorëzuar shkresa faktikisht.
- 121.7 Nëse dëftesa e komunikimit është humbur, fakti i dorëzimit të shkresës mund të provohet edhe në mënyrë tjetër.

Shikimi dhe përshkrimi i shkresave në dosjen e lëndës (§ 122)

#### Neni 122

- 122.1 Palët kanë të drejtë t'i shikojnë dhe t'i përshkruajnë shkresat e dosjes së lëndës së procedurës në të cilën marrin pjesë.
- 122.2 Personave që kanë interes të arsyeshëm, mund t'u lejohet shikimi dhe përshkrimi i shkresave të veçanta të dosjes së lëndës.
- 122.3 Kur procedura është në zhvillim e sipër, lejen për shikim dhe përshkrim e jep gjyqtari i lëndës, kurse kur procedura ka përfunduar, kryetari i gjykatës apo punëtori i gjykatës, të cilin e ka caktuar kryetari.

### KREU IX - SEANCAT DHE AFATET (§§ 123 – 133)

#### Seancat (§ 123)

#### Neni 123

- 123.1 Seancën e caktion gjykata sa herë që një gjë të tillë e parashikon ligji ose kur e kërkojnë nevojat e procedurës.
- 123.2 Kundër aktvendimit mbi caktimin e seancës nuk lejohet ankesa.
- 123.3 Gjykata i thërret palët dhe personat tjerë në seancë, praninë e të cilëve e konsideron të nevojshme. Bashkë me letërthirrjen palës i dërgohet parashtrësja që ka dhënë shkas për caktimin e seancës, kurse në letërthirrje

tregohet vendi dhe koha e mbajtjes së seancës. Nëse bashkë me letërthirrjen nuk dërgohet parashtrësja, në letërthirrje do të tregohen palët ndërgjyqëse, objekti i kontestit si dhe aktiviteti që do të ushtrohet në seancë.

- 123.4 Gjykata posaçërisht, me anë të letërthirrjes, i paralajmëron palët dhe pjesëmarrësit e tjerë për pasojat ligjore për mosardhje në seancë.
- 123.5 Pala që ka ardhur në seancë pas fillimit të saj nuk mund të kërkojë përsëritjen e veprimeve procedurale të kryera në mungesën e saj.

#### Neni 124

- 124.1 Seanca mbahet zakonisht në ndërtesën e gjykatës.
- 124.2 Gjykata mund të vendos që procesi të zhvillohet jashtë ndërtesës së gjykatës, nëse një gjë e tillë vlerësohet e nevojshme, nëse e lehtëson qasjen për cilëndo palë, ose nëse kjo kursen kohë, përpjekje dhe shpenzime procedurale.
- 124.3 Kundër aktvendimit për mbajtjen e seancës jashtë ndërtesës së gjykatës nuk lejohet ankesa.

#### Afatet (§ 125)

#### Neni 125

- 125.1 Nëse afatet nuk janë caktuar me ligj, ato i cakton gjykata, duke marrë parasysh rrethanat e rastit konkret.
- 125.2 Afati të cilin e cakton gjykata mund të zgjatet me propozimin e personit të interesuar, nëse për një gjë të tillë ekzistojnë shkaqet e arsyeshme.
- 125.3 Propozimi për zgjatjen e afatit duhet të paraqitet në gjykatën e çështjes para se të skadojë.
- 125.4 Kundër aktvendimit me të cilin pranohet apo refuzohet propozimi për zgjatjen e afatit gjyqësor nuk lejohet ankesa.

#### Neni 126

- 126.1 Afatet llogariten me ditë, muaj dhe vite.
- 126.2 Në qoftë se afati është caktuar me ditë, atëherë nga llogaritja përjashtohet dita, në të cilën ka filluar ngjarja ose koha nga e cila duhet të fillojë afati, kështu që për fillim të afatit merret dita e parë e ardhshme.

- 126.3 Afati që është caktuar në muaj ose në vite mbaron me kalimin e asaj dite të muajit të fundit që ka të njëjtin emër ose numër me atë të ditës që ka filluar afati.
- 126.4 Kur një ditë e tillë mungon në muajin e fundit, afati mbaron me kalimin e ditës së fundit të këtij muaji.
- 126.5 Kur dita e fundit e një afati bie në ditë feste shtetërore apo ditën e diel ose në ndonjë ditë tjetër kur nuk punon gjykata, afati mbaron në ditën e punës, që vjen pas asaj të pushimit.

#### Neni 127

- 127.1 Kur parashtrësja është e lidhur me afat, konsiderohet se është parashtruar me kohë, nëse i është dorëzuar gjykatës para se të ketë mbaruar afati.
- 127.2 Nëse parashtrësja është dërguar me anë të postës me letër rekomande apo në rrugë telegrafike, dita e dorëzimit në postë konsiderohet si ditë e dorëzimit në gjykatën të cilës i është drejtuar. Nëse parashtrësja është dërguar me anë të telefaksit si ditë e dorëzimit konsiderohet dita kur telefaksi është pranuar në gjykatë.
- 127.3 Nëse parashtrësja është dërguar në rrugë telegrafike pa i përmbajtur të gjitha elementet e domosdoshme për të vepruar sipas saj, konsiderohet se është parashtruar brenda afatit, vetëm nëse brenda afatit prej tre (3) ditësh nga dita kur telegrami i është dorëzuar postës, në gjykatë dorëzohet parashtrësja drejtpërsëdrejti apo me anë të letrës rekomande.
- 127.4 Nëse parashtrësja dërgohet me anë të postës elektronike, si kohë e dorëzimit në gjykatë konsiderohet koha e treguar në verifikimin e nënshkrimit elektronik të kualifikuar.
- 127.5 Për personat që ndodhën në ushtri në shërbim të detyrueshëm ushtarak, dita e dorëzimit të parashtrësës në njësinë ushtarake, gjegjësisht në institucionin ushtarak konsiderohet si ditë e dorëzimit në gjykatë. Kjo vlen edhe për personat e tjerë në ushtri që janë në shërbim në njësitë ushtarake, gjegjësisht në institucionet ushtarake, në vendet në të cilat nuk ekziston posta e rregullt.
- 127.6 Për personat e privuar nga liria, dita e dorëzimit të parashtrësës në drejtorinë e burgut konsiderohet si ditë kur i është dorëzuar gjykatës.

#### Neni 128

- 128.1 Nëse parashtrësja që lidhet me afat i është dorëzuar apo dërguar gjykatës jokompetente brenda afatit, kurse në gjykatën kompetente arrin pas skadimit

të afatit, do të konsiderohet se është ruajtur afati Nëse paraqitja e saj në gjykatën jokompetente mund t'i vishet padijenisë apo gabimit të hapur të parashtruesit.

- 128.2 Dispozitat e nenit 127 të këtij ligji zbatohen edhe lidhur me afatin brenda të cilit, sipas dispozitave të posaçme, domosdo duhet të ngritet padia, si dhe lidhur me afatin për parashkrimin e kredive apo të ndonjë të drejte tjetër.

#### Kthimi në gjendjen e mëparëshme (§ 129)

##### Neni 129

- 129.1 Ne qoftë se pala nuk shkon në seancë fare apo e humbë afatin për kryerjen e ndonjë veprimi procedural dhe për këtë shkak e humb të drejtën që më vonë të kryejë veprimin procedural të lidhur me afat, gjykata do t'i lejojë kësaj pale, me propozimin e saj, ta kryejë më vonë këtë veprim, nëse e konstaton se ekzistojnë shkaqe të arsyeshme të cilat nuk kanë mundur të parashikohen e as të evitohen.
- 129.2 Kur lejohet kthimi në gjendje të mëparshme procesi kontestimor kthehet në atë gjendje në të cilën ndodhej para mosveprimit dhe prishen të gjitha vendimet që i ka dhënë gjykata për shkak të mosveprimit.

##### Neni 130

- 130.1 Propozimi për kthimin në gjendje të mëparshme i paraqitet gjykatës, në të cilën është dashur të kryhet veprimi procedural i pakryer.
- 130.2 Propozimi duhet të paraqitet brenda afatit shtatë (7) ditor nga dita kur ka pushuar shkak i mosveprimit, e nëse pala më vonë ka mësuar për mosveprimin, atëherë afati llogaritet nga dita kur ka mësuar për mosveprimin.
- 130.3 Pas kalimit të gjashtëdhjetë (60) ditëve nga dita e mosveprimit nuk mund të kërkohet kthimi në gjendjen e mëparshme.
- 130.4 Nëse kthimi në gjendje të mëparshme kërkohet për shkak të mosruajtjes së afatit për kryerjen e veprimit procedural, propozuesi ka për detyrë që propozimit t'ia bashkëngjisë veprimin e shkruar procedural të pakryer me kohë.



#### Neni 131

Nuk lejohet kthimi në gjendje të mëparshme nëse nuk është ruajtur afati për paraqitjen e propozimit për kthimin në gjendje të mëparshme apo nëse pala nuk ka ardhur në seancën e caktuar për shqyrtimin e propozimit për kthimin në gjendjen e mëparshme.

#### Neni 132

- 132.1 Propozimi për kthimin në gjendje të mëparshme zakonisht nuk ndikon në rrjedhën e procedimit, por gjykata mund të vendos që procedimi të ndërpritet derisa të bëhet i formës së prerë aktvendimi mbi propozimin.
- 132.2 Nëse është paraqitur propozimi për kthimin në gjendjen e mëparshme gjatë zhvillimit të procedurës së shkallës së dytë, gjykata e shkallës së parë duhet ta njoftojë për propozimin e paraqitur gjykatën e shkallës së dytë.

#### Neni 133

- 133.1 Propozimin e paraqitur pas afatit, apo propozimin e palejueshëm për kthimin në gjendjen e mëparshme gjykata e hedhë poshtë me anë të aktvendimit.
- 133.2 Lidhur me propozimin për kthimin në gjendjen e mëparshme gjykata cakton seancë vetëm kur një gjë të tillë e propozon pala shprehimisht. Nëse faktet në të cilat mbështetet propozimi janë të ditura botërisht (notore) gjykata nuk cakton seancë në asnjë rast. Po në këtë mënyrë gjykata vepron edhe kur faktet, në të cilat mbështetet propozimi janë qartë të pajustificueshme, por edhe kur gjykata ka prova të mjaftueshme në dosjen e lëndës për dhënien e vendimit sipas propozimit për kthimin në gjendjen e mëparshme.
- 133.3 Kundër aktvendimit, me të cilin aprovohet propozimi për kthimin në gjendje të mëparshme nuk lejohet ankimi i veçantë.
- 133.4 Kundër aktvendimit me të cilin refuzohet propozimi për kthimin në gjendje të mëparshme nuk lejohet ankimi i veçantë, përveç kur propozimi paraqitet nga shkaku i dhënies së aktgjykimit për shkak të mungesës së palës së paditur nga seanca gjyqësore.

### KREU X – PROCESVERBALET (§§ 134 – 140)

#### Neni 134

- 134.1 Procesverbali përpilohet për veprimet e kryera në seancë gjyqësore.

- 134.2 Procesverbalin përpilohet edhe mbi deklaratat dhe njoftimet e rëndësishme që i bëjnë palët ose pjesëmarrësit e tjerë jashtë seancës. Për deklaratat dhe njoftimet më pak të rëndësishme nuk përpilohet procesverbal, por vetëm do të vihet shënim zyrtar në mbështjellësin e lëndës.
- 134.3 Procesverbalin e shkruan procesmbajtësi.

#### Neni 135

- 135.1 Procesverbalin duhet t'i përmbajë: emrin e gjykatës, vendin ku kryhet veprimi, ditën dhe orën kur kryhet veprimi, objektin e kontestit dhe emrat e palëve të pranishme ose të personave të tjerë, si dhe të përfaqësuesve ligjorë ose me prokurë të tyre.
- 135.2 Procesverbalin duhet të përmbajë të dhëna esenciale për përmbajtjen e veprimit të kryer. Në procesverbalin e seancës për shqyrtimin kryesor të çështjes duhet të përfshihet sidomos: nëse seanca është mbajtur me dyer të hapura apo të mbyllura, përmbajtja e deklaratave të palëve, propozimet e tyre, provat që i kanë ofruar, provat që janë shfrytëzuar, duke u treguar përmbajtja e thënieve të dëshmitarëve dhe ekspertëve, vendimet e gjykatës të marra në seancë, por edhe vendimi burimor i dhënë pas përfundimit të seancës për shqyrtimin kryesor të çështjes juridike.

#### Neni 136

Procesverbalin duhet të mbahet rregullisht dhe në të nuk guxon të fshihet asgjë, të shtohet ose të ndryshohet. Pjesët e tija të anuluar duhet të mbeten të lexueshme.

#### Neni 137

- 137.1 Procesverbalin përpilohet duke i treguar gjyqtari procesmbajtësit me zë se çka do të shkruajë në procesverbal. Me lejen e gjyqtarit, pjesëmarrësit në procedurë mund ta diktojnë përmbajtjen e deklaratave të tyre në procesverbal nëpërmjet procesmbajtësit.
- 137.2 Palët kanë të drejtë ta lexojnë ose të kërkojnë që t'u lexohet procesverbalin, si dhe të paraqesin kundërshtimet e veta në përmbajtjen e procesverbalit. Këtë të drejtë e kanë edhe personat e tjerë, deklarata e të cilëve është përfshirë në procesverbal, por vetëm sa i përket pjesës së procesverbalit që e përmban deklaratën e tyre.
- 137.3 Korrigjimet apo shtesat lidhur me kundërshtimet e palëve apo të personave të tjerë në përmbajtjen e procesverbalit, apo me iniciativën e gjyqtarit, bëhen në fundin e procesverbalit. Me kërkesën e subjekteve të përmendura

shkruhen në procesverbal edhe kundërshtimet e tyre të pa aprovuara nga gjyqtari.

#### Neni 138

- 138.1 Gjyqtari mund të vendos që procesverbali të mbahet me anë të mjeteve teknike gjegjëse, apo me anë të stenografimit.
- 138.2 Në pikëpamje të kundërshtimeve lidhur me përmbajtjen e procesverbalit nga paragrafi 1 i këtij neni në mënyrë adekuate zbatohen dispozitat e nenit 137 paragrafëve 2 dhe 3 të këtij ligji.
- 138.3 Nëse procesverbali nuk është mbajtur në formë të shkruar, procesverbali i shkruar duhet të përpilohet brenda afatit prej tri ditësh. Brenda tri ditëve të tjera palët kanë të drejtë ta shikojnë dhe kopjojnë procesverbalin e shkruar dhe të bëjnë kundërshtime lidhur me parregullsitë eventuale të tij.
- 138.4 Mbi kundërshtimin nga paragrafi 3 i këtij neni vendos gjyqtari jashtë seance.
- 138.5 Shiriti i magnetofonit mund të shlyhet pas skadimit të afatit për kundërshtim, e nëse pala ka bërë kundërshtim lidhur me saktësinë e procesverbalit, pasi të bëhet i formë së prerë vendimi mbi çështjen kryesore.

#### Neni 139

- 139.1 Procesverbali nënshkruhet nga gjyqtari, procesmbajtësi, palët, përkatësisht nga përfaqësuesi ligjor apo me prokurë i palës, si dhe nga interpreti.
- 139.2 Dëshmitari dhe eksperti e nënshkruajnë deklaratën e vet në procesverbal vetëm atëherë kur dëgjimi i tyre bëhet në gjykatën e porositur.
- 139.3 Personi që nuk dinë shkrim dhe lexim ose personi që nuk mund të nënshkruhet do të vejë në procesverbal shenjën e gishtit tregues, kurse procesmbajtësi e shkruan nën shenjën e gishtit emrin dhe mbiemrin e tij.
- 139.4 Nëse pala, përfaqësuesi ligjor apo me prokurë i saj, dëshmitari apo eksperti largohet para se të nënshkruhet në procesverbal apo refuzon të nënshkruhet, kjo rrethanë shënohet në procesverbal dhe tregohet arsyeja e mos nënshkrimit.

#### Neni 140

- 140.1 Nëse vendimi merret në trup gjykues, për këshillimin dhe votimin përpilohet procesverbal i veçantë. Nëse në gjykatën e lartë, lidhur me mjetin e goditjes së vendimit, vendimi është marrë unanimisht, nuk do të përpilohet

procesverbal, por në vendimin burimor do të vihet shënim për këshillimin dhe votimin.

- 140.2 Procesverballi mbi këshillimin dhe votimin duhet të përmbajë rrjedhën e votimit dhe vendimin që është marrë. Procesverballin e nënshkruajnë anëtarët e trupit gjykues dhe procesmbajtësi.
- 140.3 Procesverballi mbi këshillimin dhe votimin mbyllet në një zarf të veçantë.
- 140.4 Ky procesverbal mund të shikohet vetëm nga gjykata më e lartë kur vendos mbi mjetin juridik, e në këtë rast procesverballi do të mbyllet përsëri në një kopertinë të veçantë në të cilën do të shënohet se procesverballi është shikuar.

## KREU XI - VENDIMET GJYQËSORE (§§ 141 – 169)

### Neni 141

- 141.1 Kur Gjykata Evropiane për të Drejtat e Njeriut konstaton se është shkelur ndonjë e drejtë ose liri themelore e njeriut e paraparë në Konventën Evropiane për Mbrojtjen e të Drejtave dhe të Lirive të Njeriut dhe në Protokollin plotësues të Konventës, pala brenda afatit prej tridhjetë (30) ditësh nga dita që ka marrë formë të prerë vendimi i Gjykatës Evropiane për të Drejtat e Njeriut, mund të parashtrijë kërkesë për ndryshimin e vendimit me të cilin është shkelur ajo.
- 141.2 Kërkesa parashtrihet në Gjykatën e Kosovës që ka vepruar në shkallë të parë, në procedurën në të cilën është marrë vendimi, me të cilin është shkelur e drejta ose liria themelore e njeriut.
- 141.3 Në procedurën sipas kërkesës për ndryshimin e vendimit me të cilin është shkelur e drejta apo liria e njeriut, në mënyrë të përshtatshme zbatohen dispozitat e këtij ligji për përsëritjen e procedurës.
- 141.4 Në procedurën e përsëritur gjykata është e detyruar që t'i marrë në konsideratë qëndrimet e shprehura në vendimin e formës së prerë të Gjykatës Evropiane për të Drejtat e Njeriut me të cilin është konstatuar shkelja e të drejtave dhe lirive themelore të njeriut.

### Neni 142

- 142.1 Gjykata merr vendime në seancë gjyqësore apo jashtë seance.
- 142.2 Gjykata merr vendime në formë të aktgjykimit apo të aktvendimit.

- 142.3 Mbi kërkesëpadinë gjykata vendos me aktgjykim, kurse në procedurën sipas padisë për shkak të pengimit të posedimit me aktvendim.
- 142.4 Në procedurën e dhënies së urdhërpagesës aktvendimi me të cilin aprovet kërkesëpadia jepet në formë të urdhërpagesës.
- 142.5 Për të gjitha çështjet tjera gjykata vendos me anë të aktvendimit.
- 142.6 Vendimi mbi shpenzimet procedurale i përmbajtur në aktgjykim konsiderohet aktvendim.

## AKTGJYKIMI

### Neni 143

- 143.1 Me aktgjykim gjykata vendos mbi kërkesën lidhur me çështjen kryesore dhe me kërkesat aksesore.
- 143.2 Nëse me një padi janë përfshirë disa kërkesëpadi, gjykata, zakonisht vendos për të gjitha me një aktgjykim të vetëm.
- 143.3 Nëse gjykata i ka bashkuar disa procedime me qëllim të shqyrtimit të përbashkët të çështjeve, kurse për vendosje përfundimtare është pjekur vetëm njëra nga to, mund të jepet aktgjykimi vetëm për çështjen e tillë.

### Neni 144

- 144.1 Gjkata mund ta urdhërojë palën e paditur që ta përmbushë premtimin e caktuar vetëm Nëse kërkesa e paditësit është bërë e realizueshme para se të përfundojë shqyrtimi kryesor i çështjes.
- 144.2 Nëse gjykata e aprovon kërkesën për ushqim ligjor apo për kompensimin e dëmit në formë të rentës, për shkak të fitimit të humbur, apo të ardhurave tjera nga puna, i padituri mund të detyrohet edhe për premtimet që ende nuk janë bërë të realizueshme.
- 144.3 Nëse premtimi që është objekt i kërkesëpadisë nuk është bërë i kërkueshëm deri në përfundimin e shqyrtimit kryesor, gjykata e refuzon kërkesëpadinë si të parakohshme.

### Neni 145

Nëse paditësi ka kërkuar që i padituri ta dorëzojë sendin e caktuar duke deklaruar këtë në padi ose deri në përfundimin e shqyrtimit kryesor deklaroi se pranon që në vend të sendit të kërkuar t'i paguhet një shumë e të hollave, atëherë, nëse e aprovon

kërkesëpadinë gjykata mund të konstatojë në aktgjykim se i padituri do të lirohet nga detyrimi i dorëzimit të sendit nëse e paguan shumën e tillë të të hollave.

#### Neni 146

- 146.1 Kur pala me aktgjykim urdhërohet që ta përmbushë ndonjë prestim, do të caktohet edhe afati brenda te cilit duhet të përmbushet ai.
- 146.2 Nëse me dispozita të posaçme nuk është përcaktuar ndryshe, afati për përmbushjen e pretimit është pesëmbëdhjetë (15) ditor, por për detyrimet që nuk përbëhen në të holla gjykata mund të caktojë afat më të gjatë. Në kontestet nga marrëdhëniet në të cilat është dhënë kambiali apo çeku afati për përmbushjen e detyrimit është shtatë (7) ditor.
- 146.3 Afati për përmbushjen e pretimit fillon të ecë ditën e parë pas dorëzimit të aktgjykimit palës së urdhëruar për përmbushjen e pretimit.

#### a) Aktgjykimi i pjesshëm (§ 147)

#### Neni 147

- 147.1 Nëse prej disa kërkesëpadive, për shkak të pohimit ose në bazë të shqyrtimit të mjaftueshëm, njëra ose disa sosh, janë pjekur për vendim definitiv dhe meritore apo nëse vetëm pjesa e një kërkesë është pjekur për vendim meritor, gjykata mund, në pikëpamje të kërkesave të përgatitura, përkatësisht të pjesës së kërkesës së përgatitur, ta përfundojë shqyrtimin dhe ta jep aktgjykimin (aktgjykimin i pjesshëm).
- 147.2 Aktgjykimin e pjesshëm gjykata mund ta jep edhe kur është ngritur kundërpadija nga pala e paditur, Nëse për vendim është përgatitur vetëm kërkesa e padisë apo vetëm kërkesa e kundërpadisë.
- 147.3 Gjatë vlerësimit nëse duhet dhënë aktgjykimin i pjesshëm gjykata e merr në konsideratë sidomos madhësinë e kërkesës apo të pjesës së kërkesës që është përgatitur për vendim.
- 147.4 Në gjykimin në të cilin me padi apo kundërpadi janë përfshirë më tepër kërkesa nuk lejohet dhënia e aktgjykimit të pjesshëm Nëse për shkak të natyrës së raportit kontestues për themelësinë e kërkesave të tilla mund të vendo set vetëm me anë të një aktgjykimi.
- 147.5 Në pikëpamje të mjeteve të goditjes dhe përmbartimit aktgjykimin i pjesshëm konsiderohet si vendim i pavarur.

b) aktgjykimi ne baze te pohimit (§ 148)

Neni 148

- 148.1 Nëse i padituri deri në përfundimin e shqyrtimit kryesor të çështjes e pohon kërkesëpadinë pjesërisht apo tërësisht, gjykata e jep, pa shqyrtim të mëtejshëm, aktgjykimin me të cilin e aprovon pjesën apo gjithë kërkesëpadinë (aktgjykimi në bazë të pohimit).
- 148.2 Gjukata nuk e jep aktgjykimin në bazë të pohimit, edhe pse janë plotësuar kushtet e nevojshme, Nëse konstaton se është fjala për kërkesën me të cilën palët nuk mund të disponojnë lirisht (paragrafi 3 i nenit 3 të këtij ligji).
- 148.3 Dhënia e aktgjykimit në bazë të pohimit mund të shtyhet për më vonë nëse është e nevojshme që për rrethanat nga paragrafi 2 i këtij neni të merren njoftimet e duhura.
- 148.4 Deklaratën mbi pohimin e kërkesëpadiës i padituri mund ta revokojë gojarisht në seancë gjyqësore, apo me anë të parashtrësës jashtë seancës gjyqësore, edhe pa pëlqimin e paditësit, deri në momentin e dhënies së aktgjykimit.

c) Aktgjykimi në bazë të heqjes dorë nga kërkesëpadia (§ 149)

Neni 149

- 149.1 Nëse paditësi, deri në përfundimin e seancës për shqyrtim kryesor të çështjes heq dorë nga një pjesë e kërkesëpadiës apo nga e gjithë kërkesëpadia, gjykata pa shqyrtim të mëtejshëm e jep aktgjykimin me të cilin e refuzon kërkesëpadinë në pjesën nga e cila paditësi ka hequr dorë apo në tërësi (aktgjykimi në bazë të heqjes dorë).
- 149.2 Për heqje dorë nga kërkesëpadia nuk nevojitet pëlqimi i palës së paditur.
- 149.3 Gjukata nuk e jep aktgjykimin në bazë të heqjes dorë nga kërkesëpadia edhe pse janë plotësuar kushtet e nevojshme për një gjë të tillë, Nëse konstaton se është fjala për kërkesën me të cilën palët nuk kanë të drejtë të disponojnë lirisht (paragrafi 3 i nenit 3 të këtij ligji).
- 149.4 Dhënia e aktgjykimit në bazë të heqjes dorë nga kërkesëpadia shtyhet për më vonë Nëse është e nevojshme që të merren njoftime për rrethanat e paragrafit 3 të këtij neni.
- 149.5 Deklarata me të cilën është bërë heqja dorë nga kërkesëpadia gojarisht në seancë gjyqësore ose me anë të parashtrësës jashtë seancës gjyqësore, mund

të revokohet nga pala paditëse edhe pa pëlqimin e palës së paditur, deri në momentin e dhënies së aktgjykimit.

d) Aktgjykimi për shkak të padëgjueshmërisë / mosbindjes (§ 150)

Neni 150

- 150.1 Nëse i padituri, brenda afatit të përcaktuar me këtë ligj, nuk e paraqet në gjykatë përgjigjen në padi, gjykata jep aktgjykim me të cilin e aprovon kërkesëpadinë (aktgjykimi për shkak të mosbindjes) nëse janë plotësuar këto kushte:
- a) Nëse të paditurit i është dorëzuar rregullisht padia dhe thirrja për dhënien e përgjegjës në padi;
  - b) Nëse themelësia e kërkesëpadisë del nga faktet e treguara në padi;
  - c) Nëse faktet mbi të cilat mbështetet kërkesëpadia nuk janë në kundërshtim me provat që i ka propozuar vet paditësi apo me faktet e ditura botërisht.
- 150.2 Nuk do të jepet aktgjykimi për shkak të mosbindjes përkundrejt plotësimit të kushteve nga paragrafi 1 i këtij neni, nëse gjykata konstaton se është fjala për kërkesën me të cilën palët nuk kanë të drejtë të disponojnë lirisht (paragrafi 3 i nenit 3 të këtij ligji).
- 150.3 Dhënia e aktgjykimit kontumacional do të shtyhet nëse ka nevojë që për rrethanat nga paragrafi 2 i këtij neni të merren njoftime të duhura.
- 150.4 Nëse nga faktet e treguara në padi nuk del themelësia e kërkesëpadisë, gjykata cakton seancë përgatitore dhe Nëse ne seancën e këtillë paditësi nuk e ndryshon padinë, jep aktgjykim me të cilin e refuzon kërkesëpadinë.
- 150.5 Kundër aktvendimit të gjykatës me të cilin refuzohet propozimi i paditësit që të jepet aktgjykimi kontumacional nuk lejohet ankimi.
- 150.6 Në rastet nga paragrafi 3 i këtij neni aktgjykimi kontumacional mund të jepet edhe pa u dëgjuar palët.

e) Aktgjykimi për shkak të mungesës (§ 151)

Neni 151

- 151.1 Kur të paditurit padia nuk i është dërguar për përgjigje, por vetëm bashkë me letërthirrje për në seancë përgatitore, e ai nuk vjen në seancë deri në përfundimin e saj, apo në seancën e parë për shqyrtim kryesor, nëse seanca



përgatitore nuk është caktuar fare, gjykata, me propozimin e paditësit apo sipas detyrës zyrtare e jep aktgjykimin me të cilin aprovohet kërkesëpadia (aktgjykimi për shkak të mungesës) Nëse plotësohen këto kushte:

- a) nëse i padituri është thirrur rregullisht për në seancë;
- b) nëse i padituri nuk e ka kontestuar kërkesëpadinë me anë të parashtrësës;
- c) nëse themelësia e kërkesëpadisë del nga faktet e treguara në padi;
- d) nëse faktet në të cilat bazohet kërkesëpadia nuk janë në kundërshtim me provat e paraqitura nga vetë paditësi apo me faktet e ditura botërisht;
- e) nëse nuk ekzistojnë rrethana notore nga të cilat del përfundimi se e kanë penguar të paditurin shkaqe të arsyeshme që të vijë në seancë.

151.2 Nuk do të jepet aktgjykimi për shkak të mungesës përkundrejt plotësimit të kushteve nga paragrafi 1 i këtij neni, nëse gjykata konstaton se është fjala për kërkesën me të cilën palët nuk kanë të drejtë të disponojnë lirisht (paragrafi 3 neni 3 i këtij ligji).

151.3 Dhënia e aktgjykimit për shkak të mungesës shtyhet nëse ka nevojë që për rrethanat e paragrafit 2 të këtij neni të merren njoftimet e duhura.

151.4 Nëse nga faktet e treguara në padi nuk del themelësia e kërkesëpadisë, kurse padia në seancën gjyqësore nuk është ndryshuar nga pala paditëse, gjykata do të jep aktgjykimin me të cilin refuzohet kërkesëpadia si e pa themeltë.

151.5 Kundër aktvendimit me të cilin refuzohet propozimi i paditësit për dhënien e aktgjykimit për shkak të mungesës nuk lejohet ankimi.

151.6 Në rastet e përcaktuara në paragrafin 3 të këtij neni aktgjykimin për shkak të mungesës gjykata mund ta jap pa dëgjimin e palëve.

f) Aktgjykimi pa shqyrtim kryesor të çështjes (§ 152)

#### Neni 152

Nëse i padituri me anë të përgjigjes në padi i ka pohuar faktet vendimtare, përkundrejt kontestimit të kërkesëpadisë, gjykata mund të jep aktgjykim pa caktuar seancë gjyqësore (neni 143 dhe 147 të këtij ligji) nëse nuk ekzistojnë pengesa të tjera për dhënien e tij.

Dhënia, hartimi me shkrim dhe dërgimi i aktgjykimit (§ 153)

#### Neni 153

- 153.1 Gjykata e jep aktgjykimin më së voni brenda afatit prej pesëmbëdhjetë (15) ditësh nga dita e përfundimit të shqyrtimit kryesor. Koha në të cilën jepet aktgjykimi quhet dita në të cilën ai hartohet me shkrim.
- 153.2 Nëse gjyqtari e kalon afatin nga paragrafi 1 i këtij neni, ai ka për detyrë që me shkrim ta njoftojë kryetarin e gjykatës për shkaqet e tejkalimit të tij.

#### Neni 154

- 154.1 Pas përfundimit të shqyrtimit kryesor gjykata i njofton palët e pranishme për ditën e dhënies së aktgjykimit. nëse ndonjëra nga palët nuk ka marrë pjesë në seancën për shqyrtimin kryesor, gjykata me shkrim do të njoftojë atë për ditën e dhënies së aktgjykimit.
- 154.2 Nëse palët janë njoftuar rregullisht për ditën e dhënies së aktgjykimit, afati për ankim kundër aktgjykimit fillon të ecë ditën e nesërme pas dorëzimit të aktgjykimit.

#### Neni 155

- 155.1 Në rastet e jashtëzakonshme, gjykata mund të vendos që dërgimi i aktgjykimit të bëhet edhe në një mënyrë tjetër të përshtatshme, por jo në kundërshtim me dispozitat e këtij ligji.
- 155.2 Palës e cila nuk ka qen e njoftuar rregullisht për ditën e dhënies së aktgjykimit, gjykata detyrimisht ia dërgon aktgjykimin në pajtim me dispozitat e këtij ligji për dërgimin e shkresave.

#### Neni 156

Aktgjykimi kontumacional, aktgjykimi për shkak të mungesës dhe aktgjykimi i gjykatës së shkallës së dytë i dhënë pa u mbajtur seanca për shqyrtim të çështjes juridike, i dërgohet palëve në pajtim me dispozitat e këtij ligji për dërgimin e shkresave.

#### Neni 157

Në rastin nga neni 153 paragrafi 2 i këtij ligji, gjykata posa të konstatojë se do të shtyhet dita e dhënies së aktgjykimit, do t'i njoftojë palët për një gjë të tillë, kurse aktgjykimi i dhënë do tu dërgohet palëve sipas dispozitave të këtij ligji mbi dërgimin e shkresave.

## Neni 158

Në rastet nga nenet 155,156 dhe 157 të këtij ligji afati për paraqitjen e mjetit të goditjes fillon të ecë nga dita e nesërme në të cilën palës i dorëzohet aktgjykimi.

## Neni 159 .

Aktgjykimin burimor e nënshkruan gjyqtari.

## Neni 160

- 160.1 Aktgjykimi i përpiluar me shkrim duhet ta ketë: pjesën hyrëse, dispozitivin, arsyetimin dhe udhëzimin mbi të drejtën e ankimit kundër aktgjykimit.
- 160.2 Pjesa hyrëse e aktgjykimit përmban: emrin e gjykatës, emrin dhe mbiemrin e gjyqtarit, emrin dhe mbiemrin, vendbanimin, gjegjësisht vendqëndrimin e palëve, të përfaqësuesve të tyre ligjor dhe me prokurë, tregimin e shkurtër të objektit të kontestit dhe vlerën e tij, ditën e përfundimit të shqyrtimit kryesor, tregimin e palëve, të përfaqësuesve të tyre ligjor dhe me prokurë që kanë qenë të pranishëm në seancën për shqyrtimin e tillë si dhe ditën kur është dhënë aktgjykimi.
- 160.3 Dispozitivi i aktgjykimit përmban: vendimin me të cilin aprovohen apo refuzohen kërkesat e veçanta që kanë të bëjnë me çështjen kryesore dhe kërkesat aksesore, vendimin për ekzistimin apo mosekzistimin e kërkesës së parashtruar me qëllim kompensimi të saj me kërkesëpadinë si dhe vendimin mbi shpenzimet procedurale.
- 160.4 Arsyetimi i aktgjykimit përmban: kërkesat e palëve, faktet që i kanë parashtruar palët, provat që i kanë propozuar palët, cilat fakte i ka vërtetuar, pse dhe si i ka vërtetuar ato fakte, cilat prova i ka shfrytëzuar gjykata dhe si i ka vlerësuar ato e nëse i ka vërtetuar faktet me anë të provave.
- 160.5 Gjykata posaçërisht tregon se cilat dispozita të së drejtës materiale i ka zbatuar me rastin e vendosjes mbi kërkesat e palëve. Kur është nevoja gjykata deklarohej edhe lidhur me qëndrimet e palëve për bazën juridike të kontestit, si dhe për propozimet dhe prapësimet e tyre, për të cilat gjykata nuk ka bërë arsyetime të vendimeve që i ka dhënë me herët gjatë procesit gjyqësor.
- 160.6 Në pjesën arsyetuese të aktgjykimit kontumacional, aktgjykimin në bazë të pohimit, aktgjykimin në bazë të heqjes dorë nga kërkesëpadia, apo të aktgjykimin për shkak të mungesës, jepen vetëm arsyet që e justifikojnë dhënien e aktgjykimeve të këtilla.

## Neni 161

Nëse palët pas shpalljes së aktgjykimit kanë hequr dorë nga e drejta e ankimit, si dhe kur ato nuk kanë kërkuar shprehimisht që aktgjykimi, që do tu dërgohet, ta përmbajë pjesën arsyetuese, gjykata nuk do ta arsyetojë posaçërisht aktgjykimin e dhënë, por vetëm do të tregojë se palët kanë hequr dorë nga ankimi dhe se nga ky shkak aktgjykimi nuk është arsyetuar.

## Aktgjykimi plotësues (§ 162)

### Neni 162

- 162.1 Nëse gjykata nuk ka vendosur për të gjitha kërkesat që është dashur të përfshihen me aktgjykim, ose kur vetëm një pjesë e kërkesës ka mbetur pa u përfshirë me të, pala mund brenda afatit prej pesëmbëdhjetë (15) ditësh nga dita kur i është dorëzuar aktgjykimi t'i propozojë gjykatës që të bëjë plotësimin e tij.
- 162.2 Nëse pala nuk paraqet propozim për plotësimin e aktgjykimit do të konsiderohet se padia është tërhequr në pjesën që ka mbetur pa u përfshirë me aktgjykimin e dhënë.
- 162.3 Propozimi i vonuar apo i pathemeltë për plotësimin e aktgjykimit, hidhet poshtë përkatësisht refuzohet nga gjykata pa u caktuar seancë gjyqësore.

### Neni 163

- 163.1 Kur gjykata konstaton se propozimi për plotësimin e aktgjykimit është i themeltë, e cakton seancën për shqyrtim kryesor të çështjes, me qëllim të dhënies së aktgjykimit për pjesën e kërkesës që nuk është zgjidhur (aktgjykimi plotësues).
- 163.2 Aktgjykimi plotësues mund të jepet edhe pa u hapur përsëri shqyrtimi kryesor, Nëse këtë aktgjykim e jep gjyqtari që e ka dhënë aktgjykimin e parë, por pas konstatimit se kërkesa për të cilën propozohet plotësimi është i shqyrtuar mjaftueshëm.
- 163.3 Nëse propozimi për plotësimin e aktgjykimit ka të bëjë vetëm me shpenzimet e procedurës, aktvendimin mbi propozimin e jep gjykata pa caktuar seancë gjyqësore.

#### Neni 164

- 164.1 Nëse, përpos propozimit për plotësimin e aktgjykimit, kundër tij është paraqitur edhe ankesa, ajo nuk e dërgon ankesën në gjykatën e shkallës së dytë derisa të mos merret vendimi mbi propozimin për plotësim, si dhe derisa të mos skadojë afati për goditjen e tij.
- 164.2 Nëse kundër vendimit mbi plotësimin e aktgjykimit ngrihet ankesa, kjo ankesë së bashku me ankesën kundër aktgjykimit të parë, do t'i dërgohet gjykatës së shkallës së dytë.
- 164.3 Nëse aktgjykimi goditet me anë të ankesës vetëm nga shkak se gjykata nuk ka vendosur me të për të gjitha kërkesat e palëve që janë objekt i procesit gjyqësor, ankesa do të konsiderohet si propozim për dhënien e aktgjykimit plotësues.

#### Korrigjimi i aktgjykimit (§ 165)

#### Neni 165

- 165.1 Gabimet në emra dhe numra, si dhe gabimet tjera në shkrim dhe llogaritje, mungesat në aspektin e formës së aktgjykimit dhe mospajtimi i kopjes me origjinalin e aktgjykimit, i korrigjon gjykata në çdo kohë.
- 165.2 Korrigjimi i gabimeve bëhet me aktvendim të posaçëm që shkruhet në fund të origjinalit të aktgjykimit, kurse palëve u dërgohet kopja e aktvendimit të tillë.
- 165.3 Nëse midis origjinalit dhe kopjes së aktgjykimit ekziston mospajtimi në pikëpamje të ndonjë vendimi të përmbajtur në dispozitivin e aktgjykimit, palëve do t'u dërgohet kopja e korrigjuar e aktgjykimit, duke treguar se me këtë kopje të aktgjykimit zëvendësohet kopja e mëparshme e aktgjykimit. Në rast të këtillë afati për ankim kundër pjesës së korrigjuar të aktgjykimit fillon të ecë nga dita e dorëzimit të kopjes së korrigjuar të aktgjykimit.
- 165.4 Për korrigjimin e aktgjykimit gjykata vendos pa dëgjimin e palëve.

#### Forma e prerë e aktgjykimit (§ 166)

#### Neni 166

- 166.1 Aktgjykimi i cili nuk mund të goditet me anë të ankesës bëhet i formës së prerë për aq sa është vendosur me të mbi kërkesëpadinë apo të kundërpadisë.

- 166.2 Gjykata gjatë gjithë procedimit të çështjes kujdeset sipas detyrës zyrtare se a mos është gjë e gjykuar çështja e ngritur me padi dhe nëse konstaton se procedura është iniciuar për kërkesën për të cilën ekziston vendimi i formës së prerë, padia duhet të hedhet poshtë si e palejueshme.
- 166.3 Nëse në aktgjykim është vendosur mbi kërkesën të cilën i padituri e ka parashtruar me anë të prapësimit me qëllim të kompensimit me kërkesën e padisë, atëherë vendimi për ekzistimin apo mosekzistimin e kërkesës së tillë të të paditurit bëhet i formës së prerë.

#### Neni 167

- 167.1 Aktgjykimi i formës së prerë prodhon efekt juridik vetëm ndërmjet palëve ndërgjyqëse, përveç kur nga shkaku i natyrës së raportit kontestues apo, sipas urdhrit të ligjit, prodhon efekt kundër personave të tretë.
- 167.2 Forma e prerë e aktgjykimit lidhet për gjendjen e raportit juridik në kohën e përfundimit të shqyrtimit kryesor të çështjes.

#### Neni 168

Në rast të gjykimit të mëvonshëm sipas padisë së palës, të ngritur kundër ndërhyrësit që bashkë me të ka marrë pjesë në procedurën e mëparshme, gjykata nuk mund të vendos në kundërshtim me vendimin e mëparshëm, përveç se kur e aprovon prapësimin për ndjekjen e çështjes në gjyq me pa ndërgjegje.

#### Neni 169

- 169.1 Gjykata është e lidhur për aktgjykimin e saj që nga momenti i dhënies së tij.
- 169.2 Aktgjykimi vepron ndaj palëve nga dita e dhënies, kurse në rastet nga nenet 155,156 dhe 157 të këtij ligji, nga dita kur u është dorëzuar.

### KREU XII - AKTVENDIMI (§§ 170 – 175)

#### Neni 170

- 170.1 Të gjitha aktvendimet që jepen në seancë gjyqësore i shpallë gjyqtari.
- 170.2 Aktvendimi i shpallur në seancën gjyqësore u dërgohet palëve në kopje të verifikuara vetëm nëse mund të goditen me ankesë të posaçme, apo nëse në bazë të aktvendimit mund të kërkohet menjëherë përmbartimi, apo nëse një gjë të tillë e kërkon drejtimi i procesit.

#### Neni 171

- 171.1 Gjykata është e lidhur për aktvendimet e saja, nëse ato nuk i përkasin drejtimin të procesit, apo nëse me këtë ligj nuk është përcaktuar ndryshe.
- 171.2 Në rastet në të cilat aktvendimi nuk i dërgohet palëve, ai ndaj tyre prodhon efekt posa të jetë shpallur.

#### Neni 172

- 172.1 Aktvendimet të cilat gjykata i jep jashtë seancave gjyqësore u komunikohen palëve duke iu dërguar kopja e vërtetuar e aktvendimit.
- 172.2 Nëse me anë të aktvendimit refuzohet propozimi i njërit nga palët, pa dëgjim paraprak të palës kundërshtare, atëherë kësaj të dytës nuk i dërgohet aktvendimi i tillë.

#### Neni 173

Aktvendimi duhet ta ketë arsyetimin nëse kundër tij mund të bëhet ankim i veçantë, e mund të përmbajë atë edhe në ndonjë rast tjetër kur gjykata e quan të nevojshme një gjë të tillë.

#### Neni 174

Aktvendimet e formës së prerë gjobat e shqiptuar sipas dispozitave të këtij ligji përmbahen sipas detyrës zyrtare.

#### Neni 175

Dispozitat e neneve 146, 153, 160 dhe 169 paragrafi 2 të këtij ligji në mënyrë të përshtatshme aplikohen edhe kur kem të bëjmë me aktvendimet.

## PROCEDURA SIPAS MJETEVE TË GODITJES

### KREU XIII - MJETET E ZAKONSHME TË GODITJES (§§ 176 – 210)

#### Ankesa kundër aktgjykimit (§§ 176 – 205)

##### E drejta e ankimit (§ 176)

###### Neni 176

- 176.1 Kundër aktgjykimit të dhënë nga gjykata e shkallës së parë palët mund të bëjnë ankim brenda afatit prej pesëmbëdhjetë ditësh (15) nga dita e dorëzimit të kopjes së aktgjykimit, nëse me këtë ligj nuk është caktuar ndonjë afat tjetër. Në kontestet nga raportet në të cilat është dhënë aktgjykimi në bazë të kambialit apo çekut, afati për ankim është shtatë (7) ditor.
- 176.2 Ankimi i bërë brenda afatit të përcaktuar me ligj pengon që aktgjykimi të bëhet i formës së prerë në pjesën e goditur me ankim.
- 176.3 Mbi ankimin kundër aktgjykimit vendos gjykata e shkallës së dytë.

###### Neni 177

- 177.1 Pala mund të heqë dorë nga e drejta e ankimit që nga momenti kur i është dorëzuar aktgjykimi.
- 177.2 Deri ne momentin e dhënies së vendimit të gjykatës së shkallës së dytë pala mund ta tërheqë ankesën e paraqitur.
- 177.3 Deklarata për heqjen dorë nga e drejta e ankimit dhe ajo për tërheqjen e ankesës nuk mund të revokohet.

#### Përmbajtja e ankesës (§§ 178 – 180)

###### Neni 178

Ankesa duhet të përmbajë:

- a) tregimin e aktgjykimit kundër të cilit paraqitet ankimi;
- b) deklaratën se aktgjykimi kundërshtohet në tërësi ose në pjesën e caktuar;



- c) shkaqet e ankimit me arsyetim;
- d) nënshkrimin e paraqitësit të ankimit.

#### Neni 179

- 179.1 Nëse ankesa nuk i përmban elementet nga neni 178 i këtij ligji (ankesa jo e plotë), gjykata e shkallës së parë me anë të aktvendimit, kundër të cilit nuk lejohet ankimi, e thërret ankuesin që brenda afatit prej shtatë ditësh ta plotësojë ankesën e paraqitur.
- 179.2 Nëse ankuesi brenda afatit nga paragrafi 1 i këtij neni nuk vepron sipas kërkesës së gjykatës, gjykata me aktvendim e hedhë poshtë ankesën si jo të plotë.

#### Neni 180

- 180.1 Në ankesë nuk mund të paraqiten fakte të reja dhe të propozohen prova të reja, përveç se kur ankuesi jep prova se pa fajin e vet nuk ka mundur t'i paraqesë, përkatësisht t'i propozojë gjer në përfundimin e shqyrtimit kryesor në gjykatën e shkallës së parë.
- 180.2 Duke i treguar faktet e reja, ankuesi ka për detyrë që t'i përmendë provat me të cilat faktet e tilla do të vërtetoheshin, kurse duke i treguar provat e reja, ka për detyrë t'i përmendë faktet të cilat me provat e tilla duhet vërtetuar.
- 180.3 Prapësimi i parashkrimit dhe prapësimi me qëllim kompensimi, që nuk janë paraqitur në gjykimin e shkallës së parë, nuk mund të paraqiten me ankesë.
- 180.4 Nëse me paraqitjen e fakteve të reja dhe me propozimin e provave të reja, shkaktohen shpenzime procedurale në procedurën e ankimit, shpenzimet e tilla i mbetën në ngarkim palës që i ka paraqitur faktet e reja, përkatësisht që i ka propozuar provat e reja.

Shkaqet nga të cilat mund të goditet aktgjykimi

#### Neni 181

Aktgjykimi mund të goditet:

- a) për shkak të shkeljes thelbësore të dispozitave të procedurës kontestimore;
- b) për shkak të konstatimit të gabuar apo jo të plotë të gjendjes faktike;
- c) për shkak të zbatimit të gabuar të së drejtës materiale.

181.2 Aktgjykimi në bazë të pohimit dhe aktgjykimi në bazë të heqjes dorë nga kërkesëpadia mund të goditen për shkak të shkeljes së dispozitave të procedurës kontestimore, apo nga shkaku se deklarata e pohimit, gjegjësisht e heqjes dorë nga kërkesëpadia, është dhënë në lajthitje apo nën ndikimin e dhunës apo mashtrimit.

#### Neni 182

182.1 Shkelja thelbësore e dispozitave të procedurës kontestimore ekziston nëse gjykata gjatë procedurës nuk e ka zbatuar fare, apo e ka zbatuar në mënyrë jo të drejtë ndonjë dispozitë të këtij ligji, kurse kjo ka pasur apo ka mundë të ketë ndikim në nxjerrjen e aktgjykimit të ligjshëm e të drejtë.

182.2 Shkelja thelbësore e dispozitave të procedurës kontestimore ekziston gjithmonë:

- a) nëse gjykata është përbërë jo sipas dispozitave ose nëse në nxjerrjen e aktgjykimit ka marrë pjesë gjyqtari që nuk ka marrë pjesë në seancën kryesore;
- b) nëse është vendosur për kërkesën e cila nuk bënë pjesë në juridiksionin gjyqësor;
- c) nëse në nxjerrjen e aktgjykimit ka marrë pjesë gjyqtari i cili sipas ligjit duhet të përjashtohet, respektivisht me vendim të gjykatës ka qenë i përjashtuar ose me rastin e dhënies së vendimit ka marrë pjesë personi i cili nuk e ka cilësinë e gjyqtarit;
- d) nëse gjykata sipas prapësimit të palëve gabimisht ka vendosur se është e kompetencës lëndore;
- e) nëse është vendosur për kërkesën sipas padisë të ngritur pas afatit të përcaktuar me ligj;
- f) nëse gjykata ka vendosur për kërkesëpadinë për të cilën është me kompetencë lëndore gjykata më e lartë e llojit të njëjtë, gjykata e llojit tjetër;
- g) nëse në kundërshtim me dispozitat e këtij ligji, gjykata e ka bazuar vendimin e vetë në disponimin e palejueshëm të palëve, (neni 3 paragrafi 3 i këtij ligji);
- h) nëse në kundërshtim me dispozitat e këtij ligji, gjykata ka nxjerr aktgjykim për shkak të pohimit, mosbindjes, mungesës, heqjes dorë nga kërkesëpadia, ose pa mbajtjen e shqyrtimit kryesor;
- i) nëse ndonjëherë nga palët me veprimin e paligjshëm, e sidomos me mosdhënien e mundësisë për shqyrtimin e çështjes në gjykatë;

- j) nëse në kundërshtim me dispozitat e këtij ligji, gjykata e ka refuzuar kërkesën e palës, që në procedurë të përdorë gjuhën dhe shkrimin e vet e të ndjek procesin në gjuhën e vet, kurse për këtë arsye ankohe;
- k) nëse në procedurë si paditës, ose i paditur, ka marrë pjesë personi që nuk mund të jetë palë në procedurë, apo nëse palën që është person juridik nuk e ka përfaqësuar personi i autorizuar, ose nëse palën me pazotësi procedurale nuk e ka përfaqësuar përfaqësuesi ligjor ose nëse përfaqësuesi ligjor, respektivisht përfaqësuesi me prokurë i palës nuk ka pasur autorizim të nevojshëm për zhvillimin e procedurës apo për kryerjen e ndonjë veprimi në procedurë, nëse zhvillimi i procedurës, respektivisht ushtrimi i veprimeve të veçanta në procedurë nuk është lejuar më vonë;
- l) nëse është vendosur për kërkesën për të cilën vazhdon procedura apo për të cilën më parë është nxjerr aktgjykimi i formës së prerë, ose prej të cilit paditësi njëherë ka hequr dorë ose për të cilin është lidhur pajtimi gjyqësor;
- m) nëse, në kundërshtim me ligjin është përjashtuar publiku në seancën kryesore;
- n) nëse aktgjykimi ka të meta për shkak të të cilave nuk mund të ekzaminohen, e sidomos nëse dispozitivi i aktgjykimit është i pakuptueshëm apo kontradiktor me vetvete ose me arsyet e aktgjykimit, apo nëse aktgjykimi nuk ka fare arsye apo në të nuk janë treguar fare arsyet për faktet vendimtare, ose ato arsye janë të paqarta, ose kontradiktore, ose nëse për faktet vendimtare ekzistojnë kundërthënie midis asaj që në arsyet e aktgjykimit thuhet për përmbajtje të dokumentit ose të procesverbalit për thëniet e dhëna në procedurë dhe të vet atyre dokumenteve ose të procesverbalit;
- o) nëse me aktgjykim është tejkalluar kërkesëpapia.

### Neni 183

- 183.1 Ekziston vërtetimi i gabuar apo jo i plotë i gjendjes faktike kur gjykata gabimisht e ka vërtetuar ndonjë fakt vendimtar, përkatësisht kur faktin e tillë nuk e ka vërtetuar fare.
- 183.2 Ekziston konstatimi jo i plotë i gjendjes faktike edhe kur për këtë flasin faktet e reja apo provat e reja.

#### Neni 184

Zbatimi i gabueshëm i së drejtës materiale ekziston kur gjykata nuk e ka zbatuar dispozitën e së drejtës materiale që është dashur ta zbatojë, apo kur dispozitën e tillë nuk e ka zbatuar në mënyrë të drejtë.

#### Procedura sipas ankesës

#### Neni 185

Ankesa i paraqitet gjykatës e cila e ka dhënë aktgjykimin e shkallës së parë, në një numër të mjaftueshëm ekzemplarësh për gjykatën dhe palën kundërshtare.

#### Neni 186

- 186.1 Ankesën e paraqitur jashtë afatit të parashikuar me ligj, apo jo të plotë, apo të palejueshme, gjykata e shkallës së parë e hedhë me aktvendim pa caktuar fare seancë gjyqësore.
- 186.2 Ankesa është e paafatshme nëse është paraqitur pas skadimit të afatit ligjor për paraqitjen e saj.
- 186.3 Ankesa është e palejueshme nëse e ka paraqitur personi që nuk është i autorizuar për paraqitjen e saj, apo personi që ka hequr dorë nga e drejta e ankimit apo që e ka tërhequr ankesën e paraqitur, apo nëse personi që e ka paraqitur ankesën nuk ka interes juridik për paraqitjen e ankesës.

#### Neni 187

- 187.1 Një ekzemplar të ankesës së paraqitur me kohë, të lejueshme dhe të plotë, gjykata e shkallës së parë ia dërgon palës kundërshtare, e cila mund, brenda afatit prej shtatë ditësh, të paraqesë po në këtë gjykatë përgjigje në ankesë.
- 187.2 Një ekzemplar të përgjigjes në ankesë gjykata e shkallës së parë ia dërgon ankuesit menjëherë, ose më së voni brenda afatit shtatë ditor nga arritja e saj në gjykatë.
- 187.3 Përgjigja në ankesë e paraqitur pas afatit nuk do të merret në shqyrtim nga gjykata e shkallës së dytë.
- 187.4 Parashtrësit që mbërrijnë në gjykatë pas arritjes së përgjegjës në ankesë, apo pas skadimit të afatit për përgjigje në ankesë nuk do të merren në shqyrtim, përpos kur gjykata nga pala shprehimisht kërkon deklarata plotësuese.

#### Neni 188

- 188.1 Pas pranimit të përgjigjes në ankesë, apo pas skadimit të afatit për përgjigje në ankesë, gjykata e shkallës së parë ankesën dhe përgjigjen në ankesë, nëse është paraqitur me të gjitha shkresat e lëndës ia dërgon gjykatës së shkallës së dytë në afat prej shtatë ditësh më së shumti.
- 188.2 Nëse ankuesi pretendon se në procedurën e shkallës së parë janë shkelur dispozitat e procedurës kontestimore, gjykata e shkallës së parë mund të jep shpjegime lidhur me thëniet në ankesë që i përkasin shkeljeve të tilla, e sipas nevojës mund të bëjë hetime me qëllim të verifikimit të saktësisë së thënieve përkatëse ne ankese.

#### Neni 189

- 189.1 Pasi të arrijë në gjykatën e shkallës së dytë dosja e lëndës, gjyqtari referues e përgatit raportin me qëllim të shqyrtimit të lëndës në gjykatën e ankimit, e cila gjykon me trup gjykues të përbërë nga tre gjyqtarë.
- 189.2 Gjyqtari referues, po qe nevoja, nga gjykata e shkallës së parë mund të kërkojë raport për shkeljet e dispozitave procedurale dhe mungesat tjera të përmendura në ankesë, si dhe të kërkojë që, me qëllim të konstatimit të shkeljeve, përkatësisht mungesave të tilla, të bëhen hetimet e duhura.

#### Neni 190

- 190.1 Gjykata e shkallës së dytë vendos për ankesën në seancë të trupit gjykues ose në bazë të shqyrtimit të çështjes në seanca gjyqësore.
- 190.2 Gjykata e shkallës së dytë e cakton shqyrtimin e çështjes kur vlerëson se për konstatimin e gjendjes faktike, saktësisht dhe plotësisht, duhet vërtetuar fakte të reja dhe marrë prova të reja nën kushtet e nenit 180 paragrafët 1 dhe 2 të këtij ligji.
- 190.3 Gjykata e shkallës së dytë do ta caktojë shqyrtimin e drejtpërdrejt të çështjes edhe Nëse aktgjykimi i shkallës së parë është anuluar dy herë dhe kur në seancën e kolegjit vlerëson se aktgjykimi kundër të cilit është paraqitur ankimi është bazuar në shkeljet esenciale të dispozitave të procedurës kontestimore, apo në gjendjen faktike të konstatuar gabimisht apo në mënyrë jo të plotë.
- 190.4 Gjykata e shkallës së dytë mund ta caktojë shqyrtimin e çështjes edhe kur vlerëson se me qëllim të konstatimit të drejtë të gjendjes faktike duhet

përsëri të merren të gjitha ose disa nga provat e administruara në gjykatën e shkallës së parë.

#### Neni 191

- 191.1 Për në seancën e shqyrtimit të çështjes drejtpërsëdrejti thirren palët, përkatësisht përfaqësuesit e tyre ligjor apo ata me prokurë, si dhe dëshmitarët dhe ekspertët, dëgjimin e të cilëve e quan të nevojshëm gjykata e ankimit.
- 191.2 Nëse nga seanca mungon ankuesi, shqyrtimi nuk bëhet, kurse vendimi do të merret në bazë të thënieve të ankesës dhe të atyre në përgjigjen në ankesë.
- 191.3 Nëse në seancën e caktuar për shqyrtim të çështjes nuk vjen pala që nuk është ankues, gjykata vepron në të dhe e jep vendimin meritior.
- 191.4 Në letërthirrjen për seancë pala njoftohet me pasojat procedurale të mosardhjes në shqyrtimin e çështjes.

#### Neni 192

- 192.1 Shqyrtimi i çështjes para gjykatës së shkallës së dytë fillon me shpjegimet e thukta të referuesit lidhur me çështjen, por pa e shprehur mendimin e tij rreth themelësisë së ankesës.
- 192.2 Pas kësaj lexohet aktgjykimi, apo pjesa e tij e goditur me ankesë, e kur është nevoja edhe procesverbali mbi shqyrtimin kryesor para gjykatës së shkallës së parë. Mandej ankuesi e arsyeton ankimin e vet, kurse pala kundërshtare përgjigjen në ankesë.
- 192.3 Nëse ndonjë mjet provues nuk mund të shfrytëzohet drejtpërdrejtë, gjykata e ankimit vendos që të lexohet procesverbali në pjesën që e përmban provën e tillë.

#### Neni 193

E gjithë ajo që është parashikuar me këtë ligj, për procedurën e shkallës së parë, në mënyrë adekuate do të zbatohet edhe në procedurën para gjykatës së shkallës së dytë.

## Kufijtë e ekzaminimit të aktgjykimit të shkallës së parë

### Neni 194

Gjykata e ankimit ekzaminon aktgjykimin e shkallës së parë në atë pjesë në të cilën është goditur me ankesë dhe atë brenda kufijve të shkaqeve të treguara në ankesë, duke u kujdesur sipas detyrës zyrtare për zbatimin e së drejtës materiale si dhe për shkëlqjen e dispozitave të procedurës kontestimore nga neni 182 paragrafi 2, pika b), g), j), k) dhe m) të këtij ligji.

## Vendimet e gjykatës së shkallës së dytë mbi ankesën

### Neni 195

195.1 Gjykata e ankimit mund, në seancën e kolegjit apo në bazë të shqyrtimit të çështjes të bërë drejtpërdrejt para saj:

- a) ta hedhë poshtë ankesën si të vonuar, jo të plotë apo të palejueshme;
- b) ta prishë aktgjykimin e goditur dhe ta hedhë poshtë padinë;
- c) ta prishë aktgjykimin e goditur dhe ta kthej çështjen në rigjykim në gjykatën e shkallës së parë;
- d) ta refuzoj ankesën si të pathemeltë dhe ta vërtetojë aktgjykimin e goditur;
- e) ta ndryshojë aktgjykimin e shkallës së parë.

195.2 Gjykata e shkallës së dytë nuk është e lidhur për propozimin e parashtruar në ankesë.

### Neni 196

Ankesën e vonuar, jo të plotë, apo jo të lejueshme, e hedhë poshtë gjykata e shkallës së dytë me aktvendim, nëse nuk e ka bërë një gjë të tillë gjykata e shkallës së parë siç është parashikuar në nenin 186.

### Neni 197

Gjykata e shkallës së dytë në seancën e kolegjit, apo në bazë të shqyrtimit të çështjes, me aktvendim e prishë aktgjykimin e shkallës së parë dhe çështjen ia kthen për rigjykim të njëjtës gjykatë të shkallës së parë, nëse konstaton se ekziston njëri ndër këto shkaqe të përmendura në ankesë:

- a) Nëse në kundërshtim me dispozitat e këtij ligji gjykata e ka dhënë aktgjykimin në bazë të pohimit, apo aktgjykimin në bazë të heqjes dorë nga kërkesëpadia;
- b) Nëse ndonjëri nga palët me veprim të kundërligjshëm, e sidomos për shkak të mos thirrjes në mënyrë të rregullt, nuk i është dhënë mundësia që të marrë pjesë në shqyrtimin e çështjes, kurse veprimi i tillë ka pasur ndikim në dhënien e vendimit të ligjshëm dhe të drejtë;
- c) Nëse gjykata e ka dhënë aktgjykimin pa e bërë shqyrtimin kryesor të çështjes juridike;
- d) Nëse në dhënien e aktgjykimit ka marrë pjesë gjyqtari i cili sipas vet ligjit duhet të përjashtohet nga gjykimi.

#### Neni 198

- 198.1 Nëse gjykata e shkallës së dytë konstaton se në gjykatën e shkallës së parë është vendosur mbi kërkesën e cila nuk bën pjesë në kompetencën gjyqësore, apo për kërkesën për të cilën ekziston gjyqvarësia në gjykimin tjetër, apo për të cilën ekziston aktgjykimi i formës së prerë, apo nga e cila paditësi ka hequr dorë, ose për të cilën ekziston pajtimi gjyqësor, atëherë ajo e prishë aktgjykimin e shkallës së parë dhe e hedhë poshtë padinë.
- 198.2 Nëse gjykata e shkallës së dytë konstaton se në procedurën e shkallës së parë ka vepruar, si paditës apo i paditur, personi që nuk mund të jetë palë ndërgjyqëse, apo nëse palën që është person juridik nuk e ka përfaqësuar personi i autorizuar, apo nëse palën me pazotësi procedurale nuk e ka përfaqësuar përfaqësuesi ligjor, apo nëse përfaqësuesi ligjor, ose ai me prokurë, nuk i ka pasur autorizimet e duhura për ndjekjen e çështjes në gjyq, apo për kryerjen e veprimeve procedurale të veçanta, gjegjësisht nëse veprimet e caktuar të kryera në procedurë më vonë nuk i ka aprovuar vetë pala, varësisht nga natyra e shkeljes konkrete të ligjit, e prishë aktgjykimin e shkallës së parë dhe ia kthen çështjen gjykatës kompetente të shkallës së parë, apo e prishë aktgjykimin dhe e hedhë poshtë padinë.
- 198.3 Kur gjykata e shkallës së dytë e prishë aktgjykimin e gjykatës së shkallës së parë dhe çështjen ia kthen të njëjtës gjykatë për rigjykim, ajo mund të urdhërojë që rishqyrtimi i çështjes të bëhet nga gjyqtari tjetër.
- 198.4 Në pjesën arsyetuese të aktvendimit, me të cilin prishet aktgjykimi i shkallës së parë, duhet treguar se cilat dispozita të procedurës kontestimore janë shkelur dhe çka e përbën shkeljen e tillë.



#### Neni 199

Gjykata e çështjes ka për detyrë që menjëherë pasi t'i arrijë aktvendimi i gjykatës së shkallës së dytë, të caktojë seancën përgatitore apo seancën për shqyrtimin kryesor të çështjes e cila duhet të mbahet më së voni brenda afatit tridhjetë (30) ditor pas arritjes së aktvendimit të gjykatës së shkallës së dytë, si dhe t'i kryejë të gjitha veprimet procedurale dhe t'i shqyrtojë të gjitha çështjet kontestuese që i ka ofruar gjykata e shkallës së dytë në aktvendimin e saj.

#### Neni 200

Gjykata e shkallës së dytë me aktgjykim e refuzon ankesën si të pathemeltë dhe e vërteton aktgjykimin e shkallës së parë nëse konstaton se nuk ekzistojnë shkaqet nga të cilat është goditur aktgjykimi, e as shkaqet për të cilat ajo kujdeset sipas detyrës zyrtare.

#### Neni 201

Gjykata e shkallës së dytë në seancën e kolegjit, apo në bazë të shqyrtimit të çështjes kryesore drejtpërsëdrejti, me aktgjykim e ndryshon aktgjykimin e shkallës së parë, Nëse konstaton se ekziston ndonjëri nga këto shkaqe të treguara në ankesë:

- a) nëse ka konstatuar se ekziston shkelja e dispozitave të procedurës kontestimore, përpos atyre të përmendura në nenin 197 të këtij ligji;
- b) nëse në seancën e kolegjit, me anë të vlerësimit ndryshe të shkresave dhe provave të marra në mënyrë indirekte, ka konstatuar gjendje tjetër faktike nga ajo e përmbajtur në aktgjykimin e shkallës së parë;
- c) nëse pas shqyrtimit direkt të çështjes, në bazë të provave të reja, apo në bazë të marrjes rishtas të provave të administruara nga gjykata e shkallës së parë, ka konstatuar gjendje tjetër faktike nga ajo e përmbajtur në aktgjykimin e shkallës së parë;
- d) nëse konsideron se gjendja faktike e përmbajtur në aktgjykimin e shkallës së parë është konstatuar drejte, por e drejta materiale është zbatuar gabimisht nga gjykata e shkallës së parë;
- e) nëse ka konstatuar se me aktgjykimin e shkallës së parë është tejkualuar kërkesëpadija ashtu që me të është pranuar me tepër se që është kërkuar me padi.

#### Neni 202

Nëse gjykata e ankimit, në seancën e kolegjit, konstaton se me aktgjykimin e shkallës së parë është tejkualuar kërkesëpadija, ashtu që me të është vendosur për

ndonjë çështje tjetër e jo për atë të ngritur me padi, atëherë ajo me aktvendim e prishë aktgjykimin e shkallës së parë dhe e kthen çështjen për procedim të serishëm.

#### Neni 203

Gjykata e shkallës së dytë nuk mund ta ndryshojë aktgjykimin e shkallës së parë në dëm të palës ankuese, Nëse vetëm ajo ka bërë ankim, e jo edhe pala kundërshtare.

#### Neni 204

Në arsyetimin e aktgjykimit, gjegjësisht të aktvendimit, gjykata e shkallës së dytë duhet t'i vlerësojë thëniet në ankesë që kanë qenë të rëndësisë vendimtare për dhënien e vendimit të saj.

#### Neni 205

Gjykata e shkallës së dytë ia kthen të gjitha shkresat e lëndës gjykatës së shkallës së parë me një numër të mjaftueshëm ekzemplarësh të vendimit të vet për t' ua dërguar palëve dhe personave të interesuar, si dhe një ekzemplar për gjykatën e shkallës së parë. Gjykata e shkallës së dytë e bënë një gjë të këtillë brenda afatit tridhjetë (30) ditor nga dita e dhënies së vendimit të saj.

#### Ankesa kundër aktvendimit (§§ 206 -210)

#### Neni 206

- 206.1 Kundër aktvendimit të gjykatës së shkallës së parë lejohet ankimi, në qofte se në këtë ligj nuk është përcaktuar që ankimi nuk lejohet.
- 206.2 Nëse me këtë ligj parashihet shprehimisht se ankimi i veçantë nuk lejohet, aktvendimi i shkallës së parë mund të goditet vetëm me anë të ankesës që paraqitet kundër vendimit me të cilin përfundon procedimi i çështjes në gjykatën e shkallës së parë.

#### Neni 207

- 207.1 Ankesa e paraqitur brenda afatit ligjor e pengon përbarimin e aktvendimit, nëse me këtë ligj nuk është parashikuar ndryshe.
- 207.2 Aktvendimi kundër të cilit nuk lejohet ankim i veçantë mund të përbarohet menjëherë.

Procedura sipas ankesës dhe vendimet e gjykatës së shkallës së dytë

#### Neni 208

Në procedurën sipas ankesës së veçantë, të paraqitur kundër aktvendimit, në mënyrë adekuate do të zbatohen dispozitat e këtij ligji që vlejnë për ankesën kundër aktgjykimit, përveç dispozitave me të cilat parashihet mundësia e shqyrtimit të çështjes drejtpërsëdrejti nga gjykata e shkallës së dytë.

#### Neni 209

Duke vendosur për ankimin e veçantë, gjykata e shkallës së dytë mundë:

- a) të hedhë poshtë ankesën si pasafatshme, jo të plotë, apo jo të lejueshme;
- b) të refuzon ankesën si të pa themeltë dhe e vërteton aktvendimin e gjykatës së shkallës së parë;
- c) të aprovon ankesën dhe të ndryshon aktvendimin e goditur;
- d) të aprovojë ankesën dhe të anulojë aktvendimin e goditur, e kur është nevoja ta kthej çështjen në procedim të serishëm.

#### Neni 210

Në procedurën e shkallës së dytë sipas ankesës jo të veçantë shkaku për të cilin është sulmuar aktvendimi shërben si një nga shkaqet e goditjes së vendimit përfundimtar. Kur gjykata e shkallës së dytë konstaton se ekziston parregullsia e pretenduar lidhur me aktvendimin e goditur me ankesë jo të veçantë veprohet në ndonjërin nga mënyrat e përcaktuara në nenin 195 të këtij ligji.

### KREU XIV - MJETET E JASHTËZAKONSHME TË GODITJES (§§ 211 – 251)

#### Revizioni (§§ 211 – 231)

#### Neni 211

- 211.1 Kundër aktgjykimit të gjykatës së shkallës së dytë, palët mund të paraqesin revizion brenda afatit prej tridhjetë (30) ditësh nga dita në të cilën u është dorëzuar aktgjykimi.
- 211.2 Revizioni nuk lejohet në kontestet pasurore-juridike në të cilat kërkesëpapia ka të bëjë me kërkesat në të holla, me dorëzimin e sendit, ose me përmbushjen e ndonjë premtimi tjetër. Nëse vlera e objektit të kontestit në pjesën e goditur të aktgjykimit nuk i kalon 3.000 €.
- 211.3 Revizioni nuk lejohet në kontestet pasurore-juridike në të cilat kërkesëpapia nuk ka të bëjë me kërkesat në para, me dorëzimin e sendit apo me

përmbushjen e ndonjë premtimi tjetër, Nëse vlera e objektit të kontestit e treguar në padinë e paditësit nuk e kalon shumën prej 3.000 €.

211.4 Përrjashtëmishit edhe kur është fjala për kërkesëpadinë nga paragrafët 2 dhe 3 të këtij neni, revizioni gjithmonë është i lejuar:

- a) në kontestet për ushqim; në kontestet për shpërblimin e dëmit për ushqimin e humbur, për shkak të vdekjes së dhënësit të ushqimit;
- b) në kontestet nga marrëdhëniet e punës të cilat i fillon i punësuari kundër vendimit për shuarjen e marrëdhënies së punës.

#### Neni 212

Për revizionin vendos Gjykata Supreme e Kosovës.

#### Neni 213

Revizioni i paraqitur nuk është pengesë për përbarimin e aktgjykimit të formës së prerë të goditur.

#### Neni 214

214.1 Revizioni mund të paraqitet:

- a) për shkak të shkeljes së dispozitave të procedurës kontestimore nga neni 188 i këtij ligji e cila është bërë në procedurën e gjykatës së shkallës së dytë;
- b) për shkak të zbatimit të gabuar të së drejtës materiale;
- c) për shkak të tejkalimit të kërkesëpadsë, nëse kjo parregullsi është bërë në procedurën e zhvilluar në gjykatën e shkallës së dytë.

214.2 Revizioni nuk mund të paraqitet për shkak të konstatimit të gabuar apo jo të plotë të gjendjes faktike.

214.3 Kundër aktgjykimit të dhënë në procedurën e shkallës së dytë, me të cilin vërtetohet aktgjykimi në bazë të pohimit, revizioni mund të paraqitet vetëm nga shkaqet e përmendura në paragrafin 1 pika a) dhe b) dhe paragrafin 2 të këtij neni.

214.4 Kundër aktgjykimit të shkallës së dytë me të cilin vërtetohet aktgjykimi i shkallës së parë, revizioni nuk lejohet për shkak të shkeljes së dispozitave të procedurës kontestimore nga paragrafi 1 pika a) e këtij neni, Nëse ekzistimi i tyre nuk është përmendur fare në ankesë, përveç se kur është fjala për shkeljet për të cilat kujdeset sipas detyrës zyrtare vet gjykata e shkallës së dytë dhe ajo e revizionit.

#### Neni 215

Gjykata e revizionit e shqyrton aktgjykimin e goditur vetëm në pjesën e tij të goditur me anë të revizionit dhe vetëm brenda kufijve të shkaqeve të treguara në revizion, por duke u kujdesur sipas detyrës zyrtare për zbatimin e drejtë të së drejtës materiale dhe për shkeljet e dispozitave të procedurës kontestimore që kanë të bëjnë me zotësinë për të qenë palë dhe përfaqësimin e rregullt.

#### Neni 216

Palët mund të parashtrojnë me revizion fakte të reja dhe të propozojnë prova të reja vetëm nëse ato kanë të bëjnë me shkeljet e dispozitave të procedurës kontestimore të bëra në procedurën e gjykatës së shkallës së dytë.

#### Neni 217

Revizioni i dorëzohet gjykatës së shkallës së parë e cila e ka dhënë aktgjykimin e shkallës së parë, në numër të mjaftueshëm për gjykatën dhe palën kundërshtare.

#### Neni 218

Revizionin e paraqitur pas skadimit të afatit ligjor, apo atë jo të plotë, me anë të aktvendimit e hedhë poshtë gjykata e shkallës së parë, pa mbajtur seancë gjyqësore.

#### Neni 219

- 219.1 Një ekzemplar të revizionit të paraqitur me kohë dhe që është i plotë dhe i lejueshëm, gjykata e shkallës së parë, brenda afatit shtatë ditor, ia dërgon palës kundërshtare.
- 219.2 Pala kundërshtare ka të drejtë që, brenda afatit shtatë ditor, nga dita në të cilën i është dorëzuar revizioni, në gjykatën e shkallës së parë ta paraqes përgjigjen në revizion.
- 219.3 Pasi të arrijë përgjigja në revizion apo pas skadimit të afatit për përgjigje, revizionin dhe përgjigjen, nëse është paraqitur, gjykata e shkallës së parë ia dërgon gjykatës së revizionit, bashkë me dosjen e lëndës, brenda afatit shtatë ditor, nëpërmjet gjykatës së shkallës së dytë.

#### Neni 220

Gjykata Supreme vendos mbi revizionin, vetëm në bazë të shkresave në dosjen e lëndës, në seancë të trupit gjykues.

#### Neni 221

Revizionin e vonuar, jo të plotë dhe të palejueshëm me, aktvendim e hedhë poshtë gjykata e revizionit, Nëse një gjë të tillë nuk e ka bërë gjykata e shkallës së parë brenda kufijve të autorizimeve të saja (neni 218 i këtij ligji).

#### Neni 222

Gjykata Supreme e refuzon revizionin si të pathemeltë, me anë të aktgjykimit, Nëse konstaton se nuk ekzistojnë shkaqet e cekura në revizion.

#### Neni 223

- 223.1 Nëse gjykata e revizionit konstaton se ekziston shkelja e dispozitave të procedurës kontestimore për shkak të të cilave mund të paraqitet revizioni, përpos shkelj eve të caktuara në paragrafët 2 dhe 3 të këtij neni, atëherë ajo, duke marrë parasysh natyrën e shkeljes, me aktvendim e anulon pjesërisht apo plotësisht aktgjykimin e shkallës së dytë dhe të parë, apo vetëm aktgjykimin e shkallës së dytë dhe ia kthen çështjen për rigjykim gjyqtarit tjetër apo të njëjtë të gjykatës së shkallës së parë, gjegjësisht kolegjit tjetër apo të njëjtë të gjykatës së shkallës së dytë, ose gjykatës tjetër kompetente.
- 223.2 Nëse në procedurën e shkallës së parë apo të dytë është vendosur mbi kërkesën që nuk bënë pjesë në kompetencën e gjykatave, apo qe përbënë gjë të gjykuar, ose nga e cila paditësi ka hequr dorë, apo për të cilën ekziston ujdia gjyqësore, gjykata e revizionit me aktvendim e anulon aktgjykimin e goditur me anë të revizionit dhe e hedhë poshtë padinë si të palejueshme.
- 223.3 Nëse në procedurën e shkallës së parë apo të dytë, si palë paditëse apo e paditur ka marrë pjesë personi me pazotësi për të qenë palë ndërgjyqëse, apo nëse palën që është person juridik nuk e ka përfaqësuar personi i autorizuar, apo nëse palën pa zotësi procedurale nuk e ka përfaqësuar përfaqësuesi ligjor i saj, apo nëse përfaqësuesi ligjor apo me prokurë i palës nuk e ka pasur autorizimin e duhur për ndjekjen e çështjes në gjyq ose për kryerjen e veprimeve procedurale konkrete, gjegjësisht Nëse ndjekjen e çështjes në gjyq apo kryerjen e veprimeve procedurale konkrete nuk e ka aprovuar pala më vonë, atëherë gjykata e revizionit, varësisht nga natyra e shkeljeve procedurale ekzistuese, vepron sipas dispozitave të paragrafit 1 apo 2 të këtij neni.

#### Neni 224

- 224.1 Nëse gjykata e revizionit konstaton se e drejta materiale është zbatuar gabimisht, me aktgjykim e aprovon revizionin e paraqitur dhe e ndryshon aktgjykimin e goditur.
- 224.2 Nëse gjykata e revizionit konstaton se për shkak të zbatimit të gabueshëm të së drejtës materiale, apo për shkak të shkeljeve të rregullave procedurale, gjendja faktike nuk është vërtetuar plotësisht dhe se për këtë arsye nuk ekzistojnë kushtet për ndryshimin e aktgjykimit të goditur, atëherë ajo me aktvendim e aprovon revizionin dhe e anulon pjesërisht apo tërësisht aktgjykimin e shkallës së parë dhe të dytë, apo vetëm aktgjykimin e shkallës së dytë, dhe çështjen ia dërgon për rigjykim gjyqtarëve të njëjtë apo të tjerë të gjykatës të shkallës së parë apo të dytë.

#### Neni 225

Nëse konstaton se me aktgjykimin e formës së prerë të gjykatës së shkallës së dytë është tejkalluar kërkesëpadia, gjykata e revizionit me aktgjykimin e saj e aprovon revizionin e palës dhe e ndryshon aktgjykimin e goditur.

#### Neni 226

Vendimi i gjykatës së revizionit u dërgohet palëve nëpërmjet gjykatës së shkallës së dytë brenda afatit tridhjetë (30) ditor.

#### Neni 227

Nëse me dispozitat e neneve të këtij KREU nuk parashikohet ndonjë gjë tjetër, në procedurën sipas revizionit, në mënyrë adekuate zbatohen dispozitat e këtij ligji mbi ankesën kundër aktgjykimit, përveç dispozitave me të cilat parashihet mundësia e mbajtjes së shqyrtimit të çështjes kryesore në gjykatën e ankimit.

#### Revizioni kundër aktvendimit (§§ 228 – 231)

#### Neni 228

- 228.1 Palët mund të paraqesin revizionin vetëm kundër aktvendimeve të formës së prerë me të cilat përfundon procedura e gjykatës së shkallës së dytë.
- 228.2 Nuk lejohet revizioni kundër aktvendimeve nga paragrafi 1 i këtij neni në kontestet në të cilat nuk do të ishte i lejuar revizioni kundër aktgjykimit.

#### Neni 229

- 229.1 Revizioni është i lejueshëm kurdoherë kundër aktvendimit të gjykatës së shkallës së dytë me të cilin ankesa e paraqitur kundër vendimit përfundimtar hidhet poshtë përkatësisht me të cilin vërtetohet aktvendimi i shkallës së parë mbi hedhjen poshtë të revizionit të paraqitur kundër vendimit përfundimtar.
- 229.2 Revizioni është i lejueshëm edhe kundër aktvendimit të gjykatës së shkallës së dytë me të cilin është vendosur mbi propozimin për përsëritjen e procedurës.
- 229.3 Revizioni nuk lejohet kundër aktvendimit mbi shpenzimet procedurale.

#### Neni 230

Në procedurën sipas revizionit kundër aktvendimit në mënyrë adekuatë aplikohen dispozitat e këtij ligji mbi revizionin kundër aktgjykimit.

#### Neni 231

Gjykata të cilës i kthehet për gjykim të ri çështja juridike është e lidhur për pikëpamjen juridike mbi të cilën bazohet aktvendimi i gjykatës së revizionit me të cilin është anuluar aktgjykimi i shkallës së dytë.

#### Përsëritja e procedurës (§§ 232 – 244)

#### Neni 232

Procedura e përfunduar me aktgjykim dhe aktvendim të formës së prerë të gjykatës mund të përsëritet sipas propozimit të palës:

- a) nëse palës me veprim të kundërligjshëm, e sidomos në rast të mos thirrjes për në seancë nuk i jepet mundësia që të marrë pjesë në shqyrtimin e çështjes kryesore;
- b) nëse në procedurën e përfunduar ka marrë pjesë si paditës ose si i paditur personi që nuk mund të jetë palë ndërgjyqëse, apo nëse palën që është person juridik nuk e ka përfaqësuar personi i autorizuar, ose Nëse palën me pazotësi procedurale nuk e ka përfaqësuar përfaqësuesi ligjor i saj, ose nëse përfaqësuesi ligjor, respektivisht përfaqësuesi me prokurë i palës, nuk ka pasur autorizim të duhur për ndjekjen e çështjes në gjyq apo për kryerjen e veprimeve procedurale të caktuara, Nëse ndjekja e



çështjes në gjyq apo kryerja e veprimeve procedurale të caktuara nuk është lejuar me vonë nga pala;

- c) nëse vendimi përfundimtar i gjykatës është bazuar në deklarata të rreme të dëshmitarëve apo të ekspertëve ose në dokumentin që është falsifikuar apo në të cilin është verifikuar përmbajtja e pasaktë;
- d) nëse vendimi përfundimtar i formës së prerë është pasojë e veprës penale të gjyqtarit, të përfaqësuesit ligjor apo me prokurë të palës, kundërshtare apo të personit të tretë;
- e) nëse pala fiton mundësinë ta përdorë vendimin e formës së prerë të gjykatës, i cili më parë, është dhënë në procedurën e zhvilluar midis palëve të njëjta për të njëjtën kërkesëpadi;
- f) nëse vendimi përfundimtar i formës së prerë është bazuar në një vendim tjetër gjyqësor, ose në vendimin e ndonjë organi tjetër, kurse ky vendim është ndryshuar, prishur apo anuluar në mënyrë të prerë;
- g) nëse pala merr dijeni për fakte të reja ose gjen prova të reja, ose e fiton mundësinë që t'i përdorë ato, në bazë të të cilave për palën do të mund të merrej vendim përfundimtar më i favorshëm, sikur faktet dhe provat e tilla të ishin përdorur në procedurën e mëparshme.

#### Neni 233

233.1 Nga shkaqet e treguara në nenin 232 pika a) dhe b) të këtij ligji nuk mund të kërkohej përsëritja e procedurës, Nëse ato janë përdorur pa sukses në procedurën e mëhershme.

233.2 Nga shkaqet e treguara në nenin 232 pika g) e këtij ligji përsëritja e procedurës mund të kërkohej vetëm Nëse pala, pa fajin e saj, nuk ka mundur ti parashtrijë këto rrethana para se të ketë marrë fund procedura e mëparshme me vendim gjyqësor të formës së prerë.

#### Neni 234

234.1 Propozimi për përsëritjen e procedurës paraqitet brenda afatit prej tridhjetë (30) ditësh, dhe atë:

- a) në rastin nga neni 232, pika a) e këtij ligji, që nga dita kur palës i është dorëzuar vendimi i formës së prerë; në rastin nga neni 232, pika b) e këtij ligji nëse në procedurë si paditës apo si i paditur ka vepruar personi që nuk mund të jetë palë ndërgjyqëse nga dita në të cilën vendimi i është dorëzuar personit të tillë;
- b) nëse palën që është person juridik nuk e ka përfaqësuar personi i autorizuar, apo nëse palën me pazotësi procedurale nuk e ka përfaqësuar

përfaqësuesi ligjor i saj nga dita në të cilën vendimi i është dorëzuar palës, gjegjësisht përfaqësuesit ligjor të saj, e Nëse përfaqësuesi ligjor, gjegjësisht me prokurë i palës, nuk ka pasur autorizim të duhur për ndjekjen e çështjes në gjyq, apo për kryerjen e veprimeve procedurale të caktuara, nga dita kur pala ka marrë dijeni për këtë shkak ;

- c) në rastin nga neni 232, pika c) e këtij ligji – nga dita në të cilën pala ka marrë dijeni për aktgjykimin penal të formës së prerë;
- d) në rastin nga neni 232, pika d) e këtij ligji – nga dita në të cilën pala ka marrë dijeni për vendimin penal të formës së prerë, e nëse procedura penale nuk mund të zhvillohet, atëherë nga dita kur ka marrë dijeni për pezullimin e procedurës penale,apo për rrethanat për shkak të të cilave nuk mund të iniciohet procedura penale;
- e) në rastet nga neni 232, pika e) dhe f) të këtij ligji – nga dita në të cilën pala ka mundur ta përdorë vendimin e formës së prerë që është shkak për përsëritjes së procedurës;
- f) në rastin nga neni 232, pika g) të këtij ligji – nga dita në të cilën pala ka mundur t'i parashtrijë në gjykatë faktet e reja, gjegjësisht mjetet provuese të reja.

234.2 Nëse afati i caktuar në paragrafin 1 të këtij neni do të fillonte të rrjedhë para së vendimi të ketë marrë formë të prerë, ky afat do të llogaritet nga momenti në të cilin vendimi bëhet i formës së prerë, nëse kundër tij nuk është paraqitur ankesa, gjegjësisht nga dita e dorëzimit të vendimit të formës së prerë të gjykatës së lartë të dhënë në shkallë të fundit.

234.3 Pas kalimit të afatit prej pesë vjetësh nga dita kur vendimi bëhet i formës së prerë, propozimi për përsëritjen e procedurës nuk mund të paraqitet, përveçse kur përsëritja kërkohet nga shkaqet e përmendura në nenin 232, pika a dhe b të këtij ligji.

#### Neni 235

Mbi propozimin për përsëritjen e procedurës vendos gjykata e shkallës së dytë, dhe atë gjyqtari individual i cili nuk ka marrë pjesë në dhënien e vendimit të shkallës së dytë në procedurën e mëparshme.

#### Neni 236

236.1 Propozimi për përsëritjen e procedurës i paraqitet gjithmonë gjykatës që e ka dhënë vendimin e shkallës së parë.

236.2 Në propozim duhet treguar sidomos: baza ligjore në mbështetje të të cilës kërkohet përsëritja e procedurës, rrethanat nga të cilat rezulton se propozimi

është paraqitur në afatin ligjor dhe mjetet provuese me të cilat arsyetohen thëniet e propozuesit.

#### Neni 237

- 237.1 Propozimin për përsëritjen e procedurës të paraqitur pas afatit ligjor, atë jo të plotë, apo të palejueshëm, e hedhë poshtë gjykata e shkallës së parë me anë të aktvendimit pa mbajtur seancë gjyqësore.
- 237.2 Nëse gjykata e shkallës së parë nuk e hedhë poshtë propozimin, një ekzemplar të tij ia dërgon palës kundërshtare, e cila ka të drejtë që brenda afatit pesëmbëdhjetë (15) ditor të përgjigjet lidhur me të.

#### Neni 238

Pasi të arrijë përgjigja lidhur me propozimin, apo pasi të skadojë afati për përgjigje, gjykata propozimin, bashkë me përgjigjen në të, Nëse është paraqitur, me të gjitha shkresat e lëndës ia dërgon gjykatës së shkallës së dytë brenda afatit prej tetë (8) ditësh.

#### Neni 239

- 239.1 Gjukata e shkallës së dytë vendos mbi propozimin për përsëritjen e procedurës zakonisht jashtë seance për shqyrtim kryesor.
- 239.2 Nëse gjykata vjen në përfundim se është i domosdoshëm shqyrtimi i tillë, ajo do të veprojë në pajtim me dispozitat e neneve 191 dhe 193 të këtij ligji.

#### Neni 240

- 240.1 Gjukata e shkallës së dytë, pasi të jepe vendimin mbi propozimin për përsëritjen e procedurës, gjykatës së shkallës së parë ia dërgon dosjen e lëndës me një numër të mjaftueshëm ekzemplarësh të vendimit të saj.
- 240.2 Në aktvendimin me të cilin lejohet përsëritja e procedurës shqiptohet vendimi me të cilin anulohet ai i dhënë në procedurën e mëparshme.
- 240.3 Kundër aktvendimit të gjykatës së shkallës së dytë me të cilin aprovohet propozimi për përsëritjen e procedurës nuk lejohet ankimi.
- 240.4 Ankesa kundër aktvendimit të gjykatës së shkallës së dytë me të cilin refuzohet propozimi për përsëritjen e procedurës i paraqitet të njëjtës gjykatë, e cila sipas ankesës vendos në trup gjykues të përbërë nga tre gjyqtar.

#### Neni 241

- 241.1 Në procedurën e përsëritur në gjykatën e shkallës së parë nuk mund të veprojë gjyqtari që ka dhënë vendimin në procedurën e mëparshme.
- 241.2 Gjykata e shkallës së parë e cakton seancën përgatitore menjëherë pasi t'i arrijë aktvendimi i gjykatës së shkallës së dytë, e më se voni brenda afatit tetë (8) ditor.

#### Raporti ndërmjet revizionit dhe propozimit për përsëritjen e procedurës

#### Neni 242

- 242.1 Nëse në afatin për paraqitjen e revizionit pala e paraqet propozimin për përsëritjen e procedurës vetëm nga shkaqet për të cilat mund të paraqitet revizioni, do të konsiderohet se pala e ka paraqitur revizionin.
- 242.2 Nëse pala paraqet revizionin për shkakun se në procedurën e shkallës së parë apo të shkallës së dytë është vendosur mbi kërkesën për të cilën ka ekzistuar vendimi i formës së prerë, apo për kërkesën nga e cila paditësi ka hequr dorë në një procedurë të mëhershme apo, për të cilën ekziston ujdia gjyqësore, dhe në të njëjtën kohë, apo më, vonë paraqet propozimin për përsëritjen e procedurës, nga cilido shkak i përmendur në nenin 232 të këtij ligji, gjykata e ndërprente procedurën sipas propozimit për përsëritjen e procedurës derisa të përfundojë procedura sipas revizionit.
- 242.3 Nëse pala paraqet revizionin nga cilido shkak, përveçse nga shkaqet e përmendura në paragrafët e sipërm, dhe në të njëjtën kohë, apo më vonë, paraqet propozimin për përsëritjen e procedurës, nga shkaqet e nenit 232 pika c) dhe d) të këtij ligji që janë argumentuar me anë të aktgjyqimit penal të formës së prerë, gjykata do ta ndërpresë procedurën sipas revizionit derisa mos të përfundojë procedura lidhur me propozimin për përsëritjen e procedurës.
- 242.4 Në të gjitha rastet e tjera në të cilat pala paraqet revizionin, kurse në të njëjtën kohë apo me vonë e paraqet propozimin për përsëritjen e procedurës, gjykata do të vendos se cilën procedurë do ta vazhdojë e cilën do ta ndërpresë, duke i marrë parasysh të gjitha rrethanat e rastit, e sidomos shkaqet nga të cilat janë paraqitur të dy mjetet e goditjes si dhe provat e propozuara nga palët.

#### Neni 243

- 243.1 Dispozitat e nenit 242 paragrafët 1 dhe 3 te këtij ligji do të aplikohen edhe kur pala se pari ka paraqitur propozimin për përsëritjen e procedurës e pas kësaj e ka paraqitur revizionin.
- 243.2 Në të gjitha rastet tjera në të cilat pala e paraqet propozimin për përsëritjen e procedurës e pas kësaj e paraqet revizionin gjykata, zakonisht, e ndërpretë procedurën sipas revizionit derisa mos të përfundojë procedura sipas propozimit për përsëritjen e procedurës, përveçse kur konstaton se ekzistojnë shkaqe të justifikueshme për veprim ndryshe.

#### Neni 244

- 244.1 Aktvendimin nga neni 242 të këtij ligji e jep gjyqtari i gjykatës së shkallës së parë Nëse propozimi për përsëritjen e procedurës arrin në gjykatën e shkallës së parë para se lënda sipas revizionit t'i jetë dërguar gjykatës së revizionit.
- 244.2 Nëse propozimi për përsëritjen e procedurës arrin pasi t'i jetë dërguar lënda gjykatës së revizionit, aktvendimin nga neni 242 të këtij ligji e jep gjykata e revizionit.
- 244.3 Aktvendimin nga neni 242 të këtij ligji e jep gjyqtari i gjykatës së shkallës së parë, përveç kur lënda, në kohën kur revizioni arrin në gjykatën e shkallës së parë, sipas propozimit për përsëritjen e procedurës i është dërguar gjykatës së lartë për vendosje, në të cilin rast aktvendimin e jep gjykata e lartë.
- 244.4 Kundër aktvendimeve nga paragrafët 1 dhe 2 të këtij neni nuk lejohet ankimi.

#### Kërkesa për mbrojtjen e ligjshmërisë (§ 245)

#### Neni 245

- 245.1 Kundër vendimit gjyqësor të formës së prerë prokurori publik mund të ngrejë kërkesën për mbrojtjen e ligjshmërisë brenda tre muajsh. Afati për ngritjen e kërkesës për mbrojtjen e ligjshmërisë nga paragrafi 1 i këtij neni llogaritet:
- a) kundër vendimit të marrë në shkallë të parë, kundër të cilit nuk është bërë ankim prej ditës kur ky vendim nuk ka mundur më të kundërshtohet me ankim;

b) kundër vendimit të marrë në shkallë të dytë, kundër të cilit nuk është deklaruar revizioni prej ditës kur ky vendim i është dërguar asaj pale së cilës i është dërguar më së voni.

245.2 Kundër vendimit nga paragrafi 1 i këtij neni, të nxjerrë në shkallë të dytë, kundër të cilit palët kanë deklaruar revizion, prokurori publik mund të ngrejë kërkesë për mbrojtjen e ligjshmërisë vetëm brenda tridhjetë (30) ditësh nga data kur i është dërguar revizioni i asaj pale, revizioni i së cilës i është dërguar me herët.

245.3 Kërkesa për mbrojtjen e ligjshmërisë nuk lejohet kundër vendimit që me rastin e revizionit ose të kërkesë për mbrojtjen e ligjshmërisë e ka marre gjykata me kompetencë për të vendosur për këto mjete juridik”.

#### Neni 246

Kërkesa për mbrojtjen e ligjshmërisë kundër vendimit nga neni 245 i këtij ligji ngritët nga prokurori publik, në pajtim me ligjin.

#### Neni 247

247.1 Prokurori publik mund ta ngrejë kërkesën për mbrojtjen e ligjshmërisë:

- a) për shkak të shkeljeve esenciale të dispozitave të procedurës kontestimore, nëse shkelja ka të bëjë me kompetencën territoriale, Nëse gjykata e shkallës së parë e ka nxjerrë aktgjykimin pa seancë kryesore, kurse e ka pasur detyrë ta mbajë seancën kryesore, Nëse është vendosur për kërkesën, rreth së cilës kontestimi është në vazhdim, apo nëse në kundërshtim me ligjin, është përjashtuar publiku në seancën kryesore;
- b) për shkak të aplikimit të gabueshëm të së drejtës materiale.

247.2 Prokurori publik nuk mund të ngrejë kërkesën për mbrojtjen e ligjshmërisë për shkak të kapërcimit të kërkesë-padisë dhe as për shkak të vërtetimit të gabueshëm apo jo të plotë të gjendjes faktike.

#### Neni 248

Sipas dispozitave të këtij ligji gjykata me kompetencë për të vendosur për kërkesën për mbrojtjen e ligjshmërisë do të veprojë edhe kur vërteton se ekziston shkelja esenciale e dispozitave të procedurës kontestimore që është bërë në procedurë para gjykatës të shkallës së parë.

#### Neni 249

Nëse kundër të njëjtit vendim janë paraqitur si revizioni ashtu edhe kërkesa për mbrojtjen e ligjshmërisë, gjykata kompetente do të vendos për mjetet juridike me një vendim.

#### Neni 250

Për seancën në të cilën gjykata do të vendose lidhur me kërkesën për mbrojtjen e ligjshmërisë do të njoftohet prokurori publik kompetent.

#### Neni 251

Kur vendos për kërkesën për mbrojtjen e ligjshmërisë, gjykata do të kufizohet vetëm në ekzaminimin e shkëlqeve që i thekson prokurori publik në kërkesën e vet.

## **PJESA E DYTË**

### **GJYKIMI NË SHKALLË TË PARË**

#### **KREU XV – PADIA (§§ 252 – 263)**

#### Neni 252

Gjykimi i një çështje në gjykatë fillon me paraqitjen e kërkesëpadsisë me shkrim (padi detyrimi, vërtetimi dhe ndryshimi).

#### **Përmbajtja e padsisë (§ 253)**

#### Neni 253

Padia duhet të përmbajë:

- a) kërkesën e caktuar në pikëpamje të çështjes kryesore dhe kërkesave aksesore;
- b) faktet mbi të cilat paditësi e bazon kërkesën;
- c) provat me të cilat vërtetohen faktet e tilla;
- d) vlerën e kontestit;
- e) bazën juridike dhe
- f) të dhënat e tjera që duhet t'i ketë çdo parashtresë (neni 99 i këtij ligji).

- 253.2 Gjykata nuk është e lidhur me bazën juridike të kërkesëpadisë.
- 253.3 Gjykata do të veprojë sipas padisë edhe kur paditësi nuk e ka treguar bazën juridike të kërkesëpadisë.
- 253.4 Paditësi ka për detyrë që padisë t’ia bashkëngjis vërtetimin për taksën e paguar gjyqësore.
- 253.5 Nëse edhe pas vërejtjes së pranuar nga gjykata paditësi nuk e paguan taksën gjyqësore sipas vlerës së kontestit të përcaktuar në padi, edhe pse nuk ekzistojnë konditat për lirim nga detyrimi i pagimit të taksës gjyqësore, do të konsiderohet se padia është tërhequr.

#### Padi vërtetimi (§ 254)

##### Neni 254

- 254.1 Paditësi mund të kërkojë me padi që gjykata vetëm të konstatojë ekzistimin, përkatësisht mosekzistimin e një të drejte apo të një raporti juridik ose vërtetësinë, gjegjësisht pavërtetësinë e ndonjë dokumenti.
- 254.2 Padia e këtillë mund të ngrihet kur kjo është përcaktuar me dispozita të posaçme, apo kur paditësi ka interes juridik që gjykata të vërtetojë ekzistimin apo mosekzistimin e ndonjë të drejte apo të raportit juridik, ose vërtetësinë, respektivisht pavërtetësinë e ndonjë dokumenti para se të jetë bërë e kërkueshme kërkesa për prestim nga raporti i njëjtë.
- 254.3 Nëse vendimi mbi kontestin varet nga fakti nëse ekziston ose nuk ekziston një e drejtë apo raport juridik, i cili gjatë procedimit të padisë është kontestuar, krahas kërkesës ekzistuese paditësi mund ta parashtrojë edhe kërkesëpadinë me qëllim që gjykata të vërtetojë se raporti i tillë ekziston, respektivisht se nuk ekziston, po qe se gjykata para së cilës është duke u zhvilluar procedimi është kompetente për kërkesën e tillë.
- 254.4 Parashtrimi i kërkesës sipas dispozitës së paragrafit 3 të këtij neni nuk do të konsiderohet si ndryshim, i natyrës objektive, të padisë.

#### Padia me disa kërkesa (§ 255)

##### Neni 255

- 255.1 Në një padi paditësi mund t’i përfshijë disa kërkesa kundër të njëjtës palë të paditur nëse ato të gjitha janë të lidhura me të njëjtën bazë faktike dhe juridike.



- 255.2 Nëse kërkesat nuk janë të lidhura me të njëjtën bazë faktike dhe juridike, ato mund të përfshihen në një padi kundër të njëjtës palë të paditur vetëm Nëse e njëjta gjykatë është e kompetencës lëndore për secilën nga këto kërkesa dhe kur për të gjitha kërkesat është e përcaktuar i njëjti lloj i procedurës, e gjykata vjen në përfundim se përfshirja e kërkesëpadive të tilla në një padi i kontribuon ekonomisë së procedimit ( bashkimi kumulativ i kërkesëpadive). Nëse një gjë e tillë nuk i kontribuon ekonomisë së procedimit, gjykata, më së voni në seancën përgatitore, sjellë aktvendim për ndarjen e procedurës.
- 255.3 Paditësi mund në një padi t'i përfshijë dy apo më tepër kërkesëpadi që janë të ndërlidhura midis tyre, dhe të kërkojë që gjykata ta aprovojë të dytën me radhë vetëm Nëse e para refuzohet ( bashkimi eventual i kërkesëpadive).
- 255.4 Bashkimi i kërkesëpadive mund të bëhet sipas paragrafit 3 të këtij neni vetëm Nëse gjykata është e kompetencës lëndore për çdonjërin nga kërkesat e përfshira në një padi, dhe nëse për të gjitha kërkesat është përcaktuar i njëjti lloj i procedurës.
- 255.5 Me aktgjykimin me të cilin aprovohet kërkesëpadi nën një shuhet gjyqëvarësia e krijuar lidhur me kërkesëpadinë në numrin 2.

## Kundërpadia (§ 256)

### Neni 256

- 256.1 I padituri ka të drejtë të paraqesë kundërpadi derisa nuk ka përfunduar seanca përgatitore, gjegjësisht seanca e parë për shqyrtimin kryesor, nëse seanca përgatitore nuk është mbajtur fare, nëse:
- a) kërkesa e kundërpadisë ka lidhje me atë të padisë (kundërpadia konekse);
  - b) midis kërkesëpadisë dhe asaj të kundërpadisë mund të bëhet kompensimi (kundërpadia kompenzuese).
  - c) me kundërpadi kërkohej vërtetimi i ndonjë të drejte apo raporti juridik nga ekzistimi apo mosekzistimi i të cilit varet tërësisht apo pjesërisht vendimi mbi kërkesën e paditësit (kundërpadia prejudiciale).
- 256.2 Pas mbajtjes së seancës nga paragrafi 1 i këtij neni, kundërpadia mund të ngrihet vetëm me pëlqimin e paditësit.
- 256.3 Kundërpadia nuk mund të paraqitet nëse për procedimin e kërkesës nga kundërpadia është kompetente gjykata e llojit tjetër.

256.4 Në rastin nga paragrafi 1 pika a) e këtij neni gjykata mund të vendos ndarjen e procedimit sipas kundërpadisë nga ai sipas padisë, nëse këtë e kërkojnë shkaqet e ekonomisë së gjykimit.

#### Ndryshimi i padisë (§ 256)

##### Neni 257

257.1 Ndryshim të padisë përbën ndryshimi i njëjtësisë së kërkesëpadisë, zmadhimi i kërkesëpadisë apo parashtrimi edhe i një kërkesë tjetër krahas asaj ekzistuese.

257.2 Padia nuk quhet e ndryshuar nëse paditësi e ka ndryshuar bazën juridike të kërkesëpadisë, Nëse e ka zvogëluar kërkesëpadinë, apo nëse i ka ndryshuar, plotësuar apo përmirësuar, thëniet e caktuara në padi.

##### Neni 258

258.1 Paditësi mund ta ndryshojë padinë më së voni deri në përfundimin e seancës përgatitore apo deri në fillimin e seancës për shqyrtim kryesor të çështjes, nëse seanca përgatitore nuk është caktuar fare. Në rast të këtillë gjykata të paditurit duhet t'i jep kohë të nevojshme që të përgatitet për shqyrtim të padisë së ndryshuar.

258.2 Pas përfundimit të seancës përgatitore, e më së voni deri në mbylljen e seancës për shqyrtim kryesor, gjykata mund ta lejojë ndryshimin e padisë vetëm nëse konstaton se ndryshimi nuk ka për qëllim zvarritjen e gjykimit dhe nëse i padituri pajtohet me ndryshimin e padisë.

258.3 Konsiderohet se ekziston pëlqimi i të paditurit për ndryshimin e padisë nëse ai fillon të marrë pjesë në shqyrtimin e çështjes së padisë të ndryshuar, pa e kundërshtuar më parë ndryshimin.

258.4 Gjukata në rastin e paragrafit 2 të këtij neni e lejon ndryshimin e padisë edhe nëse i padituri e kundërshton ndryshimin nëse plotësohen këto kushte:

- a) paditësi, pa fajin e tij, nuk ka mundur më parë ta ndryshojë padinë;
- b) i padituri ka mundësi të marrë pjesë në shqyrtimin e çështjes të ngritur me padinë e ndryshuar pa u shtyrë seanca kryesore.

258.5 Nëse padia është ndryshuar në seancën në të cilën i padituri nuk është i pranishëm, gjykata duhet ta shtyjë seancën dhe t'ia dërgojë të paditurit kopjen e procesverbalit nga seanca e këtillë.

258.6 Kundër aktvendimit me të cilin lejohet apo refuzohet ndryshimi i padisë nuk lejohet ankimi i veçantë.

#### Neni 259

Nëse paditësi e ndryshon padinë duke kërkuar nga e njëjta bazë faktike sendin tjetër apo një shumë të hollash, i padituri nuk mund ta kundërshtojë atë nëse ndryshimi është pasojë e rrethanave të krijuara pas ngritjes së padisë.

#### Neni 260

260.1 Nëse plotësohen konditat e përcaktuara në nenin 258 paditësi mund ta ndryshojë padinë edhe ashtu që në vend të të paditurit të parë ta padisë një person tjetër.

260.2 Për ndryshimin e padisë në mënyrën e përcaktuar në paragrafin 1 të këtij neni është i nevojshëm pëlqimi i personit që duhet të hyjë në gjykim në vend të të paditurit, e Nëse i padituri ka filluar të marrë pjesë në shqyrtimin e çështjes kryesore, nevojitet edhe pëlqimi i tij.

260.3 Personi i cili hynë në gjykim në vend të palës së paditur duhet ta pranojë atë në gjendjen në të cilën ndodhet në momentin kur hyn në të.

#### Tërheqja e padisë (§ 261)

#### Neni 261

261.1 Paditësi mund ta tërheqë padinë pa pëlqimin e të paditurit deri në momentin në të cilin i padituri e paraqet në gjykatë përgjigjen në padi.

261.2 Padia mund të tërhiqet edhe më vonë, deri në përfundimin e shqyrtimit kryesor, nëse i padituri e jep pëlqimin për një gjë të tillë. Nëse i padituri brenda shtatë (7) ditësh nga dita e njoftimit për tërheqjen e padisë nuk deklарohet për këtë gjë, do të konsiderohet se e ka dhënë pëlqimin për tërheqjen e padisë.

261.3 Nëse padia është tërhequr, gjykata jep aktvendim me të cilin konstatohet se është tërhequr padia. Ky aktvendim i dërgohet të paditurit vetëm nëse padia i është dorëzuar me parë.

261.4 Kundër aktvendimit me të cilin konstatohet se është tërhequr padia nuk lejohet ankimi.

261.5 Padia e tërhequr konsiderohet se nuk është paraqitur asnjëherë dhe mund të paraqitet në gjykatë përsëri.

## Gjyqvarësia (Litispendenca) (§§ 262 - 263)

### Neni 262

- 262.1 Gjyqvarësia krijohet që në momentin, në të cilin të paditurit i dorëzohet padia.
- 262.2 Sa i përket kërkesës të cilën pala e ka parashtruar gjatë zhvillimit të procedurës, gjyqvarësia krijohet në momentin në të cilin është njoftuar pala kundërshtare për kërkesën e tillë.
- 262.3 Gjatë kohës së ekzistimit të gjyqvarësisë për të njëjtën kërkesëpadi nuk mund të iniciohet gjykim i ri midis palëve të njëjta. Nëse, prapëseprapë bëhet një gjë e tillë, gjykata e hedhë poshtë padinë.
- 262.4 Gjykata gjatë gjithë procedurës, sipas detyrës zyrtare, kujdeset nëse është në zhvillim e sipër gjykimi tjetër për të njëjtën kërkesëpadi midis palëve të njëjta.

### Neni 263

- 263.1 Nëse gjatë zhvillimit të procedurës ndonjëra nga palët e tjetërson sendin apo të drejtën e kërkuar me padi, një gjë e tillë nuk pengon që procedimi të përfundojë midis palëve të njëjta.
- 263.2 Personi që e ka fituar sendin apo të drejtën gjatë zhvillimit të gjykimit mund të hyjë në procedurë, në vend të paditësit apo të paditurit, vetëm me pëlqimin e të dy palëve ndërgjyqëse.
- 263.3 Ne rastin e paragrafit 1 të këtij neni aktgjykimi prodhon efekt edhe ndaj fituesit të sendit apo të drejtës gjatë zhvillimit të procesit gjyqësor.

## KREU XVI - Bashkëndërgjyqësia (§§ 264 – 270)

### Neni 264

- 264.1 Padia mund të ngrihet nga shumë paditës ose kundër shumë të paditurve (bashkëndërgjyqësia) në rast se:
- janë në bashkësi juridike në pikëpamje të objektit të kontestit apo nëse të drejtat e tyre, përkatësisht detyrimet, burojnë nga e njëjta bazë faktike apo juridike (bashkëndërgjyqësia materiale);
  - objekt kontesti janë kërkesat, përkatësisht detyrimet e të njëjtit lloj që mbështeten në bazën faktike dhe juridike esencialisht të njëjtë dhe nëse

ekziston kompetenca lëndore dhe territoriale e të njëjtës gjykatë për secilën kërkesë dhe për secilin të paditur (bashkëndërgjyqësia formale);

c) një gjë e këtillë parashikohet me ndonjë ligj tjetër.

264.2 Paditësit mund t'i bashkohet, nën kushtet e paragrafit 1 të këtij neni, edhe një paditës tjetër apo padia mund të zgjerohet edhe në një të paditur tjetër, duke u marrë pëlqimi i këtij deri në përfundimin e seancës përgatitore, përkatësisht të seancës për shqyrtimin kryesor të çështjes, nëse seanca përgatitore nuk është caktuar fare.

264.3 Personi që i bashkohet paditësit, përkatësisht personi në të cilin zgjerohet padia duhet ta pranojë procedurën në gjendjen në të cilën ndodhet në momentin kur ai hyn në të.

#### Neni 265

265.1 Paditësi me padinë e tij mund të përfshijë dy ose më tepër të paditur, në mënyrë që të kërkojë që kërkesëpadija të aprovohet ndaj të paditurit (të dytë) nëse refuzohet si e pa bazë ndaj të paditurit (të parë) (bashkëndërgjyqësia me të paditurin eventual).

265.2 Në mënyrën e përcaktuar në paragraf 1 të këtij neni paditësi mund t'i përfshijë me padi dy a më tepër të paditur nëse ndaj secilit prej tyre e parashtron kërkesëpadinë e njëjtë, apo nëse ndaj ndonjërit prej tyre parashtron kërkesëpadi tjetër por që është në lidhje me kërkesëpadinë e parë, si dhe nëse për secilën nga kërkesat e tilla e njëjta gjykatë ka kompetencë lëndore dhe territoriale.

#### Neni 266

266.1 Personi që tërësisht apo pjesërisht e kërkon sendin apo të drejtën, lidhur me të cilën është në zhvillim e sipër procedura midis dy palëve ndërgjyqëse, mund që t'i padisë ato në gjykatën e çështjes deri në përfundimin e procedurës me vendim të formës së prerë (ndërrhyrja kryesore).

266.2 Nëse gjykata vendos, të ndalet së proceduari padinë e parë, atëherë aktgjykimi me të cilin aprovohet kërkesëpadija e ndërrhyrësit kryesor ka rëndësinë paraprake (prejudiciale) për gjykimin sipas padisë së parë.

#### Neni 267

Debitori kryesor dhe dorëzani mund të paditen bashkërisht, nëse kjo nuk është në kundërshtim me përmbajtjen e kontratës mbi dorëzanimë

#### Neni 268

Secili bashkëndërgjyqës në procesin kontestimor është palë në vete dhe kryerja apo moskryerja e veprimeve të tilla procedurale, as nuk u shkojnë në favor e as në dëm bashkëndërgjyqësve të tjerë.

#### Neni 269

- 269.1 Nëse sipas ligjit ose për shkak të natyrës së raportit juridik kontesti mund të zgjidhet vetëm në mënyrë të njëjtë ndaj të gjithë bashkëndërgjyqësve (bashkëndërgjyqësia unike), atëherë ata të gjithë konsiderohen si një palë ndërgjyqëse e vetme, kështu që në rastin kur ndonjëri nga bashkëndërgjyqësit nuk e kryen ndonjë veprim procedural, efekti i veprimeve procedurale të kryera nga bashkëndërgjyqësi tjetër shtrihet edhe në ata që nuk i kanë kryer veprimet e tilla.
- 269.2 Nëse bashkëndërgjyqësit kryejnë veprime procedurale që dallohen mes tyre, atëherë gjykata e merr në konsiderim atë veprim procedural që është për të gjithë ata më i favorshmi.

#### Neni 270

- 270.1 Nëse afatet për kryerjen e veprimit procedural të caktuar skadojnë në kohë të ndryshme për bashkëndërgjyqësit në bashkëndërgjyqësi unike, atëherë veprimin e tillë procedural mund ta kryej secili bashkëndërgjyqës derisa mos të skadojë afati i fundit i përcaktuar për kryerjen e tij.
- 270.2 Secili nga bashkëndërgjyqësit ka të drejtë që të bëjë propozime lidhur me drejtimin e procesit gjyqësor.

### KREU XVII – PJESËMARRJA E PERSONAVE TË TRETË NË PROCEDURË (§§ 271 – 276)

#### Neni 271

- 271.1 Kushdo mund të ndërhyjë në një proces kontestimor që zhvillohet ndërmjet personave të tjerë, kur ka interes juridik për të mbështetur njërën ose tjetrën palë ndërgjyqëse, me të cilën bashkohet në gjykim për ta ndihmuar atë.
- 271.2 Ndërhyrësi mund të hyjë në procesin gjyqësor gjatë gjithë procedurës që përfundon me marrjen e formës së prerë të vendimit mbi kërkesëpadinë, si dhe gjatë procedurës që inicohet me mjete goditjeje të jashtëzakonshme.

- 271.3 Deklaratën për hyrje në procesin kontestimor ndërhyrësi mund ta bëjë me shkrim jashtë seance apo verbalisht në seancë gjyqësore.
- 271.4 Parashtrësia e ndërhyrësit i dërgohet të dy palëve ndërgjyqëse, e kur deklarata e ndërhyrësit është dhënë në seance gjyqësore, atëherë pjesa përkatëse e procesverbalit i dërgohet vetëm palës që nuk ka qenë e pranishme në seancë.

#### Neni 272

- 272.1 Secila nga dy palët ndërgjyqëse mund t'ia kontestojë ndërhyrësit të drejtën e ndërhyrjes në gjykim dhe të propozojë refuzimin e tij.
- 272.2 Derisa aktvendimi, me të cilin është refuzuar pjesëmarrja e ndërhyrësit të ketë marrë formën e prerë, ndërhyrësi mund të marrë pjesë në procedurë dhe veprimet e tilla procedurale nuk mund të përjashtohen.
- 272.3 Kundër aktvendimit të gjykatës me të cilin aprovohet pjesëmarrja e ndërhyrësit nuk lejohet ankesa e posaçme.

#### Neni 273

- 273.1 Ndërhyrësi ka për detyrë ta pranojë procesin kontestimor në atë gjendje në të cilën ndodhet në momentin kur ka ndërhyrë në gjykim. Gjatë procedimit të mëtejme ndërhyrësi ka të drejtë të parashtojë propozime dhe të kryejë veprime procedurale tjera brenda afateve në të cilat këto veprime do të mund t'i kryente pala të cilës i është bashkuar.
- 273.2 Nëse ndërhyrësi ka hyrë në procesin kontestimor deri në momentin kur vendimi mbi kërkesëpadinë është bërë i formës së prerë, ai ka të drejtë ta paraqesë edhe mjetin e jashtëzakonshëm të goditjes së vendimit të këtillë.
- 273.3 Nëse ndërhyrësi paraqet kundër vendimit mjetin e goditjes atëherë një ekzemplar i tij i dërgohet edhe palës ndërgjyqëse të cilës i është bashkuar me qëllim që ta mbështesë gjatë gjykimit të çështjes.
- 273.4 Veprimet procedurale të kryera nga ndërhyrësi kanë për palën, të cilës i është bashkuar ai, efekt juridik vetëm Nëse nuk janë në kundërshtim me veprimet procedurale të saja.
- 273.5 Me pëlqimin e të dy palëve ndërgjyqëse personi i tretë që ka ndërhyrë në gjykim mund të zërë vendin e palës për të cilën ka ndërhyrë dhe kjo e fundit të dalë jashtë gjykimit.

#### Neni 274

- 274.1 Nëse efekti juridik i aktgjykimit duhet të shtrihet edhe në ndërhyrësin, atëherë ky i fundit e ka në gjykimin kontestimor pozitën procedurale të bashkëndërgjyqësit unik me palën të cilën e ka mbështetur gjatë procedimit të çështjes (neni 275 i këtij ligji).
- 274.2 Ndërhyrësi me pozitën procedurale të bashkëndërgjyqësit unik mund ta paraqesë mjetin e goditjes së jashtëzakonshme edhe në procesin kontestimor në të cilin nuk ka marrë pjesë deri në momentin kur vendimi mbi kërkesëpadinë ka marrë formë të prerë.

#### Emërimi i paraardhësit juridik

#### Neni 275

- 275.1 Personi që është paditur si posedues i një sendi apo si shfrytëzues i një të drejte pasurore dhe që pretendon se sendin e posedon, respektivisht se të drejtën e shfrytëzon në emër të personit të tretë mund, më së voni në seancën përgatitore, e nëse kjo nuk është mbajtur, atëherë në seancën për shqyrtim kryesor të çështjes, nëpërmjet gjykatës ta thërras atë person të tretë (paraardhës juridik) që në vend të tij të hyjë si palë e paditur në gjykim.
- 275.2 Pëlqimi i paditësit, që në vend të palës së paditur nga ai të hyjë në gjykim paraardhësi juridik, nevojitet vetëm nëse paditësi kundër të paditurit parashtron edhe kërkesa që nuk varen nga ajo se a e mbanë në posedim ose jo sendin në emër të paraardhësit, respektivisht e ushtron ose jo të drejtën e caktuar në emër të paraardhësit juridik.
- 275.3 Në qoftë se paraardhësi juridik që është thirrur rregullisht nuk vjen në seancë gjyqësore apo nuk pranon që të hyjë në procesin kontestimor në vend të palës së paditur, atëherë ky i fundit nuk mund të kundërshtojë pjesëmarrjen në shqyrtimin e çështjes së ngritur me padi kundër tij.

#### Njoftimi i personit të tretë për procesin gjyqësor

#### Neni 276

- 276.1 Secila palë mund të thërret në gjykimin e çështjes një person me të cilin mendon se e ka të përbashkët çështjen, ose nga i cili mund të kërkohej një garanci ose shpërblim, që lidhet me përfundimin e çështjes.
- 276.2 Personi i tretë thirret me kërkesë të shkruar që mund të paraqitet deri në përfundimin e gjykitimit me vendim të formës së prerë. Në shkresën e tillë, e



cila personit të tretë i dërgohet nëpërmjet gjykatës së çështjes, tregohet shkaku i thirrjes dhe gjendja në të cilën ndodhet procesi kontestimor.

276.3 Pala që e ka njoftuar personin e tretë për procesin gjyqësor nuk mund të kërkojë për këtë arsye ndërprerjen e gjykimit, shtyrjen e seancës, apo zgjatjen e afateve për kryerjen e veprimeve procedurale.

## KREU XVIII – NDËRPRERJA DHE PUSHIMI I GJYKIMIT (§§ 277 – 295)

### Neni 277

Procesi gjyqësor ndërpritet:

- a) kur pala ndërgjyqëse vdes ose e humbë zotësinë procedurale, e nuk ka të caktuar përfaqësues me prokurë në gjykim;
- b) kur përfaqësuesi ligjor i palës vdesë ose shuhet autorizimi i tij për përfaqësim, e pala nuk ka të caktuar përfaqësues me prokurë në gjykim;
- c) kur pala që është person juridik pushon së ekzistuari, respektivisht kur organi kompetent jep vendim të formës së prerë për ndalimin e punës tij;
- d) kur paraqitet propozimi për fillimin e procedurës së falimentimit në kontestet në të cilat i padituri është debitor falimentues
- e) kur për shkak të luftës ose për shkaqe të tjera pushon puna në gjykatë;
- f) kur ndërprerja e gjykimin parashihet me ndonjë ligj tjetër.

### Neni 278

278.1 Përveç rasteve të parashikuara me këtë ligj, gjykata e ndërpret gjykimin:

- c) Nëse ka vendosur që vetë të mos e zgjidhë çështjen paraprake (neni 13 i këtij ligji);
- d) Nëse pala ndodhet në zonën e cila, për shkak të ngjarjeve të jashtëzakonshme (vërshimet, tërmeti etj) është shkëputur nga gjykata.

278.2 Gjykata mund ta caktojë ndërprerjen e gjykimit nëse vendimi mbi kërkesëpadinë varet nga fakti nëse është kryer delikti ekonomik apo vepra penale që ndiqet sipas detyrës zyrtare, kush është kryerësi dhe nëse ai është i përgjegjshëm, e sidomos kur paraqitet dyshimi se dëshmitari ose eksperti ka dhënë deklaratë të rreme, apo se dokumenti i përdorur si mjet provues është i rremë.

#### Neni 279

- 279.1 Si rezultat i ndërprerjes së gjykimit, afatet për zhvillimin e veprimeve procedurale, po ashtu ndërpriten.
- 279.2 Gjatë kohës sa zgjatë ndërprerja e gjykimit, gjykata nuk mund të kryejë kurrfarë veprimesh procedurale, por nëse ndërprerja është shkaktuar pas përfundimit të seancës për shqyrtim kryesor të çështjes, gjykata mund të jep vendimin meritore në bazë të materialit procedural nga shqyrtimi i bërë.
- 279.3 Veprimet procedurale të kryera nga njëra palë gjatë kohës sa zgjatë ndërprerja e gjykimit nuk prodhojnë kurrfarë efekti juridik ndaj palës kundërshtare. Efekti i tyre fillon vetëm pasi të vazhdojë procesi gjyqësor i ndërprerë.

#### Neni 280

- 280.1 Procedura që është ndërprerë për shkaqe të treguara në nenin 277 paragrafi 1 pika a)–d) të këtij ligji do të vazhdohet kur trashëgimtari, apo kujdestari i pasurisë trashëgimore, përfaqësuesi i ri ligjor, administratori i falimentimit apo pasardhësi juridik i personit juridik, e marrin përsipër procedurën apo kur i thërret gjykata ta bëjnë këtë, me propozimin e palës kundërshtare.
- 280.2 Procedura që është ndërprerë, nga shkak i përmendur në nenin 277 paragrafi 1 pika e) të këtij ligji, do të vazhdohet pasi ta anulojë moratoriumin gjykata e falimentimit.
- 280.3 Nëse gjykata e ka ndërprerë gjykimin nga shkaqet e përmendura në nenin 278 paragrafi 1 pika a) dhe paragrafi 2 të këtij ligji, gjykimi do të vazhdohet pasi të përfundojë procedura në formë të prerë tek gjykata apo organi tjetër kompetent, apo kur gjykata e çështjes konstaton se nuk ekzistojnë më arsyet për të pritur përfundimin e saj.
- 280.4 Në të gjitha rastet e tjera gjykimi i ndërprerë do të vazhdojë me propozimin e palës pasi të kenë pushuar shkaqet e ndërprerjes.
- 280.5 Afatet të cilat për shkak të ndërprerjes së gjykimit kanë pushuar të rrjedhin, për palën e interesuar fillojnë të rrjedhin rishtazi, nga dita kur gjykata ia dërgon aktvendimin mbi vazhdimin e gjykimit.
- 280.6 Palës që nuk e ka paraqitur propozimin për vazhdimin e gjykimit aktvendimi për vazhdimin e tij i dërgohet sipas dispozitave të nenit 110 të këtij ligji.

## Neni 281

- 281.1 Ankesa kundër aktvendimit me të cilin konstatohet (neni 277 i këtij ligji), apo caktohet (neni 278 i këtij ligji) ndërprerja e procedurës, nuk e pengon ekzekutimin e aktvendimit.
- 281.2 Nëse gjykata gjatë seancës gjyqësore e refuzon propozimin për ndërprerjen e gjykimit dhe vendos që gjykimi menjëherë të vazhdojë së zhvilluari, kundër këtij aktvendimi nuk lejohet ankesë e posaçme.

## Neni 282

- 282.1 Pushimi i gjykimit shkaktohet kur vdes pala, apo kur mbaron se ekzistuari, nëse objekt kontesti janë të drejtat që nuk mund të kalojnë në trashëgimtarët e palës, përkatësisht në pasardhësin juridik të saj.
- 282.2 Në rastet nga paragrafi 1 të këtij neni aktvendimi për pushimin e gjykimit i dërgohet palës kundërshtare, trashëgimtarëve, përkatësisht pasardhësit juridik të palës, pasi të jenë caktuar ata.
- 282.3 Trashëgimtarëve të palës së vdekur, sipas propozimit të palës kundërshtare apo sipas detyrës zyrtare, gjykata ua cakton përfaqësuesin e përkohshëm të cilit ia dërgon aktvendimin mbi pushimin e gjykimit, Nëse konstaton se procedura trashëgimore mund të zgjasë shumë kohë.
- 282.4 Aktvendimi mbi pushimin e gjykimit i dhënë nga shkaku i mbarimit të personit juridik i dërgohet palës kundërshtare dhe pasardhësit juridik të personit juridik, Nëse ky i fundit ekziston.
- 282.5 Derisa të bëhet i formës së prerë aktvendimi mbi pushimin e gjykimit, lidhur me afatet për kryerjen e veprimeve juridike, me të drejtat e palëve dhe veprimet e gjykatës në mënyrë adekuate zbatohen dispozitat mbi ndërprerjen e gjykimit.

## Ndihma juridike

## Neni 283

- 283.1 Gjykatat kanë për detyrë t'i japin njëra tjetrës ndihmë juridike në proceset kontestimore.
- 283.2 Nëse gjykata e lutur nuk është kompetente për kryerjen e veprimit për të cilin është lutur, do t'ia dërgoj lutjen gjykatës kompetente, respektivisht organit tjetër shtetëror, e për këtë gjë do ta njoftojë gjykatën nga e cila i ka ardhur lutja. Nëse gjykatës se lutur nuk i është e njohur gjykata kompetente,

përkatësisht organi shtetëror tjetër, gjykata e lutur ia kthen lutjen gjykatës së çështjes.

#### Neni 284

- 284.1 Gjykatat u japin ndihmë juridike gjykatave të huaja në rastet e përcaktuara me anë të kontratave ndërkombëtare, si dhe kur ekziston reciprociteti në dhënien e ndihmës juridike. Në rast dyshimi për ekzistimin e reciprocitetit, njoftime jap Ministria përkatëse.
- 284.2 Gjykata nuk do t'i jep ndihmë juridike gjykatës së huaj Nëse kjo e fundit kërkon kryerjen e veprimeve që janë në kundërshtim me rendin juridik. Në rast të tillë gjykata e lutur do t'ia dërgoj kryesisht lutjen Gjykatës Supreme e cila jep vendim definitiv.

#### Neni 285

Gjykatat u japin ndihmë juridike gjykatave të huaja sipas mënyrës së parashikuar me ligjin e vendit. Veprimi procedural që është objekt i lutjes së gjykatës së huaj mund të kryhet edhe në mënyrën që kërkon gjykata e huaj, Nëse procedura e tillë nuk është në kundërshtim me rendin juridik.

#### Neni 286

Nëse me kontratë ndërkombëtare nuk është përcaktuar ndryshe, gjykatat do t'i marrin në procedim lutjet për dhënien e ndihmës juridike të gjykatave të huaja vetëm Nëse janë dërguar në rrugë diplomatike dhe nëse lutja dhe shkresat që i janë bashkangjitur janë hartuar në gjuhën që është në përdorim zyrtar në gjykatë, apo nëse është bashkangjitur përkthimi i tyre i legalizuar në atë gjuhë.

#### Neni 287

Nëse me kontratë ndërkombëtare nuk është përcaktuar ndryshe, lutjet e gjykatave të vendit për ndihmë juridike u dërgohen gjykatave të huaja në rrugë diplomatike. Lutjet dhe shkresat tjera që i bashkëngjiten duhet të hartohen në gjuhën e shtetit të lutur, ose duhet t'u bashkëngjitet përkthimi i tyre i legalizuar në atë gjuhë.

#### Mosrespektimi i gjykatës

#### Neni 288

- 288.1 Gjykata gjatë zhvillimit të procedurës do ta dënojë me gjobë deri në 500 € palën, përfaqësuesin ligjor, përfaqësuesin me prokurë, apo ndërhyrësin i cili

me veprimet procedurale i ka keqpërdorur rëndë të drejtat që i janë njohur me këtë ligj.

- 288.2 Nëse me anë të veprimit procedural nga paragrafi 1 i këtij neni ndonjërit nga pjesëmarrësit në procedurë i është shkaktuar dëm i natyrës juridiko civile, me kërkesën e të dëmtuarit gjykata vendos për kompensimin e dëmit në të njëjtin proces gjyqësor.

#### Neni 289

- 289.1 Me dënim në të holla prej 100- 500 € gjykata e gjobitë palën apo pjesëmarrësin tjetër në procedurë i cili me anë të parashtresës e fyen gjykatën.
- 289.2 Nëse pjesëmarrësi në procedurë apo personi që është i pranishëm në vendin ku mbahet seanca për shqyrtimin e çështjes e fyen gjykatën, apo pjesëmarrësit tjerë në procedurë, e pengojnë punën apo nuk i respektojnë urdhrat e gjyqtarit për mbajtjen e rendit dhe qetësisë, gjykata do ta qortojë atë. Nëse qortimi tregohet i pasuksesshëm, gjykata personin e qortuar do ta largojë nga vendi ku mbahet seanca gjyqësore ose do ta dënojë me gjobë deri në 500 €, kurse mund edhe ta largojë edhe ta dënojë me gjobë.
- 289.3 Nëse pala apo përfaqësuesi me prokurë i saj largohet nga vendi i seancës, seanca do të mbahet pa praninë e tyre. Nëse përfaqësuesi me prokurë i palës edhe gjatë zhvillimit të mëturjeshëm të procedurës bënë veprime të përcaktuara në paragrafin 1 dhe 2 të këtij neni, gjykata mund t'ia ndalojë përfaqësimin e mëturjeshëm të palës.
- 289.4 Kur gjykata e dënon me gjobë ose e largon nga seanca gjyqësore avokatin apo praktikantin e avokatit si përfaqësues me prokurë, për këtë do ta njoftojë Odën e Avokatëve.

#### Neni 290

Gjykata e dënon me gjobë deri në 500 € përfaqësuesin për marrjen e shkresave i cili në kundërshtim me dispozitat e nenit 118 të këtij ligji nuk e njofton gjykatën për ndërrimin e adresës. Përfaqësuesin e këtillë, me kërkesën e palës, gjykata e detyron me shpenzimet e shkaktuara me mos njoftimin pa justifikim për dyshimin e adresës.

#### Neni 291

- 291.1 Personin që pa arsye refuzon ta marrë shkresën, si dhe atë që në mënyrë tjetër e pengon dorëzimin e shkresës, duke vështirësuar apo pamundësuar

kështu zbatimin e dispozitave të këtij ligji mbi dorëzimin e shkresave, gjykata e dënon me gjobe deri në 500 €.

- 291.2 Me kërkesë të palës gjykata e detyron personin nga paragrafi 1 i këtij neni që t'i paguaj shpenzimet që i ka shkaktuar me qëndrimin e tij të përcaktuar në paragrafin 1 të këtij neni.

#### Neni 292

- 292.1 Kur dëshmitari që është thirrur nuk paraqitet pa shkaqe të arsyeshme, ose pa leje apo shkak të arsyeshëm largohet nga vendi ku duhet të dëgjohet, gjykata do të urdhërojë sjelljen e tij me detyrim dhe pagimin e shpenzimeve të sjelljes me detyrim, si dhe do ta dënojë me gjobë deri në 500 €.
- 292.2 Nëse dëshmitari vjen në vendin e mbajtjes së seancës dhe përkundrejt paralajmërimit mbi pasojat, refuzon të dëshmojë apo të përgjigjet në pyetjet konkrete, kurse gjykata shkaqet e refuzimit i quan të pa arsyeshme, mund ta dënojë me gjobë deri në 500 €, e nëse edhe pas kësaj refuzon të dëshmojë, mund ta burgos. Burgimi zgjatë gjersa dëshmitari të mos pranojë të dëshmojë, apo gjersa dëshmia e tij të mos bëhet e panevojshme, por jo më tepër se tridhjetë (30) ditë.
- 292.3 Me kërkesën e palës, gjykata do të vendos që dëshmitari e ka për detyrë t'i paguaj shpenzimet të cilat i ka shkaktuar me mosardhjen e vet të paarsyeshme, respektivisht me refuzimin e pajustificuar për të dëshmuar.
- 292.4 Nëse dëshmitari më vonë e justifikon mungesën e vet, gjykata do ta revokojë aktvendimin mbi dënimin, e mund ta lirojë krejtësisht dëshmitarin, apo pjesërisht, nga detyrimi i pagimit të shpenzimeve. Gjukata mund ta revokojë aktvendimin e vet mbi dënimin edhe kur dëshmitari të ketë pranuar më vonë të dëshmojë.

#### Neni 293

- 293.1 Gjukata mund ta dënojë me gjobë deri në 1000 € ekspertin që pa ndonjë shkak të arsyeshëm nuk e dorëzon brenda afatit të caktuar konstatimin dhe mendimin e vet, apo qe pa arsye nuk vjen në seancë edhe pse është thirrur rregullisht.
- 293.2 Me dënim nga paragrafi 1 i këtij neni gjykata e dënon ekspertin që pa ndonjë arsye refuzon ekspertimin.
- 293.3 Me kërkesën e palës, gjykata mund ta detyrojë ekspertin me pagimin e shpenzimeve të shkaktuara me mos dërgimin e shkresës, që e përmban

konstatimin dhe mendimin e tij, pa arsye, me mungesë të paarsyeshme, respektivisht me refuzim të paarsyeshëm të ekspertimit.

- 293.4 Aktvendimin mbi dënimin e ekspertit gjykata mund ta revokojë nën kushtet e nenit 292 paragrafi 4 të këtij ligji.
- 293.5 Dispozitat e këtij neni në mënyrë të përshtatshme zbatohen edhe për interpretimin gjyqësor.

#### Neni 294

Nëse personi i dënuar me gjobë sipas dispozitave të këtij ligji nuk e paguan dënimin në afatin e caktuar, ai do të zëvendësohet me dënim burgimi i cili e zgj atë atë në proporcion me lartësinë e gjobës së shqiptuar, ashtu siç është përcaktuar me Kodin penal, por jo më shumë se një (1) muaj.

#### Neni 295

- 295.1 Ankesa kundër aktvendimit nga neni 288, 289, 290 paragrafi 1, neni 292 paragrafi 1 dhe neni 293 paragrafi 1 i këtij ligji nuk e shtyn ekzekutimin e aktvendimit.
- 295.2 Ankesa kundër aktvendimit nga neni 292 paragrafi 2 dhe neni 293 paragrafi 2 i këtij ligji nuk e pengon ekzekutimin e aktvendimit, përveçse kur në ankesën e tillë sulmohet edhe vendimi i gjykatës me të cilin nuk janë aprovuar arsyet e dëshmitarit për mosdhënien e deklaratës apo të përgjegjës në pyetjen konkrete, përkatësisht arsyet e ekspertit për moskryerjen e ekspertimit.

### KREU XXI - SIGURIMI I KËRKESËPADISË (§§ 296 – 318)

#### Neni 296

- 296.1 Për vendosje mbi propozimin për sigurim të paraqitur para se të jetë ngritur padia për fillimin e procedurës kontestimore, si dhe gjatë procedurës së tillë, është kompetente gjykata që vepron sipas padisë. Vendimin mbi masën e sigurimit e jep gjykata që vepron në shkallë të parë, kurse gjykata më e lartë atëherë kur propozimi për marrjen e saj është paraqitur pas dërgimit të dosjes së lëndës sipas ankesës në këtë gjykatë.
- 296.2 Pasi të jetë bërë i formës së prerë aktgjykimi mbi kërkesëpadinë, për propozimin e sigurimit vendos gjykata që do të ishte kompetente për vendosje mbi kërkesëpadinë në shkallë të parë.

## Neni 297

Masa e sigurimit mund të caktohet:

- a) nëse propozuesi i sigurimit e bënë të besueshme ekzistimin e kërkesës apo të së drejtës subjektive të tij , dhe
- b) nëse ekziston rreziku se pa caktimin e masës së këtillë pala kundërshtarë do të mund ta pamundësonte apo vështirësonte dukshëm realizimin e kërkesës, sidomos me tjetërsimin e pasurisë së vet, me fshehjen e saj, me ngarkimin apo me ndonjë mënyrë tjetër, me të cilën do ta ndryshonte gjendjen ekzistuese të gjërave, ose në ndonjë mënyrë tjetër do të ndikonte negativisht në të drejtat e propozuesit të sigurimit.

297.2 Nëse nuk është përcaktuar ndryshe me ligj, gjykata e cakton masën e sigurimit vetëm nën kushtet që propozuesi i sigurimit, brenda afatit të caktuar nga gjykata, ashtu siç parashihet me Ligjin mbi Procedurën Përmbartimore, jep garanci në masën dhe në llojin e caktuar nga gjykata, për dëmin që mund t'i shkaktohet palës kundërshtarë me caktimin dhe ekzekutimin e masës së sigurimit.

297.3 Nëse propozuesi nuk jep garanci brenda afatit të caktuar, gjykata e refuzon propozimin për caktimin e masës së sigurimit. Me kërkesën e propozuesit gjykata mund ta lirojë atë nga detyrimi i dhënies së garancisë Nëse konstatohet se nuk ka mundësi financiare për një gjë të tillë.

297.4 Bashkësitë e pushtetit lokal janë të përjashtuara nga detyrimi i paragrafit 3 të këtij neni.

## Neni 298

Garancia nga neni 297 i këtij ligji kthehet brenda afatit prej shtatë (7) ditësh nga dita në të cilën shuhet masa e sigurimit. Nëse në ndërkohë propozuesi i sigurimit e ngritë padinë për kompensimin e dëmit, gjykata kompetente për gjykimin e padisë do të vendos për lënien në fuqi të masës së sigurimit.

## Neni 299

299.1 Për sigurimin e kërkesës në të holla mund të caktohen këto masa të sigurimit:

- a) ndalimi kundërshtarit të sigurimit që ta tjetërsojë, fshehë, ngarkojë ose disponojë me pasurinë e caktuar me vlerë të mjaftueshme për sigurimin e kërkesës së propozuesit të sigurimit. Ky ndalim do të regjistrohet në regjistrin publik përkatës;



- b) ruajtja e pasurisë me të cilën ka të bëjë ndalimi nga pika e sipërme nga gjykata në depozitën e saj, kur ka mundësi për një gjë të tillë, apo duke iu dhënë në posedim propozuesit të sigurimit apo personit të tretë;
- c) ndalimi debitorit të kundërshtarit të sigurimit që këtij të fundit t'i përmbushet kërkesa apo dorëzohet sendi, si dhe ndalimi kundërshtarit të sigurimit që ta pranojë sendin, ta realizojë kërkesën apo të disponojë me të;
- d) parashënimi i së drejtës së pengut mbi sendin e paluajtshtëm të kundërshtarit të sigurimit, apo mbi të drejtën e regjistruar në sendin e paluajtshtëm, gjerë në vleftën e kërkesës kryesore, me kamata dhe shpenzime procedurale, për të cilën është dhënë aktgjykimi i cili ende nuk është bërë i ekzekutueshëm.

299.2 Aktvendimi me të cilin caktohet masa e sigurimit i dërgohet kundërshtarit të sigurimit, debitorit të kundërshtarit të sigurimit, e kur është rasti edhe regjistrin publik përkatës. Masa e sigurimit konsiderohet e zbatuar në momentin kur aktvendimi i dorëzohet kundërshtarit të sigurimit apo debitorit të tij, Nëse i është dorëzuar këtij të fundit, apo regjistrin publik përkatës, varësisht nga ajo se cila nga këto tri data të dorëzimit është më e hershme në pikëpamje kohore.

299.3 Në rajonet në të cilat nuk ekzistojnë librat publike, masat e sigurimit nga ky nen do të zbatohen duke u zbatuar rregullat procedurale adekuate të procedurës përbarimore.

### Neni 300

300.1 Për sigurimin e kërkesës së drejtuar kah sendi i caktuar apo kah një pjesë e tij mund të caktohen këto masa siguri:

- a) ndalimi kundërshtarit të sigurimit që ta tjetërsojë, fshehë, ngarkojë apo disponojë me pasurinë kah e cila është drejtuar kërkesa. Ky ndalim do të evidentohet në regjistrin publik përkatës;
- b) ruajtja e pasurisë të cilës i përket ndalimi nga pika a) e këtij paragrafi dhe atë duke u depozituar në gjykatë, nëse kjo është e mundshme, apo duke iu dorëzuar në posedim propozuesit të sigurimit apo personit të tretë;
- c) ndalimi kundërshtarit të sigurimit që të kryejë veprime me të cilat mund të dëmtohet pjesa e pasurisë kah e cila është drejtuar kërkesa, apo urdhri kundërshtarit të sigurimit që t'i kryejë veprimet e caktuara të nevojshme për tu ruajtur pasuria apo për tu ruajtur gjendja ekzistuese e rrethanave;
- d) autorizimi i propozuesit të sigurimit që t'i kryejë aktivitetet e caktuara.

- 300.2 Dispozitat e paragrafit 2 dhe 3 të nenit 299 të këtij ligji zbatohen edhe në rastin e sigurimit të kërkesës së drejtuar kah sendi i caktuar apo kah një pjesë e tij.
- 300.3 Masat e sigurimit nga ky nen nuk guxojnë në tërësi ta përfshijnë kërkesën që sigurohet me anë të tyre.

#### Neni 301

Për sigurimin e të drejtave tjera apo për ruajtjen e gjendjes ekzistuese të rrethanave, mund të caktohen këto masa sigurimi:

- a) ndalimi kundërshtarit të sigurimit që t'i kryejë aktivitetet e caktuara, po urdhri që t'i kryejë aktivitetet e tilla, me qëllim të ruajtjes së gjendjes ekzistuese apo pengimit të dëmtimit të palës kundërshtare;
- b) autorizimi i propozuesit të sigurimit që t'i ndër marrë aktivitetet e caktuara;
- c) lënia e pasurisë së caktuar të kundërshtarit të sigurimit për ruajtje dhe përkujdesje personit të tretë;
- d) dhe masa tjera të cilat i cakton gjykata si të domosdoshme për sigurimin e kërkesëpadisë së propozuesit të sigurimit.

#### Neni 302

- 302.1 Kundërshtari i sigurimit i cili vepron në kundërshtim të aktvendimit për ndalimin e tjetërsimit, fshehjes, ngarkimit apo të disponimit me pasurinë përgjigjet sipas rregullave të së drejtës civile. Pas parashënimi të ndalimit, e deri sa ai të jetë në fuqi, nuk është i mundshëm regjistrimi në regjistrin publik i asnjë ndryshimi të të drejtave të krijuara në bazë të disponimit vullnetar të kundërshtarit të sigurimit.
- 302.2 Tjetërsimi apo ngarkimi në kundërshtim me urdhrin e gjykatës mbi ndalimin e tjetërsimit, fshehjes apo disponimit me pasurinë nuk ka efekt juridik ndaj propozuesit, përpos kur ka vend për aplikimin e rregullave mbi mbrojtjen e fituesit të ndershëm.
- 302.3 Dispozitat nga paragrafit 1 dhe 2 të këtij neni në mënyrë të përshtatshme aplikohen edhe për rastin e veprimit të personave në kundërshtim me vendimin e gjykatës mbi caktimin e masave tjera të sigurimit.
- 302.4 Me anë të masës së sigurimit nuk fitohet e drejta e pengut, përpos në rastin e justifikimit të parashënimit të së drejtës së pengut nga pika d paragrafi 1 i nenit 299 të këtij ligji.

### Neni 303

Duke i marrë parasysh rrethanat e rastit konkret, gjykata mund ti caktojë përnjëherë më tepër masa të sigurimit, kur ka nevojë për një gjë të tillë.

### Neni 304

- 304.1 Masa e sigurimit mund të propozohet para inicimit dhe gjatë zhvillimit të procesit gjyqësor kontestimor si dhe pas përfundimit të tij, derisa ekzekutimi të përfundojë plotësisht.
- 304.2 Propozimi paraqitet në formë të shkruar. Nëse propozimi është i lidhur me procesin gjyqësor që është në zhvillim e sipër, ai mund të paraqitet edhe gojarisht në seancë gjyqësore.
- 304.3 Në propozimin për caktimin e masave të sigurimit propozuesi i sigurimit duhet ta tregojë në të kërkesën, për sigurimin e të cilës bënë propozim, masën e sigurimit që e propozon, mjetet dhe objektin e masës të sigurimit. Në propozim duhet të tregohen edhe faktet mbi të cilat mbështetet kërkesëpadia, si dhe të propozohen mjetet provuese me të cilat mund të provohen pretendimet e parashtruara në propozim. Propozuesi i sigurimit ka për detyrë, nëse ka mundësi, që mjetet provuese t'ia bashkëngjijë propozimit.
- 304.4 Për propozimin mbi caktimin e masave të sigurimit të paraqitur gojarisht në mënyrë të përshtatshme aplikohen dispozitat e paragrafit 3 të këtij neni.

### Neni 305

- 305.1 Përveçse në rastet e përcaktuara me këtë ligj, masa e sigurimit nuk mund të caktohet nëse kundërshtari i sigurimit nuk ka pasur mundësinë që të deklarohet për propozimin e caktimit të saj.
- 305.2 Propozimin për caktimin e masave të sigurimit gjykata, bashkë me shkresat që i janë bashkangjitur, ia dërgon kundërshtarit të sigurimit me njoftim se mund të paraqesë përgjigje të shkruar brenda afatit shtatë (7) ditor.

### Neni 306

- 306.1 Me propozim të propozuesit të sigurimit të paraqitur me propozim për caktimin e masës së sigurimit gjykata mund ta caktojë masën e përkohshme të sigurimit pa njoftim dhe dëgjim paraprak të kundërshtarit të sigurimit, Nëse propozuesi i sigurimit e bënë të besueshëm pretendimin se masa e

sigurimit është e bazuar dhe urgjente dhe se me veprim ndryshe do të humbte qëllimi i masës së sigurimit.

- 306.2 Vendimin nga paragrafi 1 të këtij neni gjykata ia dërgon kundërshtarit të sigurimit menjëherë. Kundërshtari i sigurimit brenda afatit prej tre (3) ditësh në përgjigjen e tij mund t'i kontestojë shkaqet për caktimin e masës së përkohshme të sigurimit, e pas kësaj gjykata duhet të caktojë seancë në tri ditët e ardhshme. Përgjigja e kundërshtarit të sigurimit duhet të përmbajë pjesën arsyetuese.
- 306.3 Pas mbajtjes së seancës nga paragrafi 2 e këtij neni gjykata me aktvendim të veçantë e anulon aktvendimin me të cilin e ka caktuar masën e përkohshme ose e zëvendëson me një tjetër aktvendim mbi caktimin e masës së sigurimit në pajtim me nenin 307 të këtij ligji. Kundër aktvendimit të ri për caktimin e masës së sigurimit lejohet ankimi.

#### Neni 307

- 307.1 Në aktvendimin mbi caktimin e masës së sigurimit gjykata e përcakton llojin e masës, mjetet me të cilat ajo do të realizohet dhunshëm dhe objektin e masës së sigurimit, duke i aplikuar përkatësisht rregullat e procedurës gjyqësore përmbarese. Gjykata sipas detyrës zyrtare ia dërgon aktvendimin mbi caktimin e masës së sigurimit gjykatës përmbarese kompetente me qëllim të ekzekutimit të tij të përdhunshëm dhe regjistrimit publik me qëllim të regjistrimit në të.
- 307.2 Nëse me qëllim të realizimit të urdhëresës apo ndalimit të caktuar duhet ndryshuar mjetet apo objektet e sigurimit propozuesi i sigurimit mund të propozojë ndryshimin e tillë në të njëjtën procedurë dhe në bazë të urdhëresës apo ndalimit ekzistues.
- 307.3 Aktvendimi me të cilin është caktuar masa e sigurimit ka efekt të aktvendimit mbi ekzekutimin nga Ligji mbi procedurën përmbarese. Masa e sigurimit i detyron palët e procesit, si dhe personat që janë në ndërlidhje me to, por vetëm pasi të jenë lajmëruar për masën e sigurimit të caktuar me aktvendim.
- 307.4 Aktvendimet nga paragrafi 1 dhe 2 të këtij neni duhet ta kenë pjesën arsyetuese.
- 307.5 Kur gjykata sipas detyrës zyrtare cakton masën e sigurimit, atëherë ajo i zbaton në mënyrë të përshtatshme dispozitat e këtij neni.

#### Neni 308

- 308.1 Kur masa e sigurimit caktohet para se të jetë ngritur padia, me vendimin me të cilin caktohet masa e sigurimit caktohet edhe afati jo më i shkurtër se tridhjetë (30) ditor brenda të cilit propozuesi i sigurimit duhet të ngritë padinë.
- 308.2 Propozuesi i sigurimit duhet t'i paraqet gjykatës provën nga e cila shihet se ka vepruar në pajtim me paragrafin 1 të këtij neni.

#### Neni 309

- 309.1 Masa e sigurimit e caktuar me vendim të gjykatës mbetet në fuqi deri sa mos të jepet vendim tjetër mbi masën e sigurimit.
- 309.2 Nëse nuk aprovohet kërkesëpadia me aktgjykimin e shkallës së parë, gjykata kompetente mund ta lejë në fuqi masën e sigurimit deri sa aktgjykimi i shkallës së parë të mos behët i formës së prerë.
- 309.3 Masa e sigurimit e caktuar mbetet në fuqi më së shumti deri në skadimin e afatit prej tridhjetë (30) ditësh pas krijimit të kushteve për ekzekutim të detyrueshëm
- 309.4 Masën e sigurimit të regjistruar në librat publike gjykata e fshehë kryesisht.

#### Neni 310

- 310.1 Kundër aktvendimit të shkallës së parë mbi masën e sigurimit mund të paraqitet ankesa brenda afatit prej shtatë (7) ditësh nga dita e dorëzimit të tij.
- 310.2 Ankesa i dërgohet kundërshtarit të sigurimit i cili brenda afatit prej tre (3) ditësh nga dorëzimi ka të drejtë të paraqes në gjykatë përgjigjen në ankesë.
- 310.3 Mbi ankesën vendos gjykata e shkallës së dytë brenda afatit pesëmbëdhjetë (15) ditor nga dita në të cilën i arrin përgjigja në ankesë apo skadimit të afatit për paraqitjen e saj.
- 310.4 Ankesa nuk e shtyn ekzekutimin e aktvendimit nga paragrafi 1 të këtij neni.
- 310.5 Kundër aktvendimit mbi masën e përkohshme nuk lejohet ankimi.

#### Neni 311

- 311.1 Nëse janë caktuar masat e përcaktuara me nenin 299 paragrafi 1 pika a) dhe b) dhe nenin 306 paragrafi 1 me propozimin e kundërshtarit të propozuesit, apo të ruajtësit, gjykata vendos që të shiten sendet e luajtshme që prishen

shpejtë apo nëse ekziston rreziku nga rënia e dukshme e çmimit të sendeve të këtitilla.

- 311.2 Shitja e sendeve nga paragrafi 1 i këtij neni bëhet sipas rregullave për ekzekutimin mbi sendet e luajtshme.
- 311.3 Nëse është caktuar masa e sigurimit nga neni 300 paragraf 1 pika c) të këtij ligji gjykata mund, me propozimin e propozuesit të sigurimit apo të kundërshtarit të tij, me vendos që propozuesit të sigurimit t'i kalojë e drejta e realizimit të kërkesës, Nëse ekziston rreziku i mos realizimit të saj, për shkak të vonimit në realizimin e saj, apo rreziku i humbjes së të drejtës së regresit ndaj personit të tretë.
- 311.4 Shuma e të hollave e fituar me shitjen e sendeve të luajtshme apo me realizimin e kredisë ruhet në depozitim gjyqësor deri në momentin e heqjes së masës së sigurimit apo deri në momentin e propozimit të ekzekutimit të saj, por më së voni brenda afatit prej tridhjetë (30) ditësh nga dita në të cilën kredia bëhet e arritur/kërkueshme. Dobitë e tjera të fituara me arritjen kërkueshmërinë e kredisë deponohen, Nëse ka mundësi, në depozitën gjyqësore, apo caktohet mënyrë tjetër e ruajtjes deri në momentin e heqjes së masës së sigurimit, përkatësisht derisa propozuesi i sigurimit të propozojë ekzekutimin, por më së shumti 30 ditë nga dita kur kredia bëhet ekzekutive.

#### Neni 312

- 312.1 Propozuesi i sigurimit në propozimin e tij për caktimin e masës së sigurimit, ose më vonë, mund të deklarojë se pajtohet që, në vend se të caktohet masa e sigurimit, do të ishte i kënaqur me dhënien e pengut nga ana e kundërshtarit të tij.
- 312.2 Dhënia e pengut në vend të masës së sigurimit mund të caktohet edhe me propozimin e kundërshtarit të sigurimit Nëse me këtë pajtohet propozuesi i sigurimit.

#### Neni 313

- 313.1 Nëse propozuesi i sigurimit brenda afatit të caktuar me aktvendimin mbi caktimin e masës së sigurimit nuk paraqet provën e përcaktuar në nenin 314 të këtij ligji gjykata do ta përfundojë procedurën dhe i anulon veprimet e kryera.
- 313.2 Me propozim të kundërshtarit të sigurimit procedura e filluar do të përfundohet dhe veprimet e kryera do të anulohen, Nëse rrethanat për shkak

të të cilave është caktuar masa e sigurimit, më vonë kanë ndryshuar dhe e kanë bërë të pa nevojshme atë.

313.3 Gjykata sipas propozimit të kundërshtarit të sigurimit e përfundon procedurën dhe i anulon veprimet e kryera edhe nëse:

- a) kundërshtari i sigurimit e deponon në gjykatë shumën e detyruar të kërkesës që sigurohet, me kamata dhe shpenzime;
- b) kundërshtari i sigurimit e bënë të besueshëm pretendimin se kërkesa në momentin e dhënies së aktvendimit mbi caktimin e masës së sigurimit është realizuar apo se ka qenë mjaftësisht e siguruar;
- c) me vendim të formës së prerë është vërtetuar se kërkesa nuk është krijuar apo se është shuar.

313.4 Në rastet nga paragrafi 1 dhe 3 pika b) dhe c) të këtij neni, shpenzimet e krijuara me caktimin dhe zbatimin e masës së sigurimit i ngarkohen propozuesit të sigurimit.

#### Neni 314

314.1 Shpenzimet e shkaktuara gjatë procedurës sigurimore paraprakisht i bartë propozuesi i sigurimit.

314.2 Nëse propozimi për caktimin e masës së sigurimit paraqitet gjatë zhvillimit të procedurës kontestimore apo të ndonjë procedure tjetër gjyqësore, gjykata kompetente për vendosje mbi kërkesëpadinë, apo mbi kërkesën tjetër, vendos se cili i bartë shpenzimet e caktimit dhe zbatimit të masës së sigurimit.

#### Neni 315

Propozuesi i sigurimit ka të drejtë, sipas rregullave të përgjithshme të së drejtës pasurore, që t'i kompensohet dëmi që i është shkaktuar me mosrespektimin e aktvendimit mbi masën siguruese të caktuar.

#### Neni 316

Kundërshtari i sigurimit ka të drejtë, sipas rregullave të përgjithshme të së drejtës pasurore, që t'i kompensohet dëmi nga propozuesi i sigurimit i shkaktuar me masën e sigurimit për të cilën është vërtetuar se ka qenë e pa bazë apo të cilën propozuesi i sigurimit nuk e ka justifikuar.

#### Neni 317

Kërkesat për shpërblimin e dëmit nga neni 315 dhe 316 të këtij ligji parashkruhen brenda afatit prej 1 viti nga dita e mbarimit të efektit të aktvendimit me të cilin masa e sigurimit është caktuar.

#### Neni 318

Masat e sigurimit të kërkesëpadisë i zbaton gjykata që do të ishte kompetente për ekzekutimin e aktgjykimit të formës së prerë.

### KREU XXII - MJETET PROVUESE DHE MARRJA E PROVAVE (§§ 319 – 385)

#### Dispozita të përgjithshme

#### Neni 319

- 319.1 Palët ndërgjyqëse kanë për detyrë të provojnë faktet mbi të cilat i bazojnë kërkesat dhe pretendimet e tyre.
- 319.2 Të provuarit përfshihen në të gjitha faktet që janë të rëndësishme për dhënien e vendimit.
- 319.3 Gjykata vendos se cilat prova do të merren me qëllim të vërtetimit të fakteve vendimtare.

#### Neni 320

Gjykata është e autorizuar që t'i marrë edhe provat që nuk i kanë propozuar palët, nëse konstaton se ato tentojnë të disponojnë me kërkesat me të cilat nuk kanë të drejtë të disponojnë (neni 3 paragrafi 3 i këtij ligji).

#### Neni 321

- 321.1 Nuk ka nevojë të provohen faktet e ditura botërisht e as faktet që i ka vërtetuar gjykata në gjykimet e mëhershme.
- 321.2 Nuk ka nevojë të provohen faktet të cilat pala i ka pohuar para gjykatës gjatë procesit gjyqësor.
- 321.3 Gjykata ka të drejtë të vlerësojë, duke i marrë parasysh të gjitha rrethanat e rastit konkret, se a do ta merr si të pohuar apo si të kontestuar faktin të cilin pala njëherë e ka pohuar e pastaj tërësisht apo pjesërisht e ka kontestuar, apo e ka kufizuar pohimin duke shtuar fakte tjera.



321.4 Faktet, ekzistimin e të cilave e presupozon ligji, nuk duhet provuar, por mund të provohet mosekzistimi i tyre, nëse me ligj nuk është përcaktuar diç tjetër.

#### Neni 322

322.1 Nëse gjykata në bazë të provave të marra (neni 8 i këtij ligji) nuk mund të konstatojë me siguri ndonjë fakt, atëherë për ekzistimin e tijt do të përfundojë duke i aplikuar rregullat mbi barrën e provës.

322.2 Pala që pretendon se i takon një e drejtë ka për detyrë të provojë faktin që është qenësor për krijimin ose realizimin e saj, nëse ligji nuk parasheh diç tjetër.

322.3 Pala e cila e konteston ekzistimin e ndonjë të drejte e bartë barrën e të provuarit të faktit që e ka penguar krijimin apo realizimin e saj, ose në bazë të të cilit ka pushuar se ekzistuari, Nëse ligji nuk parasheh diç tjetër.

#### Neni 323

Nëse vërtetohet se palës i takon e drejta që t'i shpërblehet dëmi me të holla apo me sende të zëvendësueshme, por pa mundësi që të caktohet shuma e të hollave, apo sasia e sendeve të tilla, apo se një gjë e tillë do të mund të bëhej me vështirësi shumë të mëdha, gjykata për këtë do të vendos sipas çmuarjes së lirë.

#### Neni 324

324.1 Provat merren në seancën për shqyrtimin kryesor të çështjes.

324.2 Gjkata mund të vendos që prova e caktuar të merret përpara një gjykatë tjetër (gjkata e porositur). Në rast të tillë procesverbali mbi provën e marrë lexohet në seancën për shqyrtimin kryesor të çështjes.

324.3 Kur gjykata vendos që një provë të merret përpara gjykatës së porositur, në letër porosinë për marrjen e provës përshkruhet gjendja e çështjes sipas dhënave nga shkresat e lëndës dhe posaçërisht do të theksohet se cilat rrethana duhet të kihen posaçërisht parasysh me rastin e marrjes së provës.

324.4 Për seancën e marrjes së provave para gjykatës së porositur duhet të njoftohen edhe palët ndërgjyqëse.

324.5 Gjkata e porositur, me rastin e marrjes së provës, i ka të gjitha autorizimet të cilat i takojnë gjykatës së çështjes me rastin e marrjes së provave në seancën për shqyrtimin kryesor të çështjes.

324.6 Kundër aktvendimit të gjykatës me të cilin marrja e provës i është besuar gjykatës së porositur nuk lejohet ankim i veçantë.

#### Neni 325

Nëse sipas rrethanave të rastit mund të supozohet se një provë nuk do të mund të merret brenda një afati të arsyeshëm apo nëse prova duhet të merret jashtë shtetit, gjykata në aktvendimin mbi marrjen e provave do ta caktojë një afat deri në të cilin do të pritet që prova të merret. Pas kalimit të afatit të tillë shqyrtimi i çështjes do të bëhet pavarësisht se prova e tillë nuk është marrë.

### KËQYRJA NE VEND

#### Neni 326

326.1 Këqyrja në vend ndërmerret sa herë që çmohet e nevojshme që për vërtetimin e ndonjë fakti, apo për sqarimin e ndonjë rrethane, duhet të bëhet vrojtimi i drejtpërdrejt nga gjykata e çështjes.

326.2 Marrja e provës me anë të këqyrjes së drejtpërdrejt mund të bëhet edhe me bashkëveprimin e ekspertit.

#### Neni 327

Nëse sendi që duhet këqyrë nuk mund të sjellët në gjykatë apo nëse sjellja e tij do të shkaktonte shpenzime të mëdha, gjykata e bënë këqyrjen e sendit në vendin ku ai ndodhet dhe me atë rast hartohet procesverbali.

#### Neni 328

328.1 Nëse duhet të këqyret sendi i cili ndodhet tek njëra nga palët ndërgjyqëse, apo tek personi i tretë, atëherë në mënyre adekuate do të aplikohen dispozitat e këtij ligji me të cilat parashihet mënyra e marrjes së shkresave prej palëve apo personave të tretë.

328.2 Nëse duhet të këqyret sendi që ndodhet tek organi shtetëror, ose personi juridik, të cilit i është besuar ushtrimi i autorizimeve publike, për marrjen e tyre do të zbatohen dispozitat e këtij ligji me të cilat është rregulluar mënyra e marrjes së dokumenteve nga këto organe apo persona juridik.

328.3 Për kryerjen e këqyrjes palët ndërgjyqëse njoftohen rregullisht.

## SHKRESAT

### Fuqia provuese e shkresave

#### Neni 329

- 329.1 Shkresa të cilën e ka hartuar në formën e caktuar organi shtetëror brenda kufijve të kompetencës së vet, si dhe shkresa të cilën në formë të tillë e ka hartuar ndërmarrja apo organizata tjetër në ushtrimin e autorizimeve publike që i janë besuar me ligj (dokumenti publik), provon saktësinë e asaj që konfirmohet apo caktohet në të.
- 329.2 Të njëjtën fuqi provuese e kanë edhe shkresat tjera të cilat, me dispozita të veçanta, në pikëpamje të fuqisë provuese janë barazuar me shkresat publike.
- 329.3 Lejohet që të provohet se në shkresën publike faktet janë konstatuar jo saktësisht apo se shkresa është hartuar në mënyrë jo të rregullt.
- 329.4 Nëse gjykata dyshon në autenticitetin e shkresës, mund të kërkojë që për këtë të deklarohet organi nga i cili shkresa duhet të jetë hartuar.

#### Neni 330

Nëse me kontratë ndërkombëtare nuk është përcaktuar ndryshe, shkresat publike të huaja të legalizuara sipas ligjit, kanë, me kusht reciprociteti, të njëjtën fuqi provuese sikurse shkresa publike e vendit.

#### Neni 331

- 331.1 Çdo palë ndërgjyqëse detyrohet kryesisht të paraqesë shkresat që ka përdorur për të provuar thëniet e veta.
- 331.2 Së bashku me shkresën e hartuar në gjuhë të huaj paraqitet edhe përkthimi i legalizuar nga ana e përkthyesit gjyqësor të përhershëm.

#### Neni 332

Nëse dokumenti ndodhet tek organi shtetëror, ose personi juridik, të cilit i është besuar ushtrimi i autorizimeve publike, kurse pala vetë nuk është në gjendje ta dorëzojë apo tregojë atë, atëherë gjykata sipas propozimit të palës do ta marrë sipas detyrës zyrtare këtë dokument.

#### Neni 333

- 333.1 Nëse njëra palë i referohet një shkresë dhe pohon se ajo ndodhet tek pala kundërshtare, gjykata me aktvendim do të thërras këtë të fundit që ta paraqes shkresën, duke ia caktuar për këtë një afat të arsyeshëm.
- 333.2 Kundër aktvendimit nga paragrafi 1 i këtij neni nuk lejohet ankim i veçantë.

#### Neni 334

Pala nuk mund të refuzojë paraqitjen e dokumentit, Nëse ajo vetë i është referuar dokumentit si mjet provues për thëniet , apo nëse është fjala për dokumentin të cilin sipas ligjit ka për detyrë ta dorëzojë ose ta tregojë apo, nëse dokumenti, duke marrë parasysh përmbajtjen e tij konsiderohet si i përbashkët për të dy palët.

#### Neni 335

- 335.1 Në pikëpamje të së drejtës së palës për të refuzuar paraqitjen e dokumenteve të tjera, do të zbatohen në mënyrë adekuate dispozitat e neneve 342 dhe 343 të këtij ligji.
- 335.2 Kur pala që është ftuar të paraqesë shkresën mohon se shkresa ndodhet tek ajo, atëherë për konstatimin e këtij fakti gjykata mund të marrë prova.

#### Neni 336

Duke marrë parasysh të gjitha rrethanat e rastit konkret, gjykata do të çmojë, sipas bindjes së vet, se çfarë domethënie ka fakti se pala që e ka në posedim shkresën nuk është e gatshme ta dorëzojë atë në gjykatë. Kjo vlen edhe për rastin kur pala nuk vepron sipas aktvendimit për dorëzimin e dokumentit, apo kur mohon se ai ndodhet në posedimin e saj.

#### Neni 337

- 337.1 Sipas propozimit të palës gjykata mund ta urdhërojë personin e tretë që ta paraqesë dokumentin që shërben si provë për vërtetimin e ndonjë fakti vendimtar
- 337.2 Personi i tretë mund të refuzojë dorëzimin e shkresës vetëm në pajtim me nenin 342 dhe 349 të këtij ligji.
- 337.3 Para se të jep aktvendim me të cilin personi i tretë urdhërohet ta dorëzojë dokumentin, gjykata e thërret atë që të deklarohet.

#### Neni 338

- 338.1 Kur personi i tretë e konteston detyrimin e dorëzimit të dokumentit që ndodhet tek ai, gjykata vendos se a është ai i detyruar ta dorëzojë atë ose jo.
- 338.2 Kur personi i tretë mohon se dokumenti ndodhet tek ai, gjykata mund, ta vërtetojë këtë fakt, të marrë prova.
- 338.3 Aktvendimi i formës së prerë për detyrimin e personit të tretë që ta dorëzojë dokumentin mund të përmbahet nëpërmjet gjykatës kompetente sipas rregullave të procedurës përmbarese.
- 338.4 Personi i tretë ka të drejtë të kërkojë pagimin e shpenzimeve që i ka pasur lidhur me dorëzimin e dokumentit. Edhe për këtë rast zbatohen në mënyrë të përshtatshme dispozitat e nenit 355 të këtij ligji.

#### DËSHMITARËT

#### Neni 339

- 339.1 Çdo person që thirret si dëshmitar ka për detyrë t'i përgjigjet thirrjes, e nëse me këtë ligj nuk është përcaktuar ndryshe, ka për detyrë edhe të dëshmojë.
- 339.2 Si dëshmitar mund të pyetën vetëm personat që kanë aftësi të japin informata mbi faktet që duhet të provohen.
- 339.3 Të miturit nën katërbëdhjetë vjeç mund të pyeten si dëshmitar vetëm kur thëniet e tyre janë të domosdoshme për zgjidhjen e çështjes.

#### Neni 340

Pala e cila propozon që personi i caktuar të pyetet si dëshmitar duhet më parë të tregojë se për çfarë duhet të dëshmojë ai, si dhe ta tregojë emrin, mbiemrin dhe vendbanimin e tij.

#### Neni 341

Nuk mund të dëgjohet si dëshmitar personi i cili me thëniet e tij do ta cenonte detyrën e ruajtjes së sekretit zyrtar apo ushtarak, derisa organi kompetent të mos e lirojë nga kjo detyrë.

#### Neni 342

- 342.1 Dëshmitari mund të refuzojë të dëshmojë:

- d) mbi atë që pala ndërgjyqëse ia ka besuar si përfaqësuesit të vetë me prokurë;
- e) mbi atë që pala ose personi tjetër ia ka treguar dëshmitarit si rrëfyesit të vetë;
- f) mbi faktet që i ka marrë në dijeni dëshmitari si avokat, si mjek ose në ushtrimin e ndonjë profesioni apo veprimtarie tjetër, Nëse ekziston detyrimi që të ruhet si sekret ajo që merr në dijeni gjatë ushtrimit të profesionit apo të veprimtarisë së vet.

342.2 Personat e këtillë gjykata i njofton me të drejtën e refuzimit të dhënies së deklaratës së dëshmitarit.

#### Neni 343

343.1 Dëshmitari mund të refuzojë përgjigjen në pyetjet e caktuara, nëse për këtë ekzistojnë arsye të rëndësishme, e sidomos nëse me përgjigjen në këto pyetje, do t'ia ekspozonte përgjegjësisë penale vetës, apo të afërmit e tij të gjinisë së gjakut në vijë vertikale deri në cilëndo shkallë, e në vijë horizontale deri në shkallën të tretë përfundimisht, bashkëshortin e vet, ose të afërmit e gjinisë së krushqisë deri në shkallë të dytë përfundimisht, edhe Nëse ka pushuar martesë, personin me të cilin jeton në bashkësi jashtëmartesore, apo kujdestarin e vet, ose personin nën kujdestarinë e tij, adoptuesin apo të adoptuarin e vet.

343.2 Gjykata ka për detyrë ta njoftojë dëshmitarin me të drejtën e refuzimit të përgjigjes në pyetjet e natyrës së përmendur në paragrafin 1 të këtij neni.

#### Neni 344

Dëshmitari nuk ka të drejtë që, për shkak të rrezikut nga pësimi i dëmit pasuror, të refuzojë dëshminë lidhur me veprimet juridike të krijuara në praninë e tij si dëshmitar i ftuar, me veprimet që në pikëpamje të raportit kontestues i ka kryer me cilësinë e paraardhësit juridik, apo të përfaqësuesit të njërit nga palët ndërgjyqësore, me faktet që kanë të bëjnë me raportet pasurore të kushtëzuara me lidhjen familjare apo martesore, me faktet që kanë të bëjnë me lindjen, vdekjen apo lidhjen e martesës, si dhe kur me dispozita të posaçme ka për detyrë të jep deklaratë apo të bëjë njoftime.

#### Neni 345

345.1 Gjykata e çmon arsyeshmërinë e refuzimit të dëshmisë, apo refuzimit të përgjigjes në pyetjet konkrete, në të cilën dëshmitari duhet të dëgjohet. Kur është nevoja lidhur me këtë më parë mund të dëgjohen palët ndërgjyqëse.

345.2 Kundër aktvendimit nga paragrafi 1 i këtij neni palët nuk kanë të drejtë ankimi të veçantë, kurse dëshmitari këtë aktvendim mund ta sulmojë vetëm me anë të ankesës së paraqitur kundër aktvendimit me të cilin është dënuar me gjobë, ose me burgim, nga shkak se ka refuzuar të dëshmojë ose të japë përgjigje në pyetjet konkrete ( neni 292 paragrafi 2 i këtij ligji).

#### Neni 346

- 346.1 Thirrja e dëshmitarit bëhet me anë të letërthirrjes në të cilën tregohet emri, mbiemri, profesioni, vendi dhe koha e ardhjes, lënda lidhur me të cilën thirret, dhe theksimi se thirret në cilësinë e dëshmitarit. Në letërthirrje dëshmitari paralajmërohet për pasojat e mosardhjes në gjykatë pa arsye, si dhe për të drejtën që t'i paguhen shpenzimet.
- 346.2 Thirrja e dëshmitarit me moshe nën katërmbëdhjetë vjeç behet nëpërmjet prindërve ose kujdestarit ligjor.
- 346.3 Dëshmitarët të cilët për shkak të moshës së shtyrë, sëmundjes ose të metave fizike nuk mund të vijnë në gjykatë, do të dëgjohen në banesën e tyre apo në lokalet tjera në të cilat ndodhen.

#### Neni 347

- 347.1 Dëshmitarët dëgjohen veç e veç dhe pa praninë e dëshmitarëve që do të dëgjohen më vonë. Dëshmitari ka për detyrë që përgjigjet t'i japë gojarisht.
- 347.2 Dëshmitari më parë njoftohet me detyrën që të flasë të vërtetën dh se asgjë nuk guxon ta lehtë në heshtje, pastaj do të paralajmërohet për pasojat e dhënies së deklaratës së rreme. Pas kësaj dëshmitari pyetet për emrin, mbiemrin, emrin e babait, vendlindjen, moshën dhe për raportin e tij me palët ndërgjyqëse.

#### Neni 348

- 348.1 Pas pyetjeve të përgjithshme, dëshmitarit i bënë pyetje pala që e ka propozuar thirrjen e tij, e pas kësaj pala kundërshtarë.
- 348.2 Gjykata në çdo moment mund t'i bëjë pyetje dëshmitarit
- 348.3 Dëshmitari gjithmonë pyetet si i ka marrë në dijeni gjërat për të cilat dëshmon.

#### Neni 349

Kur ndërmjet thënieve të dëshmitarëve ka mospërputhje të tilla që krijojnë vështirësi lidhur me konstatimin e fakteve të rëndësishme, gjykata vetë, ose me kërkesën e palëve, bënë ballafaqimin e dëshmitarëve të pyetur më parë. Te ballafaquarit do të pyeten për secilën rrethanë për të cilën nuk kanë dhënë deklarata të njëjta, dhe përgjigjet e dhëna futën në procesverbal.

#### Neni 350

Pas mbarimit të dëshmisë dëshmitari mund të largohet me leje të gjykatës. Në rast nevoje të marrjes prapë në pyetje, atëherë gjykata urdhëron që ai të qëndrojë në sallë pa kontaktuar me dëshmitarët e tjerë.

#### Neni 351

Pala që ka kërkuar thirrjen e një dëshmitari mund të kërkojë që ai të mos pyetet. Kërkesa merret parasysh në rast se pala tjetër është dakord dhe kur gjykata çmon se pyetja e tij nuk do të jetë e nevojshme për sqarimin e çështjes.

#### Neni 352

Kur gjatë gjykimit të çështjes rezultojnë të sqaruara faktet dhe pretendimet e palëve, gjykata vetë ose me kërkesën e tyre, mund të heqë dorë nga pyetja e dëshmitarëve të tjerë të thirrur për këtë qëllim.

#### Neni 353

Gjykata mund të lejojë dëshmitarin që të përdorë shënime ose të dhëna të tjera të shkruara, kur flasin për çështje që kanë të bëjnë me llogari e të dhëna që është vështirë të mbahen mend.

#### Neni 354

- 354.1 Dëshmitari që nuk e dinë gjuhën në të cilën zhvillohet procedura pyetet me anë të përkthyesit.
- 354.2 Nëse dëshmitari është i shurdhër, pyetjet i bëhen me shkrim, e nëse është memec, do te ftohet që përgjigjet t'i japë me shkrim. Nëse pyetja e dëshmitarit nuk mund të bëhet në këtë mënyre, do të ftohet interpreti i cili mund të merret vesh me dëshmitarin.
- 354.3 Gjykata e njofton interpretin për detyrën e transmetimit të saktë të pyetjeve që i bëhen dëshmitarit dhe të përgjigjeve që do t'i japë dëshmitari.



#### Neni 355

- 355.1 Dëshmitari ka të drejtë kompensimi të shpenzimeve të udhëtimit, ushqimit e të fjetjes, si dhe për kompensimin e fitimit të humbur.
- 355.2 Dëshmitari duhet ta kërkojë kompensimin menjëherë pasi të pyetet, në të kundërtën e humbë të drejtën e kompensimit. Gjykata ka për detyrë ta njoftojë dëshmitarin për pasojën e këtillë.
- 355.3 Në aktvendimin me të cilin caktohen shpenzimet e dëshmitarit, caktohet edhe shuma e të hollave që paguhet nga paradhënia e depozituar nga palët, e Nëse paradhënia nuk është bërë, urdhërohet pala që dëshmitarit t'ia paguajë shumën e caktuar brenda afatit prej shtatë (7) ditësh.
- 355.4 Ankesa kundër aktvendimit nga paragrafi 3 e këtij neni nuk e shtyn ekzekutimin e tij.

#### EKSPERTËT

#### Neni 356

Gjykata, me propozimin e palëve mundë të bëjë të provuarit me anë të ekspertizës, sa herë që për vërtetimin apo sqarimin e fakteve, apo të rrethanave të caktuara nevojitet dijoni profesionale të cilën nuk e ka gjyqtari i çështjes.

#### Neni 357

- 357.1 Pala e cila e propozon ekspertizën ka për detyrë që në propozimin e saj ta tregojë objektin dhe vëllimin e ekspertizës dhe ta propozojë personin që do ta bëjë ekspertizën.
- 357.2 Palës kundërshtare duhet dhënë mundësia që të deklarohet lidhur me ekspertizën e propozuar.
- 357.3 Nëse palët nuk merren vesh për personin që do të bëjë ekspertizën si dhe për objektin dhe vëllimin e tij, vendimin për këtë do ta jep gjykata.

#### Neni 358

- 358.1 Ekspertizën e kryen një ekspert.
- 358.2 Gjykata, me propozimin e palës, mund t'i caktojë më tepër ekspertë për lloje të ndryshme ekspertizash.
- 358.3 Ekspertet caktohen, në radhë të parë, nga radha e ekspertëve të përhershëm të emëruar nga gjykata për llojin e caktuar të ekspertimit.

- 358.4 Ekspertizat me të ndërlikuara i besohen në rend të parë institucioneve profesionale (spitaleve, laboratorëve kimike, fakulteteve etj).
- 358.5 Nëse ekzistojnë institucionet e specializuara për llojet e caktuara ekspertizash (ekspertiza e monedhave të falsifikuara, e dorëshkrimeve, mandej ekspertiza daktiloskopike etj), atëherë ekspertizat e tilla do t'u besohen institucioneve të tilla.

#### Neni 359

- 359.1 Eksperti i caktuar ka për detyrë t'i përgjigjet thirrjes së gjykatës dhe të parashtrijë konstatimin dhe mendimin e tij.
- 359.2 Gjykata do ta lirojë ekspertin, me kërkesën e tij, nga detyra e ekspertimit nga shkaqet për të cilat dëshmitari mund të refuzojë të dëshmojë, ose që të japë përgjigje në ndonjë pyetje konkrete.
- 259.3 Gjykata mund ta lirojë ekspertin, me kërkesën e tij, nga detyra e ekspertimit edhe për shkaqe të tjera të justifikuara.
- 259.4 Lirimin nga detyra e ekspertimit mund ta kërkojë edhe personi i autorizuar i organit apo organizatës në të cilin është i punësuar eksperti.

#### Neni 360

- 360.1 Eksperti i caktuar mund të përjashtohet nga detyra e ekspertimit po për ato shkaqe për të cilat përjashtohet gjyqtari nga gjykimi, por për ekspertim mund të merret edhe personi që më parë është pyetur si dëshmitar.
- 360.2 Pala mund ta paraqesë kërkesën për përjashtimin e ekspertit posa të merr dijëni për shkakun e përjashtimit, por më së voni para fillimit të marrjes së provës me anë të ekspertimit.
- 360.3 Në kërkesën për përjashtimin e ekspertit pala ka për detyrë t'i tregojë rrethanat mbi të cilat e mbështet kërkesën e saj për përjashtim.
- 360.4 Mbi kërkesën për përjashtimin e ekspertit vendos gjykata e çështjes.
- 360.5 Kundër aktvendimit me të cilin aprovet apo refuzohet kërkesa për përjashtimin e ekspertit nuk lejohet ankimi i veçantë.
- 360.6 Nëse pala ka mësuar për shkakun e përjashtimit pasi të jetë kryer ekspertiza, dhe për këtë arsye e bënë kundërshtimin e ekspertizës, atëherë gjykata vepron sikur në rastin kur kërkesa paraqitet para se të jetë kryer ekspertimi.

### Neni 361

Marrjen e provës me anë të ekspertizës gjykata e cakton me aktvendim, i cili duhet të përmbajë:

- e) emrin, mbiemrin dhe profesionin e ekspertit;
- f) objektin e kontestit;
- g) vëllimin dhe lëndën e ekspertimit;
- h) afatin për paraqitjen me shkrim të konstatimit dhe mendimit.

### Neni 362

- 362.1 Eksperti gjithmonë thirret në seancën për shqyrtimin kryesor të çështjes.
- 362.2 Kopjen e aktvendimit nga neni 359 të këtij ligji gjykata ia dërgon ekspertit bashkë me letërthirrjen për në seancë kryesore.
- 362.3 Në letërthirrje gjykata i kujton ekspertit se mendimin e tij duhet ta paraqesë me nder dhe në pajtim me rregullat e shkencës dhe profesionit, si dhe pasojat që i shkaktohen nga mosparaqitja e konstatimit dhe mendimit brenda afatit të caktuar, përkatësisht nga mosardhja pa arsye në seancën gjyqësore. Po në letërthirrje eksperti njoftohet me të drejtën për shpërblimin që i takon për punën e kryer si dhe me të drejtën që t'i paguhen shpenzimet e bëra lidhur me ekspertizën.

### Neni 363

- 363.1 Eksperti ka të drejtë të njihet me materialet e çështjes, të marrë pjesë në seancë gjyqësore, të bëjë pyetje, të japë shpjegime dhe të kërkojë nga palët të marrë të dhëna si dhe nga të tretët brenda kufijve të nevojshëm për kryerjen e detyrës.
- 363.2 Kur sipas vendimit të gjykatës për kryerjen e ekspertimit është e nevojshme që eksperti të njihet me sende, evidenca, llogari e dokumente të tjera, palët mund të jenë të pranishme dhe mund t'i paraqesin ekspertit me shkrim mendime, vërejtje të specialistëve të tyre, të cilët mund të pyetën me cilësinë e dëshmitarit, ose kërkesa që lidhën me plotësimin e detyrës, por gjithnjë brenda kompetencave të caktuara në aktvendimin e gjykatës.

#### Neni 364

364.1 Konstatimin dhe mendimin e tij me shkrim eksperti duhet t'ia dorëzojë gjykatës para së të filloj seanca për shqyrtimin kryesor të çështjes, Nëse gjykata nuk vendos ndryshe.

364.2 Mendimi i ekspertit gjithmonë duhet të jete i arsytuar.

#### Neni 365

Nëse eksperti nuk e paraqet konstatimin dhe mendimin brenda afatit të caktuar, gjykata, pasi të skadojë afati të cilin ua lenë palëve për deklarim lidhur me moskryerjen e ekspertimit, e cakton ekspertin tjetër.

#### Neni 366

366.1 Kur shihet se ekspertimi është i mangët ose i paqartë, si dhe kur ka ndryshim mendimesh midis ekspertëve, gjykata, kryesisht ose me kërkesën e ndonjërës nga palët, mund të kërkojë sqarime plotësuese. Në rast të këtillë ekspertit i caktohet një afat brenda të cilit duhet të dorëzohet konstatimi dhe mendimi me shkrim.

366.2 Nëse eksperti as pas thirrjes së gjykatës nuk e paraqet konstatimin dhe mendimin e plotë dhe të qartë, gjykata, pas deklarimit të bërë nga palët, cakton ekspertin tjetër për ekspertim.

#### Neni 367

Gjykata ua dërgon palëve konstatimin dhe mendimin e shkruar së paku tetë (8) ditë para se të filloj seanca për shqyrtimin kryesor të çështjes.

#### Neni 368

368.1 Seanca për shqyrtimin kryesor mbahet edhe nëse eksperti nuk vjen në të.

368.2 Përrjashtimisht nga paragrafi 1 i këtij neni, gjykata, sipas propozimit të palëve mund ta shtyjë shqyrtimin e çështjes dhe të caktojë seancë të re, për në të cilën thirret eksperti, nëse konstaton se prania e tij është e domosdoshme për sqarimin apo plotësimin e konstatimit dhe mendimit të tij.

#### Neni 369

369.1 Kur janë caktuar më tepër se një ekspert, të gjithë ata mund ta paraqesin konstatimin dhe mendimin e përbashkët Nëse nuk ka dallime midis tyre.

Nëse ekzistojnë dallime në konstatimet dhe mendimet e tyre, atëherë secili nga ta paraqet konstatim dhe mendim të veçantë.

369.2 Nëse të dhënat e ekspertëve në konstatimin e ekspertëve dallohen esencialisht, apo nëse konstatimi i tyre është i paqartë, jo i plotë apo kontradiktor me vetë veten apo me rrethanat e shqyrtuara, e këto të meta nuk mund të evitohen me dëgjimin e përsëritur të ekspertëve, do të përsëritet ekspertimi me ekspertë të njëjtë apo me ekspertë të tjerë.

Neni 370

Kundër aktvendimeve nga neni 356, 360 dhe 364 të këtij ligji nuk lejohet ankimi.

Neni 371

Lidhur me marrjen e provës me anë të ekspertimit në mënyrë adekuate zbatohen dispozitat për pyetjen e dëshmitarëve, Nëse me dispozitat e këtij ligji nuk është përcaktuar ndryshe.

Neni 372

Dispozitat ligjore lidhur me ekspertimin në mënyrë të përshtatshme zbatohen edhe për interpretet gjyqësor.

## DËGJIMI I PALËVE

Neni 373

Me propozimin e palës, gjykata mund të vendos që të merret prova me anë të dëgjimit të palëve.

Neni 374

Gjykata vendos që të pyetet vetëm njëra palë ndërgjyqëse, Nëse pala tjetër refuzon të pyetet apo nuk vepron sipas thirrjes së gjykatës.

Neni 375

375.1 Për palën e cila nuk e ka zotësinë procedurale pyetet përfaqësuesi ligjor i saj.

375.2 Gjykata mund të vendos që në vend, apo krahas përfaqësuesit ligjor të palës, të pyetet vetë pala, Nëse është i mundshëm dëgjimi i saj.

375.3 Për personin juridik që është palë ndërgjyqëse dëgjohej personi që është i caktuar për përfaqësimin e tij me ligj ose me aktin e përgjithshëm të tij.

375.4 Nëse si palë ndërgjyqëse në njërën anë marrin pjesë disa persona, gjykata do të vendos se a do të pyetën të gjithë ata apo vetëm disa sosh.

#### Neni 376

376.1 Letërthirrja për në seancë i dërgohet personalisht palës, apo personit që do të pyetet në vend të palës.

376.2 Në letërthirrje theksohet se në seancë do të merret prova me dëgjimin e palëve dhe se pala që vjen në seancë mund të pyetet në mungesë të palës tjetër.

#### Neni 377

Nuk mund të përdoret kurrfarë mase shtrëngimi ndaj palës që nuk i përgjigjet thirrjes së gjykatës për tu pyetur, e as të detyrohet ajo për të dhënë deklaratë.

#### Neni 378

Dispozitat e këtij ligji me të cilat është rregulluar marrja e provës me anë të dëshmitarëve aplikohen edhe me rastin e marrjes së provës me anë të dëgjimit të palëve, Nëse për dëgjimin e palëve nuk është parashikuar shprehimisht dhe posaçërisht diç tjetër.

### SIGURIMI I PROVËS (PARAPROVA)

#### Neni 379

379.1 Kur një provë, nga e cila varët zgjidhja e kontestit ose që ndikon në sqarimin e tij, ka rrezik të zhduket ose të vështirësohet marrja e saj, me kërkesën e palës se interesuar mund të urdhërohet marrja para kohë e saj, qoftë gjatë zhvillimit të procesit gjyqësor qoftë para fillimit të tij.

379.2 Sigurimi i provës mund të kërkohet para dhe gjatë procedurës së iniciuar për përsëritjen e gjykimit të përfunduar me vendim të formës së prerë.

#### Neni 380

Kërkesa për sigurimin e provës paraqitet në gjykatën që është duke shqyrtuar çështjen dhe, në rast se padia nuk është ngritur ende, në gjykatën e vendit ku ka banim personi që do të pyetet ose ku ndodhet sendi që duhet të këqyret. Në rastet e ngutshme kërkesa për sigurimin e provës mund të paraqitet në gjykatën e vendit ku ka banim personi që do të pyetet ose ku ndodhet sendi që duhet të këqyret, përkundrejt faktit se padia është ngritur.

### Neni 381

Në kërkesën për sigurimin e provës duhet të tregohen prova që do të merret, rrethanat dhe faktet për vërtetimin e të cilave shërben ajo dhe arsyet që e justifikojnë marrjen e saj përpara se të vijë koha normale për marrjen e provave. Në kërkesë duhet të tregohet emri dhe mbiemri i palës kundërshtare, përveç kur ajo është e panjohur.

### Neni 382

- 382.1 Kopja e kërkesës i komunikohet palës kundërshtare, përveç kur ajo nuk dihet ose kur marrja e provës nuk lejon shtytje.
- 382.2 Aktvendimi me të cilin pranohet kërkesa për sigurimin e provës duhet të tregojë provën që do të merret dhe mënyrën e marrjes së provës si dhe faktet apo rrethanat që duhet të provohen me të.

### Neni 383

- 383.1 Nëse palës kundërshtare nuk i është dërguar me parë kërkesa për sigurimin e provës, atëherë ajo i dërgohet bashkë me aktvendimin me të cilin është pranuar dhe caktuar seanca për marrjen e provës.
- 383.2 Palës kundërshtare të panjohur, apo të cilës nuk i dihet vendbanimi, gjykata mund t'ia emëroj përfaqësuesin e përkohshëm me qëllim që të marrë pjesë në seancën e caktuar për marrjen e provës. Për emërimin e përfaqësuesit të përkohshëm nuk ka nevojë të bëhet shpallje publike.
- 383.3 Në rastet e ngutshme gjykata mund të vendos që prova të merret para se t'i dërgohet vendimi, me të cilin është pranuar kërkesa për sigurimin e provës, palës kundërshtare.
- 383.4 Kundër aktvendimit të gjykatës, me të cilin pranohet propozimi për sigurimin e provës, si dhe kundër aktvendimit me të cilin vendo set që marrja e provës të filloj para se aktvendimi t'i dërgohet palës kundërshtare, nuk lejohet ankimi.

### Neni 384

- 384.1 Mosparaqitja e palës që ka kërkuar sigurimin e provës në seancën për marrjen e provës sjell refuzimin e propozimit, përveç kur marrjen e saj e kërkon pala kundërshtare ose kur gjykata çmon se kjo është në dobi të procesit gjyqësor.

384.2 Për mënyrën e marrjes së provës dhe për fuqinë e saj provuese zbatohen rregullat e përgjithshme.

#### Neni 385

385.1 Nëse prova është marrë para se të jetë ngritur padia, procesverbali mbi marrjen e provës ruhet në gjykatën në të cilën është përpiluar ai.

385.2 Nëse procedura sipas padisë është në zhvillim e sipër, e sigurimin e provës nuk e ka bërë gjykata e çështjes, atëherë procesverbali i dërgohet asaj gjykate.

### KREU XXIII - PËRGATITJA E SHQYRTIMIT KRYESOR

#### Dispozita të përgjithshme

#### Neni 386

386.1 Gjykata menjëherë pasi t'i arrij padia i fillon përgatitjet për shqyrtim kryesor të çështjes.

386.2 Përgatitjet e këtilla i përfshijnë ekzaminimin paraprak të padisë, dërgimin e padisë palës së paditur për përgjigje të domosdoshme, mbajtjen e seancës përgatitore dhe caktimin e seancës për shqyrtim kryesor të çështjes.

386.3 Gjatë përgatitjes së shqyrtimit kryesor palët mund të dërgojnë parashtresa në të cilat i tregojnë faktet dhe provat të cilat mendojnë ti propozojnë për marrje.

#### Neni 387

387.1 Me qëllim që çështja të përgatitet sa më mirë për t'u zgjidhur shpejt e drejt, gjykata që nga momenti i arritjes së padisë e deri në momentin e caktimit të seancës për shqyrtim kryesor të çështjes me aktvendim vendos për:

- a) dhënien e përgjigjes në padi nga pala e paditur;
- b) sigurimin e provës;
- c) tërheqjen e padisë;
- d) ndryshimin e padisë;
- e) ndërprerjen e procedurës;
- f) pjesëmarrjen e ndërhyrësit;
- g) hyrjen e paraardhësit juridik në procesin gjyqësor;
- h) veçimin apo bashkimin e dy proceseve gjyqësore;



- i) caktimin apo zgjatjen e afateve gjyqësore;
- j) caktimin apo shtytjen e seancave;
- k) rivendosjen në gjendjen e mëparshme;
- l) masat e përkohshme të sigurimit;
- m) sigurimin e shpenzimeve procedurale;
- n) lirimim e palës nga pagimi i shpenzimeve procedurale;
- o) deponimin e paradhënies për shpenzimet e veprimeve procedurale;
- p) caktimin e ekspertit;
- q) emërimin e përfaqësuesit të përkohshëm;
- r) dërgimin e shkresave gjyqësore;
- s) masat për përmirësimin dhe plotësimin e parashtresave;
- t) rregullsinë e përfaqësimit dhe të prokurës;
- u) mos kompetencën e gjykatës;
- v) bashkimin e padive;
- w) pushimin e gjykimit kur hedhet poshtë padia apo kur tërhiqet ajo, si dhe të gjitha çështjeve tjera që kanë të bëjnë me drejtimin e gjykimit.

387.2 Kundër aktvendimeve të dhëna gjatë përgatitjes së shqyrtimit kryesor që kanë të bëjnë me drejtimin e gjykimit nuk lejohet ankimi.

#### Neni 388

Gjatë fazës së përgatitjes së shqyrtimit kryesor gjykata mund të japë aktgjykimin në bazë të pohimit, aktgjykimin në bazë të heqjes dorë nga kërkesëpadia, aktgjykimin për mos bindje, aktgjykimin për shkak të mungesës si dhe të miratojë ujdinë gjyqësore të palëve.

### SHQYRTIMI PARAPRAK I PADISË

#### Neni 389

Pas shqyrtimit paraprak të padisë gjykata mund t'i nxjerrë të gjitha aktvendimet e përmendura në nenin 392 të këtij ligji, përveç se kur kemi të bëjmë me çështjet, për të cilat për nga natyra e tyre, apo sipas dispozitave të këtij ligji, aktvendimi mund të jepet vetëm në fazën e mëtutjeshme të procesit kontestimor.

#### Neni 390

Nëse gjykata konstaton se padia është e pakuptueshme apo jo e plotë, apo se ekzistojnë mungesa që kanë të bëjnë me zotësinë e paditësit apo të paditurit që të bëhet palë ndërgjyqëse, apo me përfaqësimin ligjor të tyre, apo mungesa që i përkasin autorizimit të përfaqësuesit që ta iniciojë procedurën kontestimore, kur

autorizimi i tillë kërkohet me ligj, gjykata me qëllim të heqjes së mungesave të tilla i ndërmerri masat e nevojshme të përcaktuara me këtë ligj (neni 79 dhe 102 i këtij ligji).

#### Neni 391

Pas shqyrtimit paraprak të padisë gjykata me aktvendim e hedh poshtë padinë si të palejueshme nëse konstaton se:

- i) çështja e ngritur me padi nuk hynë në kompetencën gjyqësore;
- j) palët kanë lidhur kontratë për zgjidhjen e kontestit të tyre nga arbitrazhi;
- k) për çështjen e ngritur me padi ekziston gjyqëvarësia (litispendenca);
- l) çështja është gjë e gjykuar (res iudicata);
- m) për objektin e kontestit është lidhur ujdia gjyqësore, se paditësi në gjykatë ka hequr dorë nga kërkesëpadija, se nuk ekziston interesi juridik i paditësit për padi vërtetimi;
- n) padia është paraqitur pas skadimit të afatit, Nëse me dispozita të posaçme është parashikuar afati për paraqitjen e saj;
- o) paditësi brenda afatit të caktuar nga gjykata nuk i ka hequr mungesat nga neni 79 dhe 102 të këtij ligji.

#### Neni 392

Pas shqyrtimit paraprak të padisë gjykata me aktvendim shpallët jokompetente dhe lëndën ia dërgon gjykatës për të cilën mendon se është kompetente për gjykimin e çështjes së ngritur me padi, Nëse konstaton:

- p) se nuk është e kompetencës territoriale për gjykimin e çështjes;
- q) se nuk është e kompetencës lëndore për gjykimin e çështjes.

#### Neni 393

Gjykata, nëse konsideron se nuk ka material procedural të mjaftueshëm për dhënien e aktvendimit mbi ndonjë çështje që është paraqitur gjatë shqyrtimit paraprak të padisë, do të vendos lidhur me të pasi të arrijë përgjigja në padi e të paditurit ose gjatë seancës përgatitore apo në seancën për shqyrtim kryesor të çështjes, Nëse nuk është mbajtur seanca përgatitore.

## Përgjigja në padi (§ 394)

### Neni 394

Gjykata padinë, me shkresat e bashkangjitura, ia dërgon të paditurit për përgjigje brenda afatit prej pesëmbëdhjetë (15) ditësh nga dita kur është paraqitur në gjykatë padia e rregullt dhe e plotë.

### Neni 395

395.1 I padituri, pasi t'i dorëzohet padia, me shkresat e bashkangjitura eventualisht, ka për detyrë, që brenda afatit prej pesëmbëdhjetë (15) ditësh, të përgjigjet me shkrim në padi .

395.2 Me rastin e dërgimit të padisë gjykata do ta udhëzojë të paditurin për detyrimin nga paragrafi 1 i këtij neni, për përmbajtjen që duhet ta ketë përgjigja në padi si dhe për pasojat procedurale në rast se nuk e paraqet në gjykatë, brenda afatit të duhur, përgjigjen në padi.

### Neni 396

396.1 Në përgjigje i padituri duhet t'i parashtrojë prapësimet procedurale eventuale dhe të deklarojë se a e pohon apo e kundërshton kërkesëpadinë, si dhe të tregojë të dhënat që domosdo duhet t'i ketë çdo parashtresë (neni 99 i këtij ligji).

396.2 Nëse i padituri e konteston kërkesëpadinë, përgjigja në padi duhet t'i përmbajë edhe faktet mbi të cilat i padituri i mbështetë thëniet e tij dhe provat me të cilat provohen faktet e tilla.

### Neni 397

Gjykata vepron sipas nenit 102 të këtij ligji, Nëse konstaton se përgjigja në padi është e pakuptueshme apo jo e plotë, me qëllim të heqjes së mungesave të kështilla.

### Neni 398

Kur gjykata, pasi t'i arrijë përgjigja në padi, konstaton se ndërmjet palëve nuk është kontestuese gjendja faktike, dhe se nuk ekzistojnë pengesa të tjera për dhënien e vendimit meritor, atëherë ajo, pa caktuar fare seancë gjyqësore, mund ta jep aktgjykimin me të cilën e pranon si të themeltë kërkesëpadinë.

#### Neni 399

- 399.1 Kur gjykata, pasi t'i arrijë përgjigja në padi, konstaton se nga faktet e treguara në padi nuk del themelësia e kërkesëpadiisë, atëherë ajo do te jep vendimin meritor me të cilin refuzohet si e pathemeltë kërkesëpadiia.
- 399.2 Kërkesëpadiia është e pathemeltë, në vështrim të paragrafit 1 të këtij neni, nëse qartazi është në kundërthënie me faktet e treguara në padi, apo, nëse faktet mbi të cilat mbështetet kërkesëpadiia qartazi janë në kundërthënie me provat të cilat i ka propozuar paditësi, apo me faktet që janë botërisht të ditura.

#### SEANCA PËRGATITORE

##### a) Dispozita të përgjithshme

#### Neni 400

- 400.1 Pasi të arrijë përgjigja në padi gjykata e konvokon seancën përgatitore.
- 400.2 Nëse i padituri nuk ka paraqitur përgjigje në padi, e nuk janë plotësuar kushtet për dhënien e aktgjykimit kontumacional, gjykata do ta konvokojë seancën përgatitore pas skadimit të afatit ligjor për paraqitjen e përgjigjes në padi.
- 400.3 Datën e mbajtjes së seancës përgatitore gjykata do ta caktojë, sa herë që është e mundur, pasi të jetë konsultuar me palët ndërgjyqëse.
- 400.4 Seanca përgatitore mbahet, si rregull, më së voni brenda afatit prej tridhjetë (30) ditësh nga dita në të cilën gjykatës i ka arritur përgjigja në padi e të paditurit.

#### Neni 401

Seanca përgatitore është e detyrueshme, përveçse në rastet në të cilat gjykata, pasi t'i këtë arritur përgjigja në padi, konstaton se ndërmjet palëve nuk ka fakte kontestuese (neni 403 i këtij ligji) apo kur, nga shkak i pandërlikueshmërisë së kontestit, vjen në përfundim se nuk ka nevojë të konvokohet seanca përgatitore.

#### Neni 402

- 402.1 Në letërthirrjen për në seancë përgatitore gjykata i njofton palët për pasojat e mosardhjes në seancë, si dhe për detyrën që më së voni në seancën përgatitore duhet t'i parashtrojnë të gjitha faktet në të cilat i mbështetin

kërkesat e tyre, si dhe t'i propozojnë të gjitha provat që dëshirojnë të merren gjatë procedurës, por edhe që në seancë t'i sjellin të gjitha shkresat dhe sendet që dëshirojnë t'i përdorin si mjete provuese.

- 402.2 Letërthirja për në seancë përgatitore, si rregull, u dërgohet palëve së paku shtatë (7) ditë para ditës në të cilën mbahet ajo.

#### Neni 403

- 403.1 Seanca përgatitore fillon me shtjellimin e padisë në mënyre koncize nga paditësi, e pastaj i padituri në të njëjtën mënyrë e parashtron përgjigjen në padi.
- 403.2 Kur është e nevojshme gjykata do të kërkojë nga palët sqarime lidhur me thëniet apo propozimet e tyre.

#### Neni 404

- 404.1 Pas parashtrimit të pretendimeve të padisë dhe përgjegjës në padi kalohet në shqyrtimin e çështjeve që kanë të bëjnë me pengesat për procedim të mëtejshëm të çështjes juridike. Lidhur me pengesat procedurale mund të merren prova po qe nevoja për një gjë të tillë.
- 404.2 Gjykata, sipas prapësimit të palës apo sipas detyrës zyrtare, do të vendos mbi çështjet nga neni 390 të këtij ligji, nëse me dispozitat e këtij ligji nuk është përcaktuar ndryshe.
- 404.3 Nëse gjykata nuk e miraton prapësimin e palës, me të cilin pretendohet se ekziston ndonjëra nga pengesat për procedimin e çështjes, vendimin mbi prapësimin do ta jep bashkë me vendimin mbi çështjen kryesore, me përjashtim të prapësimit të kompetencës territoriale.
- 404.4 Kundër vendimit nga paragrafi 3 i këtij neni nuk lejohet ankimi i veçantë.

#### Neni 405

Gjatë procedimit të mëtejshëm në seancën përgatitore bisedohet për propozimet e palëve dhe për faktet mbi të cilat mbështesin propozimet e tyre.

#### Neni 406

- 406.1 Varësisht nga rezultati i shqyrtimit në seancën përgatitore gjykata do të vendos se çka do të jetë objekt shqyrtimi dhe cilat prova do të merren, në seancën për shqyrtimin kryesor të çështjes.

- 406.2 Propozimet të cilat nuk i konsideron esenciale për dhënien e vendimit meritot gjykata i refuzon dhe në aktvendimin me të cilin e bënë një gjë të tillë ajo i tregon shkaqet e refuzimit.
- 406.3 Kundër aktvendimeve nga paragrafi 2 e këtij neni nuk lejohet ankimi i posaçëm.
- 406.4 Gjatë procedimit të mëtejshëm të çështjes gjykata nuk është e lidhur me vendimet e dhëna në bazë të dispozitave të këtij neni.

#### Neni 407

- 407.1 Nëse gjykata, me propozimin e palës, vendos që të merret prova me anë të ekspertimit, atëherë ajo e cakton edhe afatin brenda të cilit eksperti me shkrim duhet ta paraqesë konstatimin dhe mendimin e vet.
- 407.2 Me rastin e caktimit të afatit të tillë gjykata duhet të ketë parasysh faktin se konstatimi dhe mendimi i shkruar duhet dërguar palëve së paku shtatë (7) ditë para se të mbahet seanca për shqyrtimin kryesor.

#### Neni 408

- 408.1 Nëse në të njëjtën gjykatë janë në zhvillim e sipër dy apo më tepër gjykime ndërmjet personave të njëjtë, apo në të cilat i njëjti person është kundërshtar i paditësve apo të paditurve të ndryshëm, gjykata mund t'i bashkojë të gjitha ato me aktvendim me qëllim të shqyrtimit të përbashkët, nëse me një gjë të tillë do të zvogëloheshin shpenzimet dhe do të përshpejtohej shqyrtimi i çështjeve. Për të gjitha gjykimet e bashkuara jepet një aktgjykim i përbashkët.
- 408.2 Gjykata mund të vendos që të shqyrtohet në mënyrë të veçantë ndonjë kërkesë e një padie unike, dhe pas shqyrtimit të tillë, të jep vendime të posaçme mbi kërkesat e padisë.
- 408.3 Për të vepruar sipas paragrafit 1 dhe 2 të këtij neni nevojitet pëlqimi i palëve.
- 408.4 Aktvendimet nga paragrafi 1 dhe 2 të këtij neni mund të jepen, si rregull, më së voni në seancën përgatitore apo deri në fillimin e shqyrtimit kryesor, Nëse seanca përgatitore nuk është caktuar fare.
- 408.5 Kundër aktvendimeve të dhëna në bazë të këtij neni nuk lejohet ankimi.

#### Neni 409

- 409.1 Nëse në seancën përgatitore nuk vjen pala paditëse, edhe pse është thirrur rregullisht, padia konsiderohet e tërhequr, përveç kur i padituri kërkon që seanca të mbahet.
- 409.2 Nëse në seancën përgatitore nuk vjen i padituri që është thirrur rregullisht shqyrtimi vazhdon të bëhet me palën paditëse të pranishme.

#### Neni 410

Sa i përket drejtimit të procedurës, në seancën përgatitore gjykata i ka të gji-tha autorizimet që i takojnë edhe në seancën për shqyrtimin kryesor të çështjes.

#### b) Ndërmjetësimi dhe pajtimi gjyqësor

#### Neni 411

- 411.1 Nëse gjykata e gjen të nevojshme një gjë të tillë, atëherë ajo më së voni në seancën përgatitore, duke marrë parasysh natyrën e kontestit dhe rrethanat tjera, u propozon palëve ndërgjyqëse që kontestin ta zgjidhin në procedurën e ndërmjetësimit të rregulluar me ligj të veçantë.
- 411.2 Zgjidhjen e kontestit me anë të ndërmjetësimit mund ta propozojnë edhe vetë palët me marrëveshjen e tyre. Propozimin e këtillë palët mund ta bëjnë deri në përfundimin e seancës për shqyrtimin kryesor të çështjes.

#### Neni 412

Palët mund ta zgjedhin kontestin e tyre me anë të pajtimit gjyqësor gjatë gjithë gjykimit (pajtimi gjyqësor).

#### Neni 413

- 413.1 Gjukata gjatë gjithë procedurës, e sidomos në seancën përgatitore, bën të gjitha përpjekjet, por në mënyrën që nuk e rrezikon paanësinë e saj, për të zgjidhur kontestin me pajtim, kur e lejon natyra e çështjes.
- 413.2 Me qëllim që të kontribuojë në pajtimin gjyqësor gjykata mund t'ua bëjë palëve propozimin si të arrijnë pajtimin, duke i marrë parasysh dëshirat e palëve, natyrën e kontestit, raportet midis tyre si dhe rrethanat e tjera.

#### Neni 414

- 414.1 Me anë të pajtimit gjyqësor mund të përfshihet e gjithë kërkesëpadia apo vetëm një pjesë e saj. Gjykata me anë të aktvendimit e miraton pajtimin gjyqësor.
- 414.2 Palët nuk mund të zgjidhin kontestin e tyre me anë të pajtimit gjyqësor kur kërkesëpadia ka të bëjë me të drejtat me të cilat ato nuk mund të disponojnë lirisht (neni 3 paragrafi 3 i këtij ligji).
- 414.3 Kur gjykata merr vendim me të cilin nuk lejon pajtimin gjyqësor të palëve, atëherë ajo ndalet së proceduari derisa mos të bëhet i formës së prerë vendimi.
- 414.4 Në rastin nga paragrafi 2 i këtij neni gjykata, prapëseparë, marrëveshjen e palëve e futë në procesverbalin e cili i shërben gjykatës së ankimit për vlerësimin e lejueshmërisë së pajtimit të pa miratuar.
- 414.5 Kundër aktvendimit me të cilin refuzohet pajtimi lejohet ankimi i posaçëm.

#### Neni 415

- 415.1 Pajtimi gjyqësor bëhet, si rregull, përpara gjykatës së shkallës së parë.
- 415.2 Nëse në gjykatën e shkallës së dytë është duke u zhvilluar procedura sipas ankimit, gjykata e shkallës së parë e njofton gjykatën e ankimit për pajtimin e bërë në këtë fazë të gjykimit. Pas këtij njoftimi gjykata e ankimit e përfundon procedurën e ankimit me supozim se është tërhequr ankesa.
- 415.3 Pajtimi gjyqësor mund të bëhet edhe në gjykatën e shkallës së dytë gjatë shqyrtimit të drejtpërdrejtë të çështjes.
- 415.4 Nëse pajtimi gjyqësor bëhet pas dhënies së aktgjykimit të shkallës së parë, atëherë gjykata me aktvendim e anulon aktgjykimin e tillë. Aktgjykimi anulohet nga gjykata e shkallës së parë edhe kur pajtimi është bërë gjatë zhvillimit të procedurës së shkallës së dytë.
- 415.5 Kundër aktvendimit nga paragrafi 4 i këtij neni nuk lejohet ankimi.

#### Neni 416

- 416.1 Marrëveshja e palëve mbi pajtimin përfshihet në procesverbalin gjyqësor.
- 416.2 Pajtimi gjyqësor quhet i përfunduar në momentin kur palët pasi ta lexojnë procesverbalin mbi pajtimin e nënshkruajnë procesverbalin gjyqësor.
- 416.3 Palëve u jepet kopja e verifikuar e procesverbalit, ku është përfshirë pajtimi.



416.4 Pajtimi gjyqësor duhet të përmbajë edhe marrëveshjen mbi shpenzimet gjyqësore. Nëse palët nuk merren vesh rreth shpenzimeve, ato mund të kërkojnë që vendimin mbi shpenzimet gjyqësore ta jep gjykata e çështjes.

#### Neni 417

Gjykata gjatë gjithë procesit gjyqësor kujdeset kryesisht nëse ai është duke u zhvilluar lidhur me kërkesëpadinë mbi të cilën më parë është bërë pajtimi gjyqësor, dhe nëse konstaton se ekziston ai, e hedhë poshtë padinë e paraqitur.

#### Neni 418

418.1 Pajtimi gjyqësor mund të goditet vetëm me anë të padisë.

418.2 Pajtimi gjyqësor anulohet nëse është përfunduar nën ndikimin e lajthimit, mashtrimit apo dhunës.

418.3 Pajtimi gjyqësor anulohet edhe nëse në përfundimin e tij ka marrë pjesë pala me pazotësi procedurale, apo nëse palën e tillë nuk e ka përfaqësuar përfaqësuesi ligjor apo nëse palën e ka përfaqësuar personi i pa autorizuar, ose personi që nuk ka pasur autorizimin e nevojshëm për kryerjen e veprimeve procedurale të veçanta, përveç kur veprimet e tilla janë aprovuar më vonë nga vet pala.

418.4 Padia për anulimin e pajtimit gjyqësor nga paragrafi 2 dhe 3 të këtij neni mund të ngrihet brenda afatit prej tridhjetë (30) ditësh nga dita e marrjes së dijenisë për shkakun e anulimit, e më së voni brenda afatit prej një (1) viti nga dita e përfundimit të pajtimit gjyqësor.

#### Neni 419

419.1 Personi që ka ndërmend të ngrejë padi mund, nëpërmjet gjykatës së shkallës së parë në territorin e së cilës pala kundërshtarë e ka vendbanimin, të përpiqet që të bëjë pajtimin gjyqësor.

419.2 Gjykata të cilës i është paraqitur propozimi i tillë do të thërras palën kundërshtarë dhe do ta njoftojë me propozimin për pajtimin gjyqësor.

419.3 Shpenzimet e kësaj procedure i bartë paraqitësi i propozimit.

c) Konvokimi i seancës për shqyrtimin kryesor të çështjes

#### Neni 420

Në seancën përgatitore gjykata me aktvendim e cakton:

- r) ditën dhe orën e mbajtjes së seancës për shqyrtim kryesor të çështjes;
  - s) çështjet që do të shqyrtohen dhe bisedohen në seancën kryesore;
  - t) provat që do të merren në seancën kryesore;
  - u) personat që do të thirren për në seancë kryesore.
- 420.2 Seanca kryesore do të mbahet, si rregull, më së voni brenda afatit tridhjetë (30) ditor nga dita në të cilën është mbyllur seanca përgatitore.
- 420.3 Gjykata mund të vendos që seanca për shqyrtim kryesor të çështjes të mbahet menjëherë pas asaj përgatitore.
- 420.4 Nëse gjykata çmon se shqyrtimi kryesor do të zgjatë më tepër se një ditë, seanca do të konvokohet për aq ditë me radhë sa është e domosdoshme që shqyrtimi të bëhet në vazhdimësi.

#### Neni 421

- 421.1 Me përmbajtjen e aktvendimit nga neni 420 paragrafi 1 të këtij ligji njoftohen palët e pranishme në seancë përgatitore dhe atyre nuk do t'u dërgohet as aktvendimi e as letërthirrja për në seancë kryesore.
- 421.2 Gjykata i njofton palët e pranishme në seancë përgatitore edhe për pasojat procedurale të mosardhjes në seancën për shqyrtim kryesor të çështjes.

#### Neni 422

- 422.1 Për në seancë kryesore me letërthirrje thirren palët që nuk kanë qenë të pranishme në seancën përgatitore, si dhe dëshmitarët dhe ekspertët që duhet të paraqiten sipas vendimit të gjykatës për marrjen e provave.
- 422.2 Në letërthirrjen për në seancë kryesore gjykata i paralajmëron të ftuarit për pasojat e mosardhjes në seancë.
- 422.3 Palës që nuk ka qenë e pranishme në seancën përgatitore, bashkë me letërthirrjen për në seancë kryesore i dërgohet edhe kopja e procesverbalit të verifikuar nga seanca përgatitore.

## KREU XXIV - SHQYRTIMI KRYESOR

### 1) Zhvillimi i shqyrtimit kryesor

#### Neni 423

- 423.1 Gjyqtari i çështjes e deklaron hapjen e seancës si dhe objektin e shqyrtimit.
- 423.2 Pas kësaj gjykata verifikon paraqitjen e të ftuarve dhe heton shkaqet e mosparaqitjes së personave të thirrur si dhe rregullsinë e thirrjeve.
- 423.3 Nëse paditësi nuk vjen në seancën kryesore, edhe pse është thirrur rregullisht, konsiderohet se e ka tërhequr padinë, pos nëse i padituri deklaron se kërkon që të zhvillohet shqyrtimi kryesor i çështjes në mungesë të paditësit.
- 423.4 Nëse në seancën për shqyrtim kryesor nuk vjen i padituri që është thirrur rregullisht, atëherë shqyrtimi kryesor i çështjes bëhet pa praninë e tij.

#### Neni 424

- 424.1 Gjykata, së pari, sipas prapësimit të palës apo sipas detyrës zyrtare, konstaton nëse ekzistojnë pengesat procedurale për procedimin e mëtutjeshëm të çështjes dhe vepron në pajtim me dispozitat e nenit 388 të këtij ligji, Nëse me dispozitat e këtij ligji nuk është parashikuar ndonjë gjë tjetër.
- 424.2 Nëse gjykata nuk e miraton prapësimin nga paragrafi 1 i këtij neni, ajo, pa marrë parasysh se a është shqyrtuar ai bashkërisht me çështjen kryesore apo ndaras nga ajo, vendimin mbi prapësimin e jep bashkërisht me vendimin mbi çështjen kryesore.
- 424.3 Kundër vendimit me të cilin refuzohet prapësimi i palës nga paragrafi 1 i këtij neni nuk lejohet ankimi i veçantë.

#### Neni 425

- 425.1 Nëse më parë nuk është mbajtur seanca përgatitore, shqyrtimi kryesor i çështjes zhvillohet në këtë mënyrë:
- a) paditësi jep shpjegime të thukta rreth kërkesave të parashtruara në padi;
  - b) i padituri në mënyrë të thuktë e paraqet përgjigjen në padi;
  - c) Nëse është propozuar marrja e provës me anë të dëgjimit të palëve, së pari pyetet paditësi e mandej i padituri;

- d) merren në pyetje dëshmitarët, së pari ata të propozuar nga pala paditëse e mandej ata të propozuar nga pala e paditur ;
- e) merren provat e tjera, përfshirë edhe ekspertimin;
- f) pas marrjes së të gjitha provave, të dy palët, por së pari paditësi e mandej i padituri, i drejtohen gjykatës me shpjegimet përfundimtare, me të cilat i përmbledhin aspektet faktike dhe juridike të çështjes kryesore;
- g) gjykata mund t'i lejoj paditësit që shkurtimisht të deklarohet lidhur me fjalën përfundimtare të palës së paditur;
- h) Nëse paditësit i është lejuar deklarimi rreth fjalës së fundit të palës së paditur, atëherë edhe kësaj i lejohej që shkurtimisht të deklarohet rreth thënieve të fundit të palës paditësemosparaqitjes në seancë si dhe rregullsinë e thirrjve të atyre që nuk kanë ardhur.

425.2 Përrjashtimisht, gjykata mund të lejojë që veprimet procedurale të kryhen me renditje tjetër në seancën për shqyrtim kryesor të çështjes.

425.3 Kundër aktvendimeve nga paragrafi 2 i këtij neni palët ndërgjyqëse nuk kanë të drejtë ankimi.

#### Neni 426

426.1 Gjykata kujdeset që shqyrtimi kryesor të zhvillohet në drejtimin e duhur dhe në mënyrë të rregullt, pa shtyrje të panevojshme.

426.2 Gjykata gjatë shqyrtimit kryesor kujdeset për mbajtjen e rendit në sallën e gjykimit dhe për dinjitetin e gjykatës.

426.3 Gjykata i ndërmerri masat ndaj personave që e prishin rendin në sallën e gjykimit apo e cenojnë dinjitetin e gjykatës dhe të pjesëmarrësve tjerë në procedurë, në pajtim me dispozitat e këtij ligji mbi mosrespektimin e gjykatës.

#### Neni 427

Procedura në shqyrtimin kryesor zhvillohet gojarisht, kurse provat merren drejtpërdrejtë përpara gjykatës, Nëse me këtë ligj nuk është përcaktuar ndryshe.

#### Neni 428

428.1 Secila nga palët në shpjegimet e veta duhet t'i parashtrojë të gjitha faktet e nevojshme për arsyetimin e propozimeve të veta, të ofroj prova të nevojshme për vërtetimin e thënieve të saja, si dhe të deklarohet lidhur me thëniet dhe provat e ofruara nga pala kundërshtare.

428.2 Palët gjatë zhvillimit të shqyrtimit kryesor mund të paraqesin fakte të reja, dhe të propozojnë prova të reja, vetëm Nëse e bëjnë të besueshme rrethanën se pa fajin e tyre nuk kanë mundur t'i paraqesin, respektivisht propozojnë në seancën përgatitore.

#### Neni 429

Palët mund t'i paraqesin edhe pikëpamjet juridike të tyre që kanë të bëjnë me objektin e gjykimit.

#### Neni 430

430.1 Me rastin e marrjes së provës me anë të dëgjimit të palëve, palën së pari e pyet përfaqësuesi me prokurë i saj, e pastaj pala kundërshtare.

430.2 Nëse pala që dëgjohe nuk ka përfaqësues me prokurë, së pari e pyet gjykata.

#### Neni 431

431.1 Palët ndërgjyqëse u bëjnë pyetje dëshmitarëve dhe ekspertëve.

431.2 Gjyqtari së pari ia jep fjalën palës e cila e ka propozuar dëshmitarin apo ekspertin, mandej palës kundërshtare, e me pastaj, Nëse ka nevojë, përsëri palës që e ka propozuar.

#### Neni 432

Gjyqtari mund t'u bëjë pyetje palëve, dëshmitarëve apo ekspertëve në të gjitha fazat e marrjes në pyetje.

#### Neni 433

433.1 Gjykata nuk e lejon kryerjen e veprimeve procedurale të cilat nuk janë qenësore për procesin gjyqësor.

433.2 Gjyqtari nuk lejon të bëhen pyetje në të cilat përmbahen sugjerimet se si duhet dhënë përgjigjja në to (pyetjet sugjestive)

433.3 Gjyqtari nuk lejon të bëhen pyetje që janë të parëndësishme për çështjen dhe në të cilat janë dhënë përgjigjet.

433.4 Me kërkesën e palës, në procesverbal regjistrohen pyetjet të cilat nuk i ka lejuar gjyqtari.

433.5 Gjyqtari nuk lejon fyerjen dhe shqetësimin e palëve, dëshmitarëve dhe ekspertëve me rastin e marrjes në pyetje.

#### Neni 434

- 434.1 Nëse gjyqtari e urdhëron një gjë të tillë, në sallën e gjykimit mbeten të qëndrojnë dëshmitarët dhe ekspertët e pyetur.
- 434.2 Nëse pala kërkon, dëshmitari i pranishëm, që është pyetur më parë, mund të merret përsëri në pyetje në të njëjtën seancë, kur një gjë të këtillë e lejon gjyqtari i çështjes.

#### Neni 435

- 435.1 Gjykata nuk është e lidhur me aktvendimet që kanë të bëjnë me drejtimin e shqyrtimit kryesor.
- 435.2 Kundër aktvendimeve që kanë të bëjnë me drejtimin e shqyrtimit kryesor nuk lejohet ankimi i veçantë.

#### Neni 436

- 436.1 Pasi të përfundojnë të gjitha fazat e shqyrtimit kryesor dhe pasi të jetë i gatshëm për zgjidhje kontesti, gjykata e shpallë të mbyllur shqyrtimin kryesor.
- 436.2 Gjykata mund ta përfundojë shqyrtimin kryesor të çështjes edhe Nëse nuk ka arritur ende ndonjë shkresë që përmban prova të nevojshme për vendosje, si dhe procesverbali mbi provat e marra nga gjykata e porositur, Nëse palët heqin dorë nga bisedimi rreth provave të tilla, ose kur gjyqtari i çështjes mendon se nuk ka nevojë për bisedimin e tillë.

2) Shtyrja dhe vazhdimi i seancës gjyqësore për shqyrtim kryesor

#### Neni 437

- 437.1 Gjykata mund ta shtyj seancën e konvokuar për shqyrtim kryesor para se të filloj ajo, Nëse konstaton se nuk janë plotësuar prezumimet ligjore për mbajtjen e saj, apo se provat e caktuara për marrje nuk do të mund të bëhen të pranishme deri në fillimin e seancës.
- 437.2 Gjykata ka për detyrë që, më së voni shtatë (7) ditë para fillimit të seancës, që të bëjë verifikimin nëse janë plotësuar kushtet nga paragrafi I i këtij neni.
- 437.3 Kur e shtyn seancën , gjykata, për kohën e mbajtjes së seancës së shtyrë menjëherë i njofton të gjithë personat e thirrur më parë.

#### Neni 438

- 438.1 Me propozimin e palës gjykata mund ta shtyjë seancën e filluar vetëm nga këto shkaqe:
- a) nëse pa fajin e palës që e propozon shtyrjen e seancës nuk ka mundësi që të merret ndonjë provë e caktuar për marrje, e që është e rëndësishme për dhënien e vendimit të ligjshëm ;
  - b) nëse të dy palët bashkërisht e propozojnë shtyrjen e seancës me qëllim të zgjidhjes paqësore të kontestit apo me qëllim të pajtimit gjyqësor.
- 438.2 Pala mund ta propozojë shtyrjen e seancës vetëm një herë nga shkaku i njëjtë.
- 438.3 Kur shtyhet seanca e filluar, gjykata menjëherë i njofton personat e pranishëm për vendin dhe kohën e mbajtjes së seancës së re.
- 438.4 Gjykata nuk ka për detyrë që ta njoftojë për vendin dhe kohën e seancës së re palën që nuk ka qenë e pranishme në seancën e shtyrë përkundrejt thirrjes së rregullt.

#### Neni 439

Nëse në seancë nuk ka mundësi të merret ndonjë provë e caktuar. Gjykata mund të vendos që të vazhdohet shqyrtimi i çështjes, por me kusht që me vonë, në seancë të re, të merret vetëm prova e tillë si dhe të bisedohet rreth saj.

#### Neni 440

Në seancën e re të caktuar pas shtyrjes së shqyrtimit të çështjes, veprimet procedurale të kryera do të kryhen përsëri vetëm Nëse gjykata konsideron se një gjë e tillë është e domosdoshme për dhënien e vendimit të ligjshëm.

#### Neni 441

- 441.1 Seanca për shqyrtimin kryesor të çështjes nuk mund të shtyhet për kohë të pa caktuar.
- 441.2 Seanca kryesore dëgjimore nuk mund të shtyhet më shumë se tridhjetë (30) ditë, përveç rasteve të përcaktuara me ligj.
- 441.3 Gjyqtari ka për detyrë ta njoftojë kryetarin e gjykatës për secilën shtyrje të seancës. Ky i fundit mbanë evidencë për shtyrjet e seancave për secilin gjyqtar.

441.4 Nëse shtyhet seanca, gjyqtari ka për detyrë që t'i merr të gjitha masat e mundshme me qëllim që të hiqen shkaqet që e kanë shkaktuar shtyrjen, si dhe me qëllim që në seancën e ardhshme të përfundoj normalisht shqyrtimi i çështjes

441.5 Kundër aktvendimit të gjykatës me të cilin shtyhet seanca apo refuzohen propozimet e palëve për shtyrjen e seancës, nuk lejohet ankim i posaçëm.

#### Neni 442

Nëse seanca e filluar nuk mund të përfundoj brenda të njëjtës ditë, gjyqtari do ta caktojë vazhdimin e seancës për ditën e ardhshme të punës (vazhdimi i seancës).

#### Neni 443

Dispozitat e neneve 437-442 të këtij ligji, aplikohen në mënyre të përshtatshme edhe për seancën përgatitore.

### 3) Mbajtja e seancës kryesore me dyer të hapura

#### Neni 444

444.1 Shqyrtimi kryesor i çështjes bëhet publikisht.

444.2 Në vendin ku mbahet seanca për shqyrtimin kryesor mund të jenë të pranishëm vetëm personat e moshës madhorë.

444.3 Personat që janë të pranishëm në seancë nuk guxojnë të mbajnë armë apo mjete të rrezikshme.

444.4 Dispozitat e paragrafit 3 të këtij neni nuk kanë të bëjnë me rojtaret e personave që marrin pjesë në procesin gjyqësor.

#### Neni 445

Gjykata lejon, me vendim të arsyetuar, që gjykimi i çështjes tërësisht apo pjesërisht, të bëhet në seancë me dyer të mbyllura/jo publike/, vetëm kur:

- a) është e nevojshme të ruhet një sekret zyrtar dhe rendi publik;
- b) përmendën sekrete tregtare, apo shpikjesh, nga publikimi i të cilave do të cenoheshin interesa që mbrohen me ligj;
- c) përmenden rrethana nga jeta intime private e palëve dhe e pjesëmarrësve të tjerë në proces.



#### Neni 446

- 446.1 Në gjykimin e çështjeve me dyer të mbyllura lejohen të qëndrojnë në sallën e gjyqit vetëm palët, përfaqësuesit e tyre ligjor ose me prokurë dhe ndërhyrësit. Me lejen e gjykatës mund të qëndrojnë në sallën e gjyqit personat zyrtar të caktuar, punëtorët publik dhe shkencor, Nëse një gjë e tillë është me interes për shërbimin e tyre, përkatësisht për veprimtarinë e tyre publike apo shkencore.
- 446.2 Gjyqtari do ti paralajmërojë personat që janë të pranishëm në seancë nga e cila është përjashtuar publiku, se e kanë për detyrë ta ruajnë si fshehtësi çdo gjë që mësojnë në seancën e këtillë, si dhe për pasojat e zbulimit të fshehtësisë.

#### Neni 447

- 447.1 Aktvendimin për zhvillimin e gjykimit me dyer të mbyllura gjykata duhet ta arsyetojë dhe ta shpallë publikisht.
- 447.2 Kundër aktvendimit me të cilin vendo set zhvillimi i gjykimit me dyer të mbyllura nuk lejohet ankim i veçantë.

#### Neni 448

Dispozitat për zhvillimin e gjykimit me dyer të hapura në mënyrë adekuate do të zbatohen për seancën përgatitore dhe atë përpara gjykatës së porositur.

### KREU XXV - SHPENZIMET PROCEDURALE

#### 1) Përbërja e shpenzimeve procedurale

#### Neni 449

- 449.1 Shpenzimet procedurale përbëhen nga harxhimet e bëra gjatë dhe lidhur me procesin gjyqësor.
- 449.2 Shpenzimet procedurale përfshijnë edhe shpërblimet për punën e avokatit e të personave të tjerë të cilëve ligji u jep të drejtën e shpërblimit.

#### Neni 450

Secila palë paraprakisht vetë i bartë harxhimet që i ka shkaktuar me veprimet procedurale të veta.

#### Neni 451

- 451.1 Shpenzimet për dëshmitarët, ekspertet dhe për këqyrjen e sendeve ose këqyrjen në vend parapaguhen nga pala që i ka kërkuar, në shumën që ka caktuar gjykata me aktvendim.
- 451.2 Kur marrjen e provës e propozojnë të dy palët bashkërisht, atëherë gjykata vendos që shumën e nevojshme për pagimin e shpenzimeve paraprakisht ta deponojnë të dy palët në pjesë të barabarta.
- 451.3 Gjykata do të heqë dorë nga marrja e provës nëse shumta e nevojshme për mbulimin e shpenzimeve nuk deponohet në afatin e caktuar nga gjykata.
- 451.4 Përrjashtimisht nga dispozitat e paragrafit 3 të këtij neni, nëse gjykata cakton sipas detyrës zyrtare marrjen e provave për vërtetimin e fakteve lidhur me zbatimin e nenit 3 paragrafi 3 të këtij ligji, kurse palët nuk e deponojnë shumën e caktuar, atëherë shpenzimet për marrjen e provave do të paguhen nga mjetet e gjykatës.

#### Neni 452

- 452.1 Pala e cila e humbë procesin gjyqësor tërësisht ka për detyrë që palës kundërshtare gjyqësore, dhe ndërhyrësit që i është bashkuar, t'ia shpërblej të gjitha shpenzimet gjyqësore.
- 452.2 Nëse paditësi vetëm pjesërisht ka sukses në procesin gjyqësor, atëherë gjykata mund, duke marrë parasysh suksesin e arritur, të caktojë që secila palë t'i bartë shpenzimet e veta apo që njëra palë t'ia shpërblej tjetrës, dhe ndërhyrësit që i është bashkuar, pjesën proporcionale të shpenzimeve.
- 452.3 Gjykata mund të vendos që njëra palë t'ia shpërblej të gjitha shpenzimet që kanë pasur pala kundërshtare dhe ndërhyrësi që i është bashkuar, nëse pala kundërshtare nuk ka pasur sukses vetëm në pjesën proporcionalisht të pa rëndësishme të kërkesës së vet, kurse për shkak të kësaj pjese nuk janë krijuar shpenzime të veçanta.
- 452.4 Varësisht nga rezultati i të provuarit gjykata do të vendos nëse shpenzimet nga neni 443 paragrafi. 4 të këtij ligji do t'i bartë njëra apo të dy palët, ose shpenzimet e tilla do të mbetën në ngarkim të mjeteve financiare të gjykatës.
- 452.5 Kur kërkesëpadia ka të bëjë me të holla, e palën paditëse e përfaqëson avokati apo përfaqësuesi ligjor të cilit me ligj të posaçëm i njihet e drejta që t'ia shpërblehen shpenzimet, atëherë shpenzimet për përfaqësim do të caktohen sipas lartësisë së kërkesës në të holla që është pranuar me aktgjykim.

#### Neni 453

- 453.1 Me rastin e vendosjes se cilat shpenzime do t'i shpërblehen palës, gjykata do të marrë parasysh vetëm ato shpenzime që kanë qenë të nevojshme për ndjekjen e çështjes në gjyq. Se cilat shpenzime kanë qenë të nevojshme, si dhe mbi shumën e shpenzimeve, vendos gjykata duke çmuar me kujdes të gjitha rrethanat.
- 453.2 Nëse është parashikuar tarifa për shpërblimin e avokatëve, apo për shpenzimet tjera, atëherë këto shpenzime do të matën sipas tarifës së tillë.

#### Neni 454

- 454.1 Pala ka për detyrë që, pavarësisht nga ajo se cili e ka fituar procesin gjyqësor, t'ia shpërblej palës kundërshtare shpenzimet që ia ka shkaktuar me faj të vet ose me rastin që i ka ndodhur asaj.
- 454.2 Gjukata mund të vendos që përfaqësuesi ligjor apo me prokurë i palës t'ia shpërblej palës kundërshtare shpenzimet që ia ka shkaktuar me faj të vet.
- 454.3 Për kërkesat për shpërblimin e shpenzimeve nga paragrafët 1 dhe 2 të këtij neni gjykata duhet të vendos me aktvendim pavarësisht nga vendimi mbi çështjen kryesore.

#### Neni 455

Nëse i padituri nuk i ka dhënë shkas padisë, nga shkakut se e ka pohuar kërkesëpadinë dhe ka qenë i gatshëm ta përmbushë detyrimin e vet, paditësi duhet t'ia shpërblej të paditurit shpenzimet e procedurës.

#### Neni 456

- 456.1 Paditësi që e tërheqë padinë ka për detyrë që të paditurit t'ia shpërblej shpenzimet procedurale përveçse kur tërheqjen e padisë e ka bërë menjëherë pas përmbushjes së detyrimit nga ana e të paditurit.
- 456.2 Pala që e tërheqë mjetin e goditjes së vendimit ka për detyrë që palës kundërshtare t'ia shpërblej shpenzimet e krijuara lidhur me mjetin e goditjes.

#### Neni 457

- 457.1 Secila nga palët i bartë shpenzimet e veta nëse procesi gjyqësor ka përfunduar me pajtim gjyqësor me të cilin nuk është rregulluar çështja e shpenzimeve gjyqësore.

457.2 Shpenzimet e pajtimit gjyqësor të tentuar, por pa sukses, bëjnë pjesë në shpenzimet procedurale.

#### Neni 458

Nëse në gjykimin sipas padisë për përjashtimin e sendeve nga ekzekutimi i detyrueshëm pranohet kërkesëpadia, kurse gjykata konstaton se i padituri, si kreditor në procedurën përmbaruese ka pasur shkaqe të justifikueshme të konsiderojë se nuk ekzistojnë të drejtat e personave të tretë mbi sendet e tilla, atëherë gjykata do të vendos që secila nga palët i bartë shpenzimet e veta.

#### Neni 459

459.1 Bashkëndërgjyqësit i bartin shpenzimet gjyqësore në pjesë të barabarta.

459.2 Nëse ekzistojnë dallime të rëndësishme në pikëpamje të pjesëve që u takojnë në objektin e kontestit, gjykata do të caktojë, sipas përpjesëtimit të pjesëve të tilla, sa do të jetë pjesa e shpenzimeve të cilën do ta shpërblej secili bashkëndërgjyqës veç e veç.

459.3 Bashkëndërgjyqësit që janë përgjegjës solidar në pikëpamje të çështjes kryesore, përgjigjen në mënyrë solidare edhe për shpenzimet që duhet paguar palës kundërshtarë gjyqfituese.

459.4 Për shpenzimet e shkaktuara me veprimet procedurale të veçanta të një bashkëndërgjyqësi, bashkëndërgjyqësit e tjerë nuk janë përgjegjës.

#### Neni 460

Kur prokurori publik apo Ombudspersoni marrin pjesë në procesin kontestimor si palë ndërgjyqëse, atyre u takon e drejta në shpenzimet procedural sipas dispozitave të këtij ligji, por jo edhe e drejta e shpërblimit për punën e kryer.

#### Neni 461

Dispozitat mbi shpenzimet procedurale zbatohen edhe për palët që i përfaqëson përfaqësuesi publik. Në rast të këtillë shpenzimet procedurale e përfshijnë edhe shumën që do t'i njihej palës në emër të shpërblimit për avokatin si përfaqësues me prokurë.

## Neni 462

- 462.1 Nëse paraardhësi juridik i emëruar e merr përsipër rolin e të paditurit, i padituri paraprak nuk mund ta paraqesë kërkesën që t'i paguhen shpenzimet procedurale të gjykimit nga i cili ka dalë jashtë.
- 462.2 Paraardhësi juridik i të paditurit, Nëse del gjyqfitues, mund t'i kërkojë si pjesë e shpenzimeve të t'ia edhe shpenzimet e të paditurit paraprak.
- 462.3 Nëse gjykimi mbaron në disfavor të të paditurit të ri, atëherë ky ka për detyrë që paditësit t'ia paguaj shpenzimet të cilat me aktivitetin e tij i ka shkaktuar i padituri paraprak.

## Neni 463

- 463.1 Për pagimin e shpenzimeve procedurale gjykata vendos vetëm me kërkesën e specifikuar të palës, pa bërë asnjë shqyrtim verbalisht lidhur me kërkesën.
- 463.2 Pala ka për detyrë që në kërkesën e saj në mënyrë të specifikuar t'i tregoj shpenzimet për të cilat kërkon shpërblim, duke parashtruar prova për shpenzimet e bëra, Nëse nuk ekzistojnë provat e tilla në dosjen e lëndës.
- 463.3 Pala duhet ta paraqes kërkesën për pagimin e shpenzimeve më së voni deri në përfundimin e shqyrtimit që i paraprinë vendosjes mbi shpenzimet, e Nëse është fjala për dhënien e vendimit pa u bërë shqyrtim paraprakisht, atëherë pala ka për detyrë që kërkesën për shpenzimet e procedurës ta parashtrtojë në propozimin mbi të cilin gjykata duhet të vendos.
- 463.4 Për kërkesën e palës për pagimin e shpenzimeve të procedurës, gjykata do të vendos në aktgjykimin ose aktvendimin me të cilin përfundon procedura përpara kësaj gjykate.
- 463.5 Gjatë zhvillimit të procedurës gjykata vendos me aktvendim të veçantë për pagimin e shpenzimeve të procedurës vetëm atëherë kur e drejta e shpërblimit nuk varet fare nga vendimi mbi çështjen kryesore.
- 463.6 Në rastin nga neni 456 të këtij ligji, nëse tërheqja e padisë, apo e mjetit me të cilin është goditur vendimi i shkallës së parë, nuk është bërë gjatë shqyrtimit direkt të çështjes nga gjykata e shkallës së dytë, kërkesa për shpërblimin e shpenzimeve mund të paraqitet brenda afatit prej pesëmbëdhjetë (15) ditësh pas marrjes së njoftimit për tërheqjen e padisë, përkatësisht mjetit të goditjes.

#### Neni 464

Me rastin e dhënies së aktgjykimit të pjesshëm gjykata mund të vendose që vendosjen mbi shpenzimet procedurale ta lejë për vendimin përfundimtar.

#### Neni 465

- 465.1 Kur gjykata e hedhë poshtë ose e refuzon mjetin e goditjes së vendimit, atëherë ajo duhet të vendos edhe për shpenzimet e krijuara në procedurën sipas mjetit të tillë të goditjes.
- 465.2 Kur gjykata e ndryshon vendimin sipas mjetit të goditjes, apo kur e anulon vendimin e goditur dhe e hedhë poshtë padinë si të palejueshme, atëherë ajo duhet të vendos për të gjitha shpenzimet e procedurës.
- 465.3 Kur anulohet vendimi, kundër të cilit është paraqitur mjeti i goditjes dhe lënda kthehet për rigjykim, do të lihet që për shpenzimet lidhur me procedurën sipas mjetit të goditjes të vendos set me vendimin përfundimtar.
- 465.4 Gjykata mund të veprojë sipas dispozitës së nenit 3 të këtij neni edhe kur vendimin, kundër të cilit është ngritur mjeti i goditjes, vetëm pjesërisht e anulon.

#### Neni 466

- 466.1 Vendimi mbi shpenzimet i përmbajtur në aktgjykim mund të goditet vetëm me ankesën kundër aktvendimit, Nëse njëkohësisht nuk goditet edhe vendimi mbi çështjen kryesore.
- 466.2 Dispozita e paragrafit të më sipërm zbatohet edhe kur vendimi, me të cilin përfundon procedura e shkallës së parë, ose procedura sipas mjetit të goditjes, e ka formën e aktvendimit, e jo të aktgjykimit.
- 466.3 Nëse njëra palë e godet aktgjykimin vetëm në pikëpamje të shpenzimeve, e tjetra në pikëpamje të çështjes kryesore, atëherë gjykata e shkallës së dytë do të vendos me të njëjtin vendim mbi të dy mjetet e goditjes.

2) Shpenzimet në procedurën e sigurimit të provës

#### Neni 467

- 467.1 Shpenzimet e procedurës për sigurimin e provave i bartë pala e cila e ka paraqitur kërkesën për sigurimin e provës (paraprova). Ajo ka për detyrë që t'i paguaj edhe shpenzimet palës kundërshtare, respektivisht përfaqësuesit të përkohshëm të emëruar të asaj.

- 467.2 Këto shpenzime propozuesi i sigurimit të provës mund t'i realizoj me vonë si shpenzime gjyqësore, varësisht nga suksesi në procesin gjyqësor të mëvonshëm.

### 3) Lirimi nga pagimi i shpenzimeve gjyqësore

#### Neni 468

- 468.1 Gjykata e liron nga pagimi i shpenzimeve gjyqësore palën e cila, sipas gjendjes së vet të përgjithshme pasurore është në pamundësi t'i përballojë ato shpenzime pa dëmtuar ushqimin e domosdoshëm të vet dhe të familjes së ngushtë të saj.
- 468.2 Lirimi nga pagimi i shpenzimeve gjyqësore përfshin lirimin nga pagimi i taksave gjyqësore dhe lirimin nga deponimi i paradhënies për shpenzimet e dëshmitarëve, të ekspertëve të këqyrjes në vend si dhe të shpalljeve gjyqësore.
- 468.3 Gjykata mund ta lirojë palën vetëm nga taksat gjyqësore Nëse me pagimin e tyre do të pakësoheshin dukshëm mjetet për ushqimin e saj dhe të familjes së ngushtë të saj.
- 468.4 Me rastin e dhënies së aktvendimit mbi lirimin nga detyrimi i pagimit të shpenzimeve gjyqësore gjykata duhet t'i çmojë me kujdes të gjitha rrethanat, e sidomos do ta marrë parasysh vlerën e objektit të kontestit, numrin e anëtarëve të familjes dhe të ardhurat që i ka ajo dhe anëtarët e familjes së saj.
- 468.5 Vendimin mbi lirimin nga shpenzimet gjyqësore gjykata e jep brenda afatit prej shtatë (7) ditësh nga dita e paraqitjes së kërkesës.

#### Neni 469

- 469.1 Vendimin mbi lirimin nga pagimi i shpenzimeve gjyqësore e jep gjykata e shkallës së parë me propozimin e palës.
- 469.2 Pala ka për detyrë që, bashkë me propozimin, të paraqes certifikatën mbi gjendjen pasurore të dhënë nga organi kompetent.
- 469.3 Kur kjo është e nevojshme edhe vet gjykata mund të marrë sipas detyrës zyrtare të dhëna të domosdoshme dhe njoftime mbi gjendjen pasurore të palës që e kërkon lirimin, e për këtë gjë mund të dëgjohet edhe pala kundërshtare.
- 469.4 Kundër aktvendimit me të cilin aprovet propozimi nuk lejohet ankimi.

#### Neni 470

- 470.1 Kur pala është liruar nga pagimi i të gjitha shpenzimeve gjyqësore, gjykata e shkallës së parë, me kërkesën e saj, vendos që ta përfaqësoj avokati, Nëse kjo është e nevojshme për mbrojtjen e të drejtave të saja.
- 470.2 Pala të cilës i është caktuar përfaqësuesi lirohet nga pagimi i harxhimeve faktike dhe i shpërblimit të përfaqësuesit të caktuar.
- 470.3 Si përfaqësues i palës caktohet avokati të cilin e zgjedhë kryetari i gjykatës .
- 470.4 Përfaqësuesi i emëruar mund të kërkojë, për shkaqe të arsyeshme, që të shkarkohet nga detyra e përfaqësimit të palës. Mbi kërkesën e avokatit vendos gjyqtari i çështjes.
- 470.5 Kundër aktvendimit mbi shkarkimin e avokatit nuk lejohet ankimi.
- 470.6 Kundër aktvendimit të kryetarit të gjykatës me të cilin pranohet kërkesa e palës për emërimin e përfaqësuesit nuk lejohet ankimi.

#### Neni 471

Kur pala është liruar nga të gjitha shpenzimet gjyqësore, nga mjetet financiare të gjykatës bëhet parapagimi për shpenzimet e dëshmitarëve, ekspertëve, këqyrjes direkte si dhe të publikimit të shpallj eve gjyqësore dhe harxhimeve faktike të përfaqësuesit të caktuar.

#### Neni 472

- 472.1 Aktvendimi mbi lirimin nga pagimi i shpenzimeve gjyqësore dhe mbi emërimin e përfaqësuesit mund të anulohet nga gjykata e shkallës së parë gjatë zhvillimit të procesit gjyqësor, Nëse vërtetohet se pala është në gjendje t'i bartë të gjitha shpenzimet procedurale. Në rast të këtillë gjykata duhet të vendos nëse pala do t'i kompensojë krejtësisht apo pjesërisht shpenzimet dhe taksat gjyqësore nga të cilat është liruar me parë, si dhe harxhimet faktike dhe shpërblimin për përfaqësuesin e emëruar nga gjykata.
- 472.2 Në rastin nga paragrafët e sipërme, së pari duhet kompensuar shumat e paguara nga mjetet financiare të gjykatës.

#### Neni 473

- 473.1 Taksat dhe shpenzimet e paguara nga mjetet financiare të gjykatës, si dhe harxhimet faktike dhe shpërblimi për përfaqësuesin e emëruar të palës përbëjnë pjesë të shpenzimeve gjyqësore.



- 473.2 Për pagimin e shpenzimeve të tilla nga pala kundërshtare, që e humb procesin gjyqësor, vendos gjykata në bazë të dispozitave ligj ore mbi detyrimin me pagimin e shpenzimeve gjyqësore.
- 473.3 Taksat gjyqësore dhe shpenzimet e paguara nga mjetet financiare të gjykatës arkëtohen sipas detyrës zyrtare nga gjykata e shkallës së parë prej palës së ngarkuar për pagimin e shpenzimeve të tilla.
- 473.4 Nëse kundërshtari i palës së liruar nga pagimi i shpenzimeve gjyqësore është ngarkuar me pagimin e shpenzimeve gjyqësore, kurse konstatohet se ai nuk është në gjendje t'i paguaj ato, gjykata pas konstatimit të tillë mund të vendos që shpenzimet nga paragrafi 1 të këtij neni t'i paguajë tërësisht apo pjesërisht pala e liruar, pikërisht nga objekti i kontestit që i takon si palë gjyqfituese. Me këtë detyrim të palës gjyqfituese, të liruar më parë nga pagimi i shpenzimeve gjyqësore, nuk prekët e drejta e saj që t'i paguhen nga pala kundërshtare gjyqhumbe të gjitha shpenzimet gjyqësore sipas rregullave të përgjithshme.

## **PJESA E TRETË**

### **PROCEDURAT E POSAÇME KONTESTIMORE**

#### **KREU XXVI - PROCEDURA NË KONTESTET NGA MARRËDHËNIA E PUNËS (§§ 474 – 477)**

##### **Neni 474**

Nëse në këtë kapitull nuk ekzistojnë dispozita të posaçme, në kontestet nga marrëdhënia e punës zbatohen dispozitat tjera të këtij ligji.

##### **Neni 475**

Në kontestet nga marrëdhënia e punës, e sidomos me rastin e caktimit të afateve dhe konvokimit të seancave gjyqësore, gjykata gjithmonë do të ketë parasysh nevojën e zgjidhjes së ngutshme të kontesteve nga marrëdhënia e punës.

##### **Neni 476**

Në aktgjykimin me të cilin urdhërohet përmbushja e ndonjë detyrimi gjykata cakton afat shtatë (7) ditor (afati paritiv).

#### Neni 477

Afati për paraqitjen e ankesës kundër aktgjykimit apo kundër aktvendimit është shtatë (7) ditor.

### KREU XXVII - PROCEDURA NË KONTESTET PËR SHKAK TË PENGIMIT TË POSEDIMIT (§§ 478 – 483)

#### Neni 478

Nëse në këtë kapitull nuk ekzistojnë dispozita të posaçme, në kontestet për shkak të pengimit të posedimit zbatohen dispozitat tjera të këtij ligji.

#### Neni 479

Me rastin e caktimit të afateve dhe konvokimit të seancave gjykata gjithmonë i kushton kujdes nevojës së zgjidhjes së ngutshme të kontesteve për shkak të pengimit të posedimit, por duke marrë parasysh natyrën e secilit rast konkret.

#### Neni 480

Shqyrtimi i çështjes sipas padisë për shkak të pengimit të posedimit do të kufizohet vetëm në konstatimin dhe të provuarit e fakteve të gjendjes së fundit të posedimit dhe të pengimit të bërë. Përfshihet mundësia e shqyrtimit lidhur me të drejtën e posedimit, me bazën juridike, ndërgjegjshmërinë ose pandërgjegjshmërinë e posedimit. Përfshihet mundësia që në kontestet për shkak të pengimit të posedimit të parashtrahet kërkesa për shpërblimin e dëmit të shkaktuar me anë të veprimeve me të cilat është bërë pengimi i posedimit.

#### Neni 481

481.1 Afatin për përmbushjen e detyrimeve që u janë caktuar palëve gjykata e cakton varësisht nga rrethanat e çdo rasti konkret.

482.2 Afati për paraqitjen e ankesës është shtatë (7) ditor.

483.3 Për shkaqe të rëndësishme gjykata mund të vendos që ankesa mos ta pengojë përbarimin e aktvendimit.

483.4 Kundër aktvendimeve të dhëna në kontestet për shkak të pengimit të posedimit revizioni nuk është i lejuar.

#### Neni 482

Paditësi e humbe të drejtën që në procedurën përbaruese të përmbushë detyrimin e aktvendimit me të cilin i padituri urdhërohet që ta përmbushë detyrimin e caktuar, Nëse nuk e ka iniciuar procedurën përbaruese brenda afatit prej 30 ditësh pas skadimit të afatit paritiv.

#### Neni 483

Përsëritja e procedurës së përfunduar me vendim të formës së prerë në kon-testet për shkak të pengimit të posedimit lejohet vetëm nga shkaqet e përcaktuara në nenin 232 pika a) dhe b) të këtij ligji, dhe vetëm brenda afatit prej tridhjetë (30) ditësh nga dita në të cilën është bërë i formës së prerë aktvendimi përfundimtar.

### KREU XXVIII - PROCEDURA NË KONTESTET E VLERËS SË VOGËL (§§ 484 – 491)

#### Neni 484

Nëse në këtë kapitull nuk ekzistojnë dispozita të posaçme, në procesin gjyqësor për zgjidhjen e kontesteve të vlerës së vogël zbatohen dispozitat tjera të këtij ligji.

#### Neni 485

- 485.1 Konteste të vlerës së vogël, në vështrim të dispozitave të këtij KREU, janë kontestet në të cilat kërkesëpadia ka të bëjë me kërkesa në të holla, shuma e të cilave nuk është më e madhe se 500 €.
- 485.2 Si konteste të vlerës së vogël konsiderohen edhe kontestet në të cilat kërkesëpadia nuk ka të bëjë me kërkesë në të holla, por në të cilat paditësi në padinë e tij ka theksuar se pranon që, në vend të përmbushjes së kërkesës jo në të holla, t'i paguhet shuma e të hollave që nuk është me e madhe se 500 €.
- 485.3 Kontest i vlerës së vogël konsiderohet edhe ai në të cilin objekt i kërkesëpadiës nuk është shuma e të hollave, por dorëzimi i sendit të luajtshëm vlera e të cilit, e treguar në padi nga paditësi, nuk e kalon shumën prej 500 €.

#### Neni 486

Nuk konsiderohen konteste të vlerës së vogël, në kuptimin e dispozitave të këtij KREU, kontestet lidhur me sendet e paluajtshme, kontestet nga marrëdhëniet e punës dhe kontestet për shkak të pengimit të posedimit.

#### Neni 487

- 487.1 Në procedurën sipas padisë për zgjidhjen e kontestit më vlerë të vogël ankimi i veçantë lejohet vetëm kundër aktvendimit me të cilin përfundon procesi gjyqësor i shkallës së parë.
- 487.2 Aktvendimet e tjera, kundër të cilave sipas këtij ligji lejohet ankimi i veçantë mund të goditën vetëm me anë të ankesës kundër vendimit me të cilin përfundon procedura.
- 487.3 Aktvendimet nga paragrafi 2 e këtij neni nuk u dërgohen palëve posaçërisht, por shpallën në seancë gjyqësorë dhe inkorporohen në vendimin përfundimtar.

#### Neni 488

Në procedurën për zgjidhjen e kontesteve me vlerë të vogël, procesverbali nga seanca për shqyrtimin kryesor, përveç të dhënave nga neni 135 paragrafi 1 i këtij ligji, përmban:

- a) deklaratat e palëve me rëndësi esenciale, e sidomos ato me të cilat tërësisht apo pjesërisht pohohet kërkesëpadija, ose hiqet dorë nga kërkesëpadija, me të cilat ndryshohet apo tërhiqet padija, si dhe deklarata mbi heqjen dorë nga e drejta e ankimit;
- b) përmbajtjen esenciale të provave të marra;
- c) vendimet kundër të cilave lejohet ankimi dhe që janë shpallur në seancën për shqyrtimin kryesor të çështjes;
- d) nëse palët kanë qenë të pranishme me rastin e shpalljes së aktgjyqimit, e Nëse kanë qenë të pranishme, a janë udhëzuar në cilat kushte mund të bëjnë ankim.

#### Neni 489

- 489.1 Nëse pala paditëse e ndryshon kërkesëpadinë me anë të zmadhimit të saj duke kapërcyer kështu kufirin prej 500 €, procedura e filluar do të vazhdohet dhe përfundohet sipas dispozitave për procedurën kontestimore të përgjithshme të këtij ligji.
- 489.2 Nëse paditësi deri në përfundimin e seancës për shqyrtimin kryesor të çështjes që është duke u zhvilluar sipas dispozitave mbi procedurën e përgjithshme kontestimore e zvogëlon kërkesëpadinë nën shumën prej 500 €, procedura e mëtejme do të zhvillohet sipas rregullave të këtij ligji për procedurën për zgjidhjen e kontesteve me vlerë të vogël.

#### Neni 490

- 490.1 Nëse paditësi nuk vjen në seancën e parë të shqyrtimit kryesor të çështjes, përkundrejt thirrjes së rregullt, do të konsiderohet se e ka tërhequr padinë, përveçse kur i padituri në seancën e tillë kërkon që të vazhdohet me shqyrtimin e çështjes në mungesë të paditësit.
- 490.2 Nëse nga seanca e parë për shqyrtimin e çështjes kryesore mungojnë të dy palët ndërgjyqëse, përkundrejt thirrjes së rregullt, do të konsiderohet se paditësi e ka tërhequr padinë.

#### Neni 491

- 491.1 Aktgjykimi ose aktvendimi me të cilin përfundohet procedura e zgjidhjes së kontestit me vlerë të vogël mund të goditet me ankesë vetëm për shkak të shkeljes esenciale të dispozitave mbi procedurën kontestimore dhe për shkak të zbatimit të gabuar të së drejtës materiale.
- 491.2 Në aktgjykimin, përkatësisht aktvendimin nga paragrafi 491.1, gjykata ka për detyrë t'i përmendë shkaqet në bazë të të cilave mund të bëhet ankimi.
- 491.3 Kundër aktgjyqimit ose aktvendimit të shkallës së parë nga paragrafi 1 të këtij neni, palët mund të ankohen brenda afatit prej shtatë (7) ditësh.
- 491.4 Në procedurën e zgjidhjes së kontesteve me vlerë të vogël afati paritiv për përmbushjen e premtimit dhe ai për dhënien e vendimit plotësues është shtatë (7) ditor.

### KREU XXIX - PROCEDURA E DHËNIES SË URDHËRPAGESËS (§§ 492 – 504)

#### Neni 492

Nëse në këtë kapitull nuk ekzistojnë dispozita të posaçme, në procedurën e dhënies së urdhërpagesës zbatohen dispozitat e këtij ligji me të cilat është rregulluar procedura e përgjithshme kontestimore.

#### Neni 493

- 493.1 Kur kërkesëpadia ka të bëjë me kërkesë në të holla që është bërë e realizueshme, e që provohet me dokument të besueshëm që i është bashkangjitur padisë në origjinal apo kopje të legalizuar, atëherë gjykata do ta urdhërojë të paditurin që ta përmbushë kërkesëpadinë (urdhërpagesa).

493.2 Dokumente të besueshme konsiderohen sidomos:

- a) dokumentet publike;
- b) dokumentet private, në të cilat nënshkrimin e debitorit e ka verifikuar organi kompetent për verifikime;
- c) kambialet dhe çeqet me protestë dhe faturë kthyese, Nëse janë të nevojshme për themelimin e kërkesës;
- d) ekstraktet e verifikuara nga librat afariste për pagesat e shërbimeve komunale të furnizimit me ujë, energji elektrike dhe bartjen e mbeturinave;
- e) faturat;
- f) dokumentet që sipas dispozitave ligj ore të posaçme kanë rëndësinë e dokumenteve publike.

493.3 Gjykata e jep urdhërpagesën, edhe kur paditësi nuk e kërkon një gjë të tillë, Nëse i gjen të plotësuar kushtet për dhënien e saj.

#### Neni 494

494.1 Në rastet në të cilat, sipas Ligjit mbi procedurën përmbarese, mund të kërkohej ekzekutimi në bazë të dokumentit të besueshëm, gjykata e jep urdhërpagesën vetëm Nëse paditësi e bënë të besueshëm ekzistimin e interesit juridik për dhënien e urdhërpagesës.

494.2 Nëse paditësi nuk e bënë të besueshëm ekzistimin e interesit juridik për dhënien e urdhërpagesës, gjykata e hedhë poshtë padinë si të palejueshme.

494.3 Kur kërkesëpadija ka të bëjë me kërkesën në të holla që është bërë e realizueshme e që nuk është më e madhe se 500 €, gjykata e jep urdhërpagesën kundër të paditurit edhe Nëse padisë nuk i është bashkangjitur dokumenti i besueshëm, por në padi është treguar baza juridike e kërkesës dhe shuma e detyrimit si dhe provat me anë të të cilave mund të provohet vërtetësia e pretendimeve të paditësit.

494.4 Urdhërpagesa nga paragrafi 1 e këtij neni mund të jepet vetëm kundër debitorit kryesor.

#### Neni 495

495.1 Urdhërpagesën gjykata e jep pa konvokuar kurrfarë seance gjyqësore dhe vetëm në bazë të materialit procedural të përmbajtur në padi.

495.2 Në urdhërpagesë gjykata do të caktojë se i padituri ka për detyrë që brenda shtatë (7) ditësh, kurse në kontestet lidhur me kambialin dhe çekun brenda

tri (3) ditësh, pasi t'i dorëzohet urdhërpagesa me shkrim ta përmbushë kërkesën e padisë bashkë me shpenzimet gjyqësore që i ka caktuar gjykata, ose që brenda të njëjtit afat ta paraqesë prapësimin kundër urdhërpagesës. Në urdhërpagesë gjykata e paralajmëron të paditurin se prapësimi i paraqitur me vonesë do të hedhet poshtë.

495.3 Urdhërpagesa u dërgohet të dy palëve ndërgjyqëse.

495.4 Bashkë me urdhërpagesën të paditurit i dërgohet edhe padia me shkresat që i janë bashkangjitur.

#### Neni 496

496.1 Nëse gjykata nuk e aprovon propozimin për dhënien e urdhërpagesës, atëherë ajo do ta vazhdojë procedurën e përgjithshme sipas padisë.

496.2 Kundër aktvendimit me të cilin nuk aprovohet propozimi për dhënien e urdhërpagesës nuk lejohet ankimi.

#### Neni 497

497.1 I padituri mund ta goditë urdhërpagesën vetëm me anë të prapësimit.

497.2 Nëse urdhërpagesa goditet vetëm në pikëpamje të vendimit mbi shpenzimet procedurale, atëherë vendimi i këtillë mund të goditet vetëm me anë të ankesës kundër aktvendimit.

497.3 Në pjesën në të cilën nuk është goditur me prapësim, urdhërpagesa bëhet e formës së prerë.

#### Neni 498

498.1 Prapësimin e vonuar, jo të plotë apo të palejueshëm gjykata e hedh poshtë pa mbajtur seancë gjyqësore.

498.2 Nëse prapësimi është paraqitur brenda afatit ligjor, gjykata do të vlerësojë nëse nevojitet më parë të konvokojë seancë përgatitore apo menjëherë të konvokojë seancën për shqyrtim kryesor të çështjes.

498.3 Gjatë seancës përgatitore palët mund të parashtrojnë fakte të reja dhe të propozojnë prova të reja, kurse i padituri mund të bëjë kundërshtime të reja në pikëpamje të pjesës së goditur të urdhërpagesës.

#### Neni 499

Në aktgjykimin mbi çështjen kryesore gjykata do të vendos nëse urdhërpagesa mbahet në fuqi tërësisht apo pjesërisht ose anulohet.

#### Neni 500

- 500.1 Nëse i padituri pretendon se nuk kanë qenë të plotësuara kushtet ligjore për dhënien e urdhërpagesës (neni 493 dhe 494), apo se ekzistojnë pengesa procedurale për procedim të mëtejshëm, atëherë gjykata së pari do të vendos mbi këtë pretendim. Nëse konstaton se pretendimi i tillë është i bazuar, gjykata me aktvendim do ta prishë urdhërpagesën, dhe pasi të bëhet i formës së prerë ky aktvendim do të filloj shqyrtimin e çështjes kryesore, Nëse për një shqyrtim të këtillë ka vend.
- 500.2 Nëse gjykata nuk e aprovon pretendimin e tillë, do të kalojë në shqyrtimin e çështjes kryesore, kurse aktvendimi i gjykatës do të inkorporohet në vendimin mbi çështjen kryesore.

#### Neni 501

Nëse lidhur me prapësimin, me të cilin pretendohet se kërkesëpadia ende nuk është bërë e realizueshme, gjykata konstaton se ajo është bërë e realizueshme pas dhënies së urdhërpagesës, por para së të ketë përfunduar shqyrtimi kryesor, gjykata do ta anulojë me aktgjykim urdhërpagesën dhe do të vendos mbi kërkesëpadinë.

#### Neni 502

- 502.1 Nëse gjykata pas dhënies së urdhërpagesës shpallet jokompetente në pikëpamje lëndore, atëherë ajo e anulon urdhërpagesën dhe pasi të bëhet i formës së prerë aktvendimi mbi inkompetencën ia dërgon lëndën gjykatës për të cilën mendon se është e kompetencës lëndore.
- 502.2 Nëse gjykata pas dhënies së urdhërpagesës konstaton se është inkompetente në pikëpamje territoriale, ajo nuk do ta anulojë urdhërpagesën, por pasi të bëhet i formës së prerë aktvendimi mbi inkompetencën do t'ia dërgoj lëndën gjykatës për të cilën mendon se është e kompetencës territoriale.
- 503.3 I padituri mund të pretendojë se gjykata që e ka dhënë urdhërpagesën është jokompetente në pikëpamje territoriale vetëm në prapësimin e paraqitur kundër urdhërpagesës.



#### Neni 503

- 503.1 Gjykata mund të shpallet inkompetente në pikëpamje territoriale vetëm deri në momentin e dhënies së urdhërpagesës.
- 503.2 I padituri mund të pretendojë se gjykata që e ka dhënë urdhërpagesën është jokompetente në pikëpamje territoriale vetëm në prapësimin e paraqitur kundër urdhërpagesës.

#### Neni 504

- 504.1 Kur gjykata, në rastet e përcaktuara me këtë ligj, me aktvendim e hedhë poshtë padinë, atëherë ajo me të njëherit e anulon edhe urdhërpagesën.
- 504.2 Paditësi mund ta tërheqë padinë pa pëlqimin e të paditurit vetëm deri në momentin e paraqitjes së prapësimimit. Po qe së paditësi e tërheqë padinë, gjykata me aktvendim e anulon urdhërpagesën e dhënë.
- 504.3 Nëse i padituri deri në momentin e mbylljes së seancës për shqyrtim kryesor të çështjes heqë dorë nga të gjitha prapësimet e bëra, urdhërpagesa mbetet në fuqi.

### KREU XXX - PROCEDURA NË KONTESTET TREGTARE (§§ 505 – 510)

#### Neni 505

- 505.1 Në procedurën për zgjidhjen e kontesteve tregtare zbatohen dispozitat e këtij ligji për procedurën e përgjithshme kontestimore, Nëse në dispozitat e këtij KREU nuk është përcaktuar diç tjetër.
- 505.2 Rregullat procedurale për procedurën e zgjidhjes së kontesteve tregtare zbatohen në të gjitha kontestet për të cilat sipas Ligjit mbi Gjykatat është kompetente gjykata tregtare, përveçse në kontestet për të cilat është kompetente sipas tërheqjes (atraksionit) së kompetencës lëndore.

#### Neni 506

Faktet lidhur me qarkullimin e mallrave dhe shërbimeve të cilin e shoqërojnë dokumentet standarde afariste, si rregull, provohen me këto dokumente.

#### Neni 507

Gjyqtari është i autorizuar që në rastet e ngutshme të konvokojë seanca me anë të telefonit apo telegramit.

#### Neni 508

Revizioni në kontestet tregtare nuk lejohet nëse vlera e objektit të kontestit në pjesën e goditur të aktgjykimit të formës së prerë nuk i kalon 10.000 €.

#### Neni 509

Në procedurën e zgjidhjes së kontesteve tregtare vlejné këto afate:

- g) afati prej shtatë (7) ditësh për përgjigje në padi;
- h) afati prej pesëmbëdhjetë (15) ditësh për paraqitjen e propozimit për kthimin në gjendjen e mëparshme nga neni 130 paragrafi 3 i këtij ligji;
- i) afati prej shtatë (7) ditësh për ankesën kundër aktgjykimit apo aktvendimit;
- j) afati prej tri (3) ditësh për paraqitjen e përgjigjes në ankesë;
- k) afati prej shtatë (7) ditësh (afati paritiv) për përmbushjen e detyrimit në të holla, e për përmbushjen e premtimit jo në të holla gjykata mund të caktojë afat më të gjatë.

#### Neni 510

510.1 Në procedurën për zgjidhjen e kontesteve tregtare të vlerës së vogël konsiderohen vetëm ato konteste në të cilat padia ka të bëjë me kërkesë në të holla e cila nuk e kalon shumën prej 3.000 €.

510.2 Konsiderohen konteste të vlerës së vogël edhe kontestet në të cilat padia nuk ka të bëjë me kërkesë në të holla, por paditësi në padinë e tij deklaron se pranon që, në vend të premtimit jo në të holla, t'i paguhet shuma e të hollave që nuk e kalon atë prej 3.000 €.

510.3 Konsiderohet kontest i vlerës së vogël edhe kontesti në të cilin objekt kontesti nuk është shuma e të hollave por dorëzimi i sendit të luajtshtëm vlera e të cilit, e përmendur nga paditësi në padi, nuk e kalon shumën prej 3.000 €.

### KREU XXXI - PROCEDURA E GJYKIMEVE TË ARBITRAZHIT (§§ 511 – 531)

#### Neni 511

511.1 Palët mund të merren vesh që zgjidhjen e kontestit, lidhur me të drejtat me të cilat mund të disponojnë lirisht, t'ia besojnë arbitrazhit.

511.2 Marrëveshja për arbitrazh mund të bëhet nga palët për zgjidhjen e kontestit të caktuar apo për zgjidhjen e kontesteve që mund të lindin midis tyre nga

raporti materialo-juridik i caktuar. Marrëveshja për arbitrazhin është e vlefshme vetëm Nëse është lidhur në formë të shkruar.

- 511.3 Marrëveshja për arbitrazh konsiderohet e lidhur në formë të shkruar edhe kur është lidhur me këmbimin e letrave, telegrameve, telekseve apo mjeteve tjera të telekomunikacionit që e mundësojnë provën e shkruar mbi marrëveshjen e përfunduar.
- 511.4 Marrëveshja për arbitrazh konsiderohet e lidhur në formë të shkruar edhe Nëse është lidhur duke u këmbyer padia, në të cilën paditësi pretendon se ekziston marrëveshja dhe përgjigja në padi, në të cilën i padituri nuk e mohon një gjë të tillë.
- 511.5 Marrëveshja për arbitrazh mund të provohet vetëm me anë të shkresave.

#### Neni 512

Marrëveshja për arbitrazh është e lidhur vlerësisht edhe kur dispozita mbi kompetencën e arbitrazhit përmbahet në kushtet e përgjithshme për lidhjen e kontratave materialo-juridike.

#### Neni 513

- 513.1 Numri i arbitrave të arbitrazhit duhet të jetë gjithmonë tek.
- 513.2 Nëse me marrëveshjen e palëve nuk është caktuar numri i arbitrave, atëherë secila nga palët e emëron nga një arbitër, kurse këta të dy bashkë e zgjedhin kryetarin e arbitrazhit.

#### Neni 514

- 514.1 Nëse palët për zgjidhjen e kontestit të caktuar e kanë kontraktuar kompetencën e arbitrazhit, gjykata të cilës i është paraqitur padia për zgjidhjen e të njëjtit kontest dhe midis palëve të njëjta, sipas prapësimit të të paditurit shpallet jokompetente, i anulon veprimet procedurale të kryera dhe me aktvendim e hedhë poshtë padinë si të palejueshme.
- 514.2 Prapësimin nga paragrafi 1 e këtij neni pala e paditur mund ta parashtrrojë më së voni në momentin e paraqitjes së përgjigjes në padi.

#### Neni 515

- 515.1 Palën e cila në bazë të marrëveshjes për arbitrazh duhet ta emëroj arbitrin mund ta ftojë pala kundërshtarë që brenda afatit pesëmbëdhjetë (15) ditor ta bëjë emërimin e tillë si dhe ta njoftojë për emërimin e bërë.

- 515.2 Ftesa nga paragrafi 1 e këtij neni është e vlefshme vetëm Nëse pala e cila e ka bërë atë e ka emëruar arbitrin e vet dhe për një gjë të këtillë e ka njoftuar palën kundërshtare.
- 515.3 Kur në bazë të marrëveshjes për arbitrazh emërimin e arbitrave duhet ta bëjë personi i tretë, çdonjëra nga palët mund t'ia bëjë ftesën nga paragrafi 2 i këtij neni personit të tillë.
- 515.4 Personi i ftuar që ta bëjë emërimin e arbitrit të arbitrazhit është i lidhur me emërimin e kryer posa të njoftohet për emërimin pala kundërshtare, respektivisht njëra nga palët.

#### Neni 516

- 516.1 Ne qoftë se arbitri nuk emërohet në kohën e duhur, e nga marrëveshja nuk del diç tjetër, arbitrin e propozon gjykata shtetërore sipas propozimit të palës.
- 516.2 Nëse arbitrat nuk mund të pajtohen rreth zgjedhjes së kryetarit, e nga marrëveshja e palëve për arbitrazh nuk del diç tjetër, kryetarin e arbitrazhit, sipas propozimit të cilitdo arbitër apo të cilësdo palë, e emëron gjykata shtetërore.
- 516.3 Për emërimin e arbitrit, përkatësisht të kryetarit të arbitrazhit është kompetente gjykata e shkallës së parë e cila do të ishte kompetente për zgjidhjen e kontestit po të mos ekzistonte marrëveshja për arbitrazh.
- 516.4 Kundër aktvendimit të gjykatës nuk lejohet ankimi.
- 516.5 Pala e cila nuk dëshiron t'i shfrytëzojë autorizimet nga paragrafi 1 dhe 2 të këtij neni mund të kërkojë me padi nga gjykata kompetente për emërimin e arbitrit apo të kryetarit të arbitrazhit që ta quaj të pavlefshme marrëveshjen për arbitrazh.

#### Neni 517

- 517.1 Përveç rastit nga neni 516 i këtij ligji, secila nga palët mund të kërkojë me padi që gjykata shtetërore ta shfuqizojë marrëveshjen për arbitrazh në qofte së:
- l) palët brenda afatit prej tridhjetë (30) ditësh nga ftesa e parë për emërimin e arbitrit nuk mund të merren vesh për zgjedhjen e arbitrit që do të duhej ta emëronin bashkërisht;
  - m) personi i cili në vete marrëveshjen për arbitrazh është emëruar arbitër nuk dëshiron apo nuk mund ta ushtrojë misionin e besuar.

- 517.2 Mbi padinë e ngritur është kompetente të vendos gjykata e përmendur në nenin 516 paragrafi 3 të këtij ligji.
- 517.3 Për në seancën për shqyrtimin e kërkesës së paditësit gjykata i fton të dy palët, por ajo mund të merr vendim edhe kur palët e ftuara rregullisht nuk paraqitën në seancën e këtillë.

#### Neni 518

- 518.1 Deklaratën për pranimin e misionit që i është besuar arbitri duhet ta bëjë me shkrim. Një gjë të tillë arbitri mund ta bëjë edhe ashtu që e nënshkruan marrëveshjen e palëve për arbitrazh.
- 518.2 Arbitri ka për detyrë ta kryej misionin që i është besuar në kohën e duhur dhe t'i kryejë veprimet në procesin e arbitrazhit pa e zvarritur atë. Nëse palët nuk janë marrë vesh ndryshe, ato mund ta shkarkojnë arbitrin i cili nuk i kryen ashtu siç duhet, dhe me kohë, detyrat nga misioni që i është besuar.
- 518.3 Arbitri ka të drejtë në pagimin e shpenzimeve dhe shpërblimin për punën e kryer. Palët në pjesë të barabarta i bartin shpenzimet dhe shpërblimin që i takon arbitrit për punën e kryer.

#### Neni 519

- 519.1 Arbitri ka për detyrë të përjashtohet kur ekzistojnë shkaqet e përjashtimit të parashikuara për përjashtimin e gjyqtarit të gjykatës shtetërore me këtë ligj.
- 519.2 Përjashtimi i arbitrit mund të kërkohet nga palët edhe atëherë kur arbitri nuk i ka kualifikimet e duhura për të cilat ato janë marrë vesh, si dhe kur ai nuk i përmbushë detyrat.
- 519.3 Pala e cila vetë, apo bashkërisht me palën tjetër, e ka emëruar arbitrin mund ta kërkojë përjashtimin e tij vetëm nëse shkak i përjashtimit ka lindur, apo pala ka marrë dijëni për të, pasi të jetë emëruar arbitri.
- 519.4 Palët mund të merren vesh për procedurën e përjashtimit të arbitrit, por nuk mund ta evitojnë zbatimin e dispozitave të paragrafit 7 të këtij neni.
- 519.5 Kur mungon marrëveshja nga paragrafi 4 e këtij neni, pala duhet t'ia paraqes kërkesën për përjashtimin e arbitrit arbitrazhit brenda afatit pesëmbëdhjetë (15) ditor nga dita në të cilën ka marrë dijëni për emërimin e arbitrit apo për cilëndo rrethanë nga paragrafi 1 dhe 2 të këtij neni. Kërkesa për përjashtimin e arbitrit duhet të jetë me shkrim dhe t'i përmbajë shkaqet e përjashtimit.

- 519.6 Nëse arbitri, përjashtimin e të cilit e ka kërkuar pala, nuk tërhiqet nga arbitrazhi, vendimin mbi përjashtimin e merr gjykata e arbitrazhit në përbërjen e te cilës paraqitet edhe arbitri i tillë.
- 519.7 Nëse kërkesa për përjashtimin e arbitrit mbetet e pasuksesshme, pala që e ka bërë kërkesën e tillë mund t'i drejtohet gjykatës shtetërore nga neni 516, paragrafi 3 që ta merr vendimin për përjashtimin e arbitrit. Këtë kërkesë pala duhet ta paraqesë brenda afatit prej tridhjetë (30) ditësh nga dita në të cilën i është dorëzuar vendimi i arbitrazhit me të cilin është refuzuar kërkesa e saj për përjashtimin e arbitrit.

#### Neni 520

- 520.1 Gjykata e arbitrazhit ka të drejtë që të vendos për kompetencën e vet, si dhe mbi prapësimet e palëve lidhur me ekzistimin dhe vlefshmërinë e marrëveshjes për arbitrazh.
- 520.2 Prapësimin për inkompetencën e arbitrazhit i padituri duhet ta parashtojë me anë të përgjigjes në padi. Kur konstatohet se paraqitja me vonesë e prapësimit është e justifikueshme, arbitrazhi mund ta marrë në konsideratë prapësimin e vonuar.
- 520.3 Nëse arbitrazhi e quan vendin kompetent për zgjidhjen e kontestit, secila nga palët mund të kërkojë nga gjykata shtetërore e përmendur ne nenin 516 paragrafi 3 i këtij ligji që të vendos lidhur me problemin e lindur. Kërkesa duhet të paraqitet brenda afatit prej tridhjetë (30) ditësh nga dita në të cilën palës i është dorëzuar vendimi i arbitrazhit.

#### Neni 521

Ne qoftë se palët nuk janë marrë vesh ndryshe, procedurën e arbitrazhit e cakton vetë arbitrazhi.

#### Neni 522

- 522.1 Ndaj dëshmitarëve, palëve dhe personave të tjerë që marrin pjesë në procesin e arbitrazhit, arbitrazhi nuk mund të përdorë mjete shtrënguese e as të shqiptojë dënime.
- 522.2 Arbitrazhi mund të kërkojë nga gjykata shtetërore e kompetencës territoriale ndihmë juridike në formë të marrjes së provave të cilat nuk mund t'i merr vet.

522.3 Në procedurën e marrjes së provave do të zbatohen dispozitat e këtij ligji mbi marrjen e provave nga gjykata e porositur.

#### Neni 523

Arbitrazhi mund të jep aktgjykimin në mbështetje të parimit të ndershmërisë (ex aequo et bono) vetëm Nëse palët e kane autorizuar për një gjë të tillë.

#### Neni 524

524.1 Kur arbitrazhi përbëhet prej disa arbitrave, aktgjykimi merret me shumicën e votave, Nëse me marrëveshjen për arbitrazh nuk është përcaktuar diç tjetër.

524.2 Nëse nuk mund të arrihet shumica e duhur e votave, arbitrazhi ka për detyrë që për një gjë të këtillë t'i njoftojë palët.

524.3 Nëse palët nuk janë marrë vesh ndryshe, në rastin e paragrafit 2 të këtij neni, çdonjëra nga palët ka të drejtë që me padi të kërkojë nga gjykata shtetërore e përmendur në nenin 516 paragrafi 3 deklarinimin e marrëveshjes për arbitrazh të pa vlefshme për të ardhmen.

#### Neni 525

525.1 Aktgjykimi i arbitrazhit duhet ta ketë pjesën arsyetuese vetëm kur palët nuk e kanë përcaktuar të kundërtën.

525.2 Originalin e aktgjykimit dhe të gjitha kopjet e tij i firmosin të gjithë arbitrat.

525.3 Aktgjykimi quhet i vlefshëm edhe Nëse ndonjëri nga arbitrat e refuzon firmosjen e tij, por vetëm nëse atë e kanë firmosur shumica e arbitrave. Në rast të këtillë në vetë aktgjykimin duhet konstatuar faktin e refuzimit të firmosjes nga arbitri konkret.

525.4 Palëve u dorëzohen kopjet e aktgjykimit nëpërmjet gjykatës të përmendur në nenin 522 paragrafi 3 të këtij ligji.

#### Neni 526

Originali i aktgjykimit dhe dëftesat për dorëzimin e aktgjykimit palëve ruhen tek gjykata e përmendur në nenin 516 paragraf i 3 të këtij ligji.

#### Neni 527

- 527.1 Aktgjykimi i arbitrazhit e ka ndaj palëve fuqinë e vendimit të formës së prerë Nëse me marrëveshjen për arbitrazh nuk është përcaktuar mundësia e goditjes së aktgjykimit në arbitrazhin e shkallës së dytë.
- 527.2 Gjykata e përcaktuar në nenin 516 paragraf 3 i këtij ligji, me kërkesën e palëve, e vënë në kopjet e aktgjykimit klauzolën (vërtetimin) mbi plotfuqishmërinë dhe ekzekutueshmërinë e aktgjykimit.

#### Neni 528

- 528.1 Aktgjykimi i arbitrazhit mund të anulohet sipas kërkesës së palës.
- 528.2 Për të vepruar sipas padisë është kompetente gjykata shtetërore e përmendur në nenin 516 paragrafi 3 i këtij ligji.

#### Neni 529

Anulimi i aktgjykimit të arbitrazhit mund të kërkohet:

- a) nëse fare nuk është lidhur marrëveshja për arbitrazh apo nëse ajo është e pavlefshme;
- b) nëse në pikëpamje të përbërjes së arbitrazhit ose lidhur me dhënien e vendimit është shkelur ndonjë dispozitë e këtij ligji apo e marrëveshjes për arbitrazh të palëve;
- c) nëse aktgjykimi nuk e ka pjesën arsyetuese sipas nenit 525 paragrafit 1 të këtij ligji, ose nëse origjinali apo kopjet e aktgjykimit të arbitrazhit nuk janë firmosur në mënyrën e caktuar në nenin 525 paragrafit 2 të këtij ligji;
- d) nëse gjykata e arbitrazhit e ka tejkalluar kufirin e detyrës së vet;
- e) nëse dispozitivi i aktgjykimit është i pakuptueshëm apo kontradiktor me vetveten;
- f) nëse gjykata konstaton se, edhe pse pala ndoshta nuk e përmend këtë shkak anulimi, aktgjykimi i arbitrazhit është në kundërshtim me rendin juridik të vendit tone;
- g) nëse ekziston ndonjëri nga shkaqet për përsëritjen e procedurës kontestimore nga neni 232 i këtij ligji.

#### Neni 530

- 530.1 Padia për anulimin e aktgjykimit të arbitrazhit mund të ngritet në gjykatën kompetente brenda afatit prej tridhjetë (30) ditësh.



- 530.2 Nëse anulimi i aktgjykimit kërkohet nga shkaqet e treguara në nenin 529 pika a) – f) të këtij ligji, afati tridhjetë (30) ditore për padi llogaritet nga dita në të cilën aktgjykimi i është dorëzuar palës, por, Nëse pala për shkakun e anulimit ka marrë dijeni më vonë, afati llogaritet nga dita e marrjes së dijenisë për të.
- 530.3 Në aspektin e llogaritjes së afatit kur anulimi kërkohet nga shkakun i përmendur në pikën g) të nenit 529 të këtij ligji, do të aplikohet dispozita adekuatë e nenit 234 pika a) dhe b) të këtij ligji.
- 530.4 Pas kalimit të një (1) viti nga dita në të cilën aktgjykimi i arbitrazhit është bërë i formës së prerë nuk mund të kërkohet anulimi i aktgjykimit.

#### Neni 531

Palët me marrëveshje të tyre nuk mund të heqin dorë nga zbatimi i nenit 519 paragrafi 1 dhe 2, nenit 525 paragrafi 2 dhe 3, dhe neneve 528 – 531 të këtij ligji.

### KREU XXXII - DISPOZITAT TRANZITORE DHE TË FUNDIT (§§ 532 – 537)

#### Neni 532

- 532.1 Nëse para hyrjes në fuqi të këtij ligji ka filluar të zhvillohet procesi gjyqësor në gjykatën e shkallës së parë, atëherë procedura e mëtutjeshme do të zhvillohet sipas dispozitave të këtij ligji.
- 532.2 Në çështjet juridike nga paragrafi 1 e këtij neni në të cilat është konvokuar seanca përgatitore ose ajo kryesore, por para se të ketë filluar shqyrtimi kryesor, gjykata do ta revokojë aktvendimin me të cilin është konvokuar seanca dhe do ta ftojë palën e paditur që ta paraqes me shkrim përgjigjen në padi sipas këtij ligji.
- 532.3 Në çështjet nga paragrafi 1 e këtij neni, në të cilat ka filluar shqyrtimi kryesor lidhur me to, gjykata ka për detyrë që në seancën e ardhshme t'i kryejë të gjitha veprimet që duhet kryer sipas dispozitave të këtij ligji në seancën përgatitore. Mbajtja e seancës së tillë do t'i krijojë të gjitha pasojat procedurale që i ka seanca përgatitore e mbajtur sipas dispozitave të këtij ligji.

#### Neni 533

- 533.1 Nëse para fillimit të zbatimit të këtij ligji është dhënë aktgjykimi i shkallës së parë, ose aktvendimi me të cilin është përfunduar procedura në gjykatën e

shkallës së parë, atëherë procedura e mëtejme do të zhvillohet sipas dispozitave të deritanishme.

533.2 Ne qoftë se pas fillimit të zbatimit të këtij ligji anulohet vendimi i shkallës së parë nga paragrafi 1 e këtij neni, atëherë procedura e mëtejme do të zhvillohet sipas këtij ligji.

533.3 Mbi revizionin e paraqitur kundër vendimit të shkallës së dytë që ka marrë formë të prerë, në gjykimin e filluar para fillimit të zbatimit të këtij ligji, vendoset sipas rregullave të procedurës kontestimore që kanë qenë në fuqi deri në ditën e fillimit të zbatimit të këtij ligji.

#### Neni 534

Nëse para fillimit të zbatimit të këtij ligji padia i është dorëzuar të paditurit, atëherë në procedurën e mëtejme nuk zbatohen dispozitat e nenit 150 të këtij ligji, por kushtet për dhënien e aktgjykimit të padëgjueshmërisë, do të vlerësohen sipas dispozitave të gjertanishme.

#### Neni 535

Prej ditës në të cilën ky ligj hyn në fuqi, procedura e pezulluar do të vazhdojë së zhvilluari sipas dispozitave të këtij ligji.

#### Neni 536

Dispozitat e këtij ligji që kanë të bëjnë me procedurën e arbitrazhit do të zbatohen në arbitrazhin e kontraktuar pas fillimit të zbatimit të këtij ligji.

#### Neni 537

Me hyrjen në fuqi të këtij ligji shfuqizohen: Ligji mbi Procedurën kontestimore ("Gazeta zyrtare e RSFJ", Nr. 4/76, si dhe Ligjet mbi ndryshimin dhe plotësimin e Ligjit mbi procedurën kontestimore të publikuara në "Gazetën zyrtare të SFRJ", Nr. 36/77, 36/80, 69/82, 58/84 dhe 74/87) si dhe dispozitat tjera të mëvonshme.

#### Neni 538

Ky ligj hyn në fuqi pesëmbëdhjetë (15) ditë nga dita e publikimit në Gazetën Zyrtare të Republikës së Kosovës.

# INDEKSI

## A

Adresa, 110, 111.....	34
AFATET	
- Afati paritiv, 146.....	47
- Korrigjimi i parashtresës, 102.....	32
- Ndërrimi i adresës dhe dorëzimi i shkresave, 116.....	36
- Paeljueshmëria e përsëritjes së procedurës (60 ditë), 130.3 .....	43
- Për kundërpadi, 395.....	118
- Propozim (7 ditor) për kthim në gjendjen e mëparshme, 130.2 .....	42
- Propozimi i palës për plotësimin e aktgjykimit, 162.....	53
- Propozimi për përsëritjen e procedurës, 130.1.....	42
- Shpallja e caktimit të përfaqësuesit të përkohshëm, 83 .....	27
AKTGJYKIMI	
- Aktgjykimi i pjesshëm, 147.....	48
- Aktgjykimi kondemnator,151.....	50
- Aktgjykimi në bazë të heqjes dorë nga kërkesëpadi,149 .....	49
- Aktgjykimi në bazë të pohimit, 148.....	48
- Aktgjykimi pa shqyrtim kryesor të çështjes, 152.....	51
- Aktgjykimi për shkak të mungesës, 151 .....	50
- Aktgjykimi për shkak të padëgjueshmërisë / mosbindjes,150 .....	49
- Aktgjykimi plotësues, 162 .....	53
- Dhënia, hartimi me shkrim dhe dërgimi i aktgjykimit, 153 .....	51
- Forma e prerë e aktgjykimit, 166 .....	55
- Korrigjimi i aktgjykimit, 165.....	54
- Pa shqyrtimin kryesor të çështjes, 398 - 399.....	118
- Pasojat e heqjes dorë nga ankimi, 161.....	53
- Përmbajtja e aktgjykimit, 160 .....	52
- Përmbajtja e arsytimit të aktgjykimit, 160.4 .....	53
- Përmbajtja e dispozitivit të aktgjykimit, 160.3 .....	52
- Plotësimi i aktgjykimit me kërkesën e palës, 162.....	53
AKTVENDIMI.....	56
Ankesa kundër aktvendimit (§§ 206 -210) .....	66
Anulimi i pajtimit gjyqësor, 418.2, 418.3.....	124
Arbitrazhi, 511-531.....	147

## AVOKATI

- Dërgimi i parashtrësive përfaqësuesit me prokurë, 108 .....	34
- Forma e autorizimit, 92 .....	29
- Prokura e përfaqësimit, 90 .....	28
- Revokimi dhe denoncimi i prokurës, 94 .....	30
- Shuarja e prokurës, 95 .....	30
- Veprimet pas denoncimit të prokurës, 94.4 .....	30

## B

Barazia e gjuhëve, 6 .....	6
<b>BASHKËNDËRGJYQËSIA</b>	
- Formale, 269 .....	84
- Materiale, 264 .....	83
- Unike, 269 .....	84

## D

Dëgjimi i palëve ,373 - 378.....	113
Deklarata e rreme, 347 .....	107
Deklarata e dëshmitarëve, 339 - 355.....	105
Delegimi i kompetencës, 63 - 65.....	21
<b>DENIMET</b>	
- Me të holla, 10.2.....	7
<b>DËNIMET</b>	
- Dënimi i ekspertit, 293.1.....	92
- Masat tjerat ligjore, 10.2 .....	7
Disponimi i kërkesave të palëve .....	5
Dokumentet e besueshme, 493.2.....	143
Dokumentet, 329, 338 .....	103
Dokumenti i rremë, 329,347 .....	103
Dorëzimi, 103.....	33

## E

E drejta materiale, 184 .....	60
Ekonomizimi i procedurës, 10.....	7
Ekspertiza, 357 - 367.....	109

Emërimi i paraardhësit, 275 .....	86
-----------------------------------	----

## F

Facultas alternativa (detyrimi alternativ), 145).....	47
FAKTET	
- Detyrimi i gjykatës për vërtetimin e fakteve kontestuese, 7.....	6
- Detyrimi i palëve të paraqesin faktet relevante, 7.....	6
- Faktet e reja në procedurën ankimore, 180.....	58
- Vlerësimi i të vërtetës, 9 .....	7
Faktet notore, 321.....	101
Fatura .....	143
Fletëdërgesa, 121.....	39
Fyerja e gjykatës, 289.....	91

## G

Gjuha në procedurë .....	30
GJYKATA	
- Shpërfillja e urdhërave të gjykatës, 10.3.....	7
Gjyqvarësia, 262.....	82
Goditja e pajtimit gjyqësor, 418.1 .....	123

## K

Kërkesa për mbrojtjen e ligjshmërisë.....	76
KËRKESËPADIA	
- Disponimi i lirë i palëve, 3 .....	5
- Heqja dorë nga kërkesëpadia, 149.....	49
Kompetenca .....	14
KOMPETENCA	
- Kompetenca absolute e gjykatës,17.....	9
KOMPETENCA E GJYKATËS	
Kompetenca e gjykatave në kontestet me element ndërkombëtar.....	12
Kompetenca lëndore .....	12
Kompetenca në kontestet për ushqimin ligjor(§ 59).....	19
Kompetenca për personat për të cilët në Kosovë nuk ekziston gjykatë e kompetencës territoriale(§ 60) .....	20

Kompetenca sipas vendit ku ndodhet përfaqësia e personit të huaj në Kosovë (§ 61).....	20
Kompetenca territoriale nga gjykata e lartë(§§ 63 - 65).....	21
Kompetenca territoriale për paditë kundër shtetasve të huaj (§ 62) .....	20
Përcaktimi i vlerës së objektit të kontestit.....	12
Kompetenca e zgjedhur territoriale, 44 - 54.....	16
Kompetenca lëndore, 29 .....	12
Kompetenca vendore, 41.....	15
Kompetenca ne kontestet martesore, 56.....	19
KONTESTI .....	82
- Ekzistimi i gjyqvarësisë, 262.....	82
- Me vlerë të vogël, 484 - 491 .....	140
- Ndërhyrësi në pozitën e bashkëndërgjyqësit unik, 274 .....	86
- Në procedurën tregtare, 505 - 510.....	146
- Nga marrëdhënia e punës, 474 - 477.....	139
- Pjesëmarrja e personave të tretë në procedurë, 271 .....	85
- Procedura e gjykimeve të arbitrazhit, 511 - 531.....	147
- Procedura e pengim posedimit, 478 - 483.....	139
KUNDËRPADIA	
Afati për kundërpadi, 395 .....	118
Kundërshtimi i kompensimit, 160, 166, 180 .....	52

## M

Marrëveshja mbi kompetencën territoriale, 66) .....	21
Mjetet e jashtëzakonshme të goditjes.....	67
Revizioni (§§ 211 – 231).....	67
MJETET E ZAKONSHME TË GODITJES.....	57
- Ankesa kundër aktgjykimit, 176 - 205.....	57
- E drejta e ankimit, 176.....	57
Mosrespektimi i gjykatës – dënimet, 288 -295.....	90

## N

Ndërhyrësi kryesor, 266.....	84
Ndërprerja dhe pushimi i gjykimit, 277 - 282 .....	87
Ndihma juridike, 283 .....	89

## P

### PAAFATSHMËRIA

- Ankesa, 186 .....	61
- padia, 391.....	117
- Propozimi për kthim në gjendjen e mëparshme, 130-131 .....	42
- Propozimi për përsëritjen e procedurës.....	74
- Revizioni .....	69

### PADIA .....

- Kundërpadia 256 .....	80
- Ndryshimi i padisë, 256 .....	80
- Padi vërtetimi, 254 .....	79
- Padia me disa kërkesa 255 .....	79
- Sigurimi i padisë, 296 .....	93
- Tërheqja e padisë, 261 .....	82
Palejueshmëria e padisë, 391.....	117
Përgjigja në padi, 394 .....	118

### Pajtimi gjyqësor në gjykatën e shkallës së dytë, 415,3.....

### Pajtimi gjyqësor pas aktgjykimit të shkallës së parë, 415.4.....

### Pajtimi gjyqësor, 412.....

### PALEJUESHMËRIA

- Ankesa kundër aktgjykimit .....	61
- Propozimi për kthim në gjendjen e mëparshme, 130 .....	42
- Propozimi për përsëritjen e procedurës, 218.....	69
- Revizioni .....	69

### PALËT NË PROCEDURË

- Largimi i palës nga seanca .....	91
------------------------------------	----

### PAPLOTËSHMËRIA

- Parashtrësia, 102.....	31
--------------------------	----

### PAPLOTSHMËRIA .....

- Padia, 253.....	78
- Propozimi për përsëritjen e procedurës, 237.....	74

### Parashtrësat, 99 - 102 .....

### Parimi i kontradiktetit, 5 .....

### Parimi i ndërgjegjshmërisë në shfrytëzimin e të drejtave dhe ndalimi i keqpërdorimit të autorizimeve, 9, 10.....

### Parimi i publicitetit, 5 .....

### Përfaqësimi i të miturve, 78 .....

Përgatitja e shqyrtimit kryesore, 386 - 388 .....	115
Përfundimi i gjyqtarit, 67 - 72.....	22
Përsëritja e procedurës (§§ 232-244) .....	72
Personat e tretë në procedurë, 271 – 276.....	85
Personat fizikë dhe juridikë, 73.....	24
<b>PRAKTIKANTI I AVOKATIT</b>	
- Largimi nga seanca dhe dënimi, 289.4.....	91
- Zëvendësimi i avokatit, 90.4 .....	29
<b>PRAPËSIMET E PALËS SË PADITUR</b>	
- Jokompetenca territoriale e gjykatës, 22 .....	10
- Në rastin e arbitrazhit të kontraktuar, 20.....	9
- Për shkak të vlerës tepër të madhe apo të vogël të padisë, 36 .....	13
Propozimi për kthimin në gjendjen e mëparshme, 130, 131.....	42
<b>PROVAT</b> .....	101
- Detyrimi i palës të paraqet provat .....	6
- Marrja e provës me anë të dëshmitar, 339 .....	105
- Provat e reja, 180, 428.....	58
- Shikimi i provave në origjinal, 101.....	32
- Vlerësim i lirë i provave, 8 .....	7

## Q

Qortimi dhe dënimi (289.2) .....	91
----------------------------------	----

## R

Refuzimi i dëshmitarit të dëshmojë, 292.2 .....	92
---	----

## S

Shikimi i provave në origjinal, shih 101.....	32
Shkeljet thelbësore të LPK, 182 .....	59
Shpenzimet kontestimore, 449 - 466.....	131
Shqyrtimi kryesore me dyer të hapura, 444 - 448 .....	130
<b>SIGURIMI I KËRKESËPADISË</b>	
- Pamundësia e caktimit të masës së sigurimit, 305 .....	97
<b>SIGURIMI I KËRKESËPADISË</b>	
- Kompetenca e gjykatës së shkallës së parë dhe të dytë, 296.1 .....	93



- Kushtet për caktimin e masës së sigurimit, 297 .....	93
- Masat e sigurimit për sigurimin e të drejtave, 301 .....	95
- Masat për sigurimin e kërkesës, 299.1 .....	94
- Përbajtja e propozimit për masën e sigurimit, 304.3 .....	96
- Propozimi me shkrim dhe gojor i masës së sigurimit, 304 .....	96

## V

Vepra penale, 14, 278, 232 .....	8
Vlerësimi i lirë i gjykatës.....	102

## Z

Zëvendësimi i gjobës me burg, 294 .....	93
Zgjidhja e ngutshme e kontesteve të marrëdhënies së punës, 475 .....	139
Zgjidhja e ngutshme në rastet e pengim posedimit, 479 .....	139
Zotësia procedurale, 76 - 81.....	24